

---

This is a reproduction of a library book that was digitized by Google as part of an ongoing effort to preserve the information in books and make it universally accessible.

Google™ books

<https://books.google.com>





## A propos de ce livre

Ceci est une copie numérique d'un ouvrage conservé depuis des générations dans les rayonnages d'une bibliothèque avant d'être numérisé avec précaution par Google dans le cadre d'un projet visant à permettre aux internautes de découvrir l'ensemble du patrimoine littéraire mondial en ligne.

Ce livre étant relativement ancien, il n'est plus protégé par la loi sur les droits d'auteur et appartient à présent au domaine public. L'expression "appartenir au domaine public" signifie que le livre en question n'a jamais été soumis aux droits d'auteur ou que ses droits légaux sont arrivés à expiration. Les conditions requises pour qu'un livre tombe dans le domaine public peuvent varier d'un pays à l'autre. Les livres libres de droit sont autant de liens avec le passé. Ils sont les témoins de la richesse de notre histoire, de notre patrimoine culturel et de la connaissance humaine et sont trop souvent difficilement accessibles au public.

Les notes de bas de page et autres annotations en marge du texte présentes dans le volume original sont reprises dans ce fichier, comme un souvenir du long chemin parcouru par l'ouvrage depuis la maison d'édition en passant par la bibliothèque pour finalement se retrouver entre vos mains.

## Consignes d'utilisation


Google est fier de travailler en partenariat avec des bibliothèques à la numérisation des ouvrages appartenant au domaine public et de les rendre ainsi accessibles à tous. Ces livres sont en effet la propriété de tous et de toutes et nous sommes tout simplement les gardiens de ce patrimoine. Il s'agit toutefois d'un projet coûteux. Par conséquent et en vue de poursuivre la diffusion de ces ressources inépuisables, nous avons pris les dispositions nécessaires afin de prévenir les éventuels abus auxquels pourraient se livrer des sites marchands tiers, notamment en instaurant des contraintes techniques relatives aux requêtes automatisées.

Nous vous demandons également de:

- + *Ne pas utiliser les fichiers à des fins commerciales* Nous avons conçu le programme Google Recherche de Livres à l'usage des particuliers. Nous vous demandons donc d'utiliser uniquement ces fichiers à des fins personnelles. Ils ne sauraient en effet être employés dans un quelconque but commercial.
- + *Ne pas procéder à des requêtes automatisées* N'envoyez aucune requête automatisée quelle qu'elle soit au système Google. Si vous effectuez des recherches concernant les logiciels de traduction, la reconnaissance optique de caractères ou tout autre domaine nécessitant de disposer d'importantes quantités de texte, n'hésitez pas à nous contacter. Nous encourageons pour la réalisation de ce type de travaux l'utilisation des ouvrages et documents appartenant au domaine public et serions heureux de vous être utile.
- + *Ne pas supprimer l'attribution* Le filigrane Google contenu dans chaque fichier est indispensable pour informer les internautes de notre projet et leur permettre d'accéder à davantage de documents par l'intermédiaire du Programme Google Recherche de Livres. Ne le supprimez en aucun cas.
- + *Rester dans la légalité* Quelle que soit l'utilisation que vous comptez faire des fichiers, n'oubliez pas qu'il est de votre responsabilité de veiller à respecter la loi. Si un ouvrage appartient au domaine public américain, n'en déduisez pas pour autant qu'il en va de même dans les autres pays. La durée légale des droits d'auteur d'un livre varie d'un pays à l'autre. Nous ne sommes donc pas en mesure de répertorier les ouvrages dont l'utilisation est autorisée et ceux dont elle ne l'est pas. Ne croyez pas que le simple fait d'afficher un livre sur Google Recherche de Livres signifie que celui-ci peut être utilisé de quelque façon que ce soit dans le monde entier. La condamnation à laquelle vous vous exposeriez en cas de violation des droits d'auteur peut être sévère.

## À propos du service Google Recherche de Livres

En favorisant la recherche et l'accès à un nombre croissant de livres disponibles dans de nombreuses langues, dont le français, Google souhaite contribuer à promouvoir la diversité culturelle grâce à Google Recherche de Livres. En effet, le Programme Google Recherche de Livres permet aux internautes de découvrir le patrimoine littéraire mondial, tout en aidant les auteurs et les éditeurs à élargir leur public. Vous pouvez effectuer des recherches en ligne dans le texte intégral de cet ouvrage à l'adresse <http://books.google.com>





**LES FORTUNES**

**ET**

**ADVERSITEZ**

# RARETÉS BIBLIOGRAPHIQUES

REIMPRESSIONS FAITES POUR UNE SOCIÉTÉ DE BIBLIOPHILES

A CENT EXEMPLAIRES NUMÉROTÉS :

*96 sur papier de Hollande  
et 4 sur Chine  
plus deux sur peau vélin.*

---

Exemplaire N<sup>o</sup> 91

---

---

GENÈVE. — IMPRIMERIE A. BLANCHARD.

1917/9  
a2058

1016 F56

L3

# LES FORTUNES

ET

## ADVERSITEZ


DE FEU NOBLE HOMME

JEHAN REGNIER

RÉIMPRESSION TEXTUELLE DE L'ÉDITION ORIGINALE

augmentée d'une Notice bibliographique

PAR M. PAUL LACROIX



GENÈVE

CHEZ J. GAY ET FILS, ÉDITEURS

1867





# NOTICE

SUR

## LES FORTUNES ET ADVERSITEZ

DE JEHAN REGNIER

---

L'abbé Goujet, qui avait eu le bonheur de se procurer un exemplaire de ce livre rarissime (cet exemplaire, un des trois qui existent encore, se trouve aujourd'hui à la Bibliothèque de la ville de Versailles), a consacré à Jehan Regnier une des meilleures notices, et des plus complètes que renferme la *Bibliothèque françoise* (tome IX, p. 324-344). Nous nous bornerions à réimprimer ici cette notice, si l'ouvrage de l'abbé Goujet n'était pas dans les mains de toutes les personnes qui s'intéressent à notre vieille poésie et à nos anciens poètes.

Peu de temps avant l'abbé Goujet, le savant abbé Lebeuf, avait aussi, dans ses *Mémoires concernant l'histoire ecclésiastique et civile d'Auxerre* (Paris, Durand, 1743, 2 vol. in-4°; voir

t. II, pages 287 et 290), parlé longuement de Jehan Regnier, bailli d'Auxerre, d'après le livre des *Fortunes et adversitez* de ce poète, alors presque inconnu et bien digne cependant d'être cité, lu et admiré à côté de ses contemporains, Charles d'Orléans et François Villon. Les deux pages que l'abbé Lebeuf a remplies de détails exclusivement biographiques sur Jean Regnier, ajoutent quelques faits nouveaux à la notice composée par l'abbé Goujet.

Malgré ces deux notices, écrites par deux hommes aussi versés dans l'érudition française, le nom de Jean Regnier était à peu près oublié, à cause de la rareté excessive du volume de ses poésies, lorsque M. le marquis de Gaillon, qui avait eu le bonheur de rencontrer ce volume à la Bibliothèque de Versailles, en a tiré une notice, à la fois historique et littéraire, très-bien faite et intéressante, qui fut insérée dans le *Bulletin du Bibliophile* (15<sup>e</sup> série, 1862, pages 741-760) et qui assigna enfin à Jehan Regnier la place qu'il mérite d'occuper parmi les poètes français du XV<sup>e</sup> siècle. Ce ne fut point assez, cependant, pour lui donner droit d'entrée dans les biographies générales.

La réimpression des poésies de Jean Regnier était désirée et attendue depuis longtemps, car ces poésies antérieures de trente ans à celles de Villon et dignes souvent d'être comparées à ces

dernières, manquaient à toutes les collections de vieux poètes, que les bibliophiles recherchent avec tant de curiosité. On ne connaît, en effet, que trois exemplaires de l'édition originale, et deux de ces exemplaires sont conservés dans des dépôts publics : à la Bibliothèque Impériale de Paris et à la Bibliothèque de Versailles. Le troisième exemplaire, que notre illustre bibliographe, M. Jacques-Charles Brunet, n'a pas eu l'heureuse chance de voir, pour le décrire dans le *Manuel du libraire*, n'a fait que passer à la vente de White Knights, en Angleterre, où il a été payé seulement 5 livres 19 schell., et l'on ne sait pas chez quel amateur il est allé s'enfouir, peut-être sans retour.

Nous avons eu sous les yeux, un moment, l'exemplaire de la Bibliothèque de Versailles ; c'est un petit in-8 de 145 ff. chiff., caractères gothiques, avec 5 gravures sur bois. Tous les biographes qui ont parlé de ce recueil lui ont donné un titre différent de celui qu'il porte, comme on pourra s'en convaincre, en comparant la description du *Manuel* avec la réimpression qui reproduit fidèlement l'original. Le volume a été imprimé sans doute en 1524, et non en 1526, puisque le privilège accordé au libraire Jean de la Garde est daté du 10 mai 1524 ; l'auteur Jehan Regnier, bailli d'Auxerre, était seigneur de Garchy et non de *Guerchy*.

Nous ne referons pas sa biographie; on la trouvera dans les trois ouvrages que nous avons cités plus haut : dans la *Bibliothèque française*, dans les *Mémoires concernant l'histoire d'Auxerre* et dans le *Bulletin du Bibliophile*. Cependant il est utile de préciser quelques faits et quelques dates de la vie de notre poète.

Jehan Regnier, seigneur de Garchy, terre noble à trois lieues d'Auxerre, était bailli de cette ville, pour le duc de Bourgogne, lorsqu'il tomba entre les mains du parti du roi, le 14 janvier 1431, ou plutôt 1432 (nouveau style). Il avait été attaché à la maison du duc Jean-Sans-Peur avant de passer au service de Philippe-le-Bon. Au moment où il devint prisonnier de guerre, il pouvait avoir environ quarante ans; il était marié à dame Isabeau Chrétien et il en avait un fils, déjà sorti de l'enfance. Dans sa jeunesse, il s'était mis à parcourir le monde; il avait visité non-seulement une partie de l'Europe, mais encore la Palestine, l'Arménie et d'autres contrées de l'Orient. Les gens d'armes, qui l'avaient pris sur les confins de la Normandie, le menèrent à Beauvais et le mirent à rançon. Il devait rester en prison, jusqu'à ce qu'il eût payé une somme de mille saluts d'or. Sur ces entrefaites, Charles VII, qui conservait contre lui un vif ressentiment, n'eut pas plutôt appris sa captivité, qu'il envoya le bailli de Senlis à Beauvais,

avec ordre de faire exécuter à mort le bailli d'Auxerre. Par bonheur, celui-ci avait des amis puissants dans le parti du roi : Poton de Xaintrailles, La Hire, Robert Floquet et d'autres s'interposèrent en faveur du malheureux Jehan Regnier et sauvèrent sa tête.

Le prisonnier avait hâte de se voir en lieu de sûreté ; il attendait sa femme et son fils avec une partie de sa rançon ; ils arrivèrent enfin au mois d'avril 1433 et ils obtinrent, en payant deux mille écus comptant, de rester en ôtage à la place de leur mari et père. Jehan Regnier espérait trouver quelqu'un qui consentit, moyennant finance, à tenir prison pour lui, jusqu'à ce qu'il eût rassemblé la somme nécessaire pour compléter sa rançon. Il obtint donc sa liberté provisoire, au mois de septembre 1433. Ses recherches à Gournai et dans plusieurs villes de la Normandie, furent vaines ; personne ne voulut, à prix d'or, aller se mettre à la place de la dame de Garchy et de son fils. Alors Jehan Regnier jugea plus sage de chercher l'argent de sa rançon et il vint en Flandre solliciter la libéralité du duc de Bourgogne, qui ne lui donna que peu de chose, outre les cent francs de gages qu'il touchait en qualité de bailli d'Auxerre. Jehan Regnier retourna donc à son poste, la bourse à peu près vide, et il engagea une partie de ses domaines pour pouvoir acquitter sa rançon et délivrer sa femme et son fils.

Ce fut pendant son séjour dans les prisons de Beauvais, qu'il écrivit en rimes le récit de ses *Fortunes et adversitez* ; il nous indique lui-même l'époque où il acheva ce livre :

A Beauvois, droit devant Saint-Pierre,  
Où je suis enfermé en pierre,  
En grant douleur, en grant servage,  
Dedans la tour de Beauvisage  
Enfergié en fers bien estrois,  
L'an mil quatre cens trente trois,  
En avril, du jour vingt six,  
Sur la pierre je suis assis,  
Où je fais la fin de ce livre,  
En attendant d'estre delivre.

Il s'était fait passer pour un *menestrier* et il composait des vers et de la musique pour les personnes qui l'en priaient et même pour ses géoliers. Telle fut l'origine de ses poésies qui sont, par conséquent, contemporaines de celles d'Alain Chartier.

Il vécut encore une trentaine d'années après sa sortie de prison, et il continua, du moins en certaines circonstances, à faire des vers. On trouve à la fin de son recueil une complainte sur la mort d'Anne de Chauvigny, comtesse de Joigny, qui mourut le 6 janvier 1456, et une ballade du duc de Nevers, datée de l'année 1463. On sait d'ailleurs que Jehan Regnier avait cessé de vivre en 1465 et que son neveu Guil-

laume de Montbleru lui avait succédé comme bailli d'Auxerre.

L'intérêt que présente le recueil de Jehan Regnier n'est pas seulement dans l'histoire de ses *Fortunes et adversitez*; ce recueil, qui témoigne d'ailleurs d'un talent réel et original, offre, à d'autres titres, plus de curiosité et d'importance que la plupart des poésies du XV<sup>e</sup> siècle; car c'est évidemment le prototype des deux *Testaments* de Villon. Nous ne doutons pas que Villon, lorsqu'il était sous le coup d'une condamnation capitale, dans les prisons du Châtelet de Paris, ou dans celles de l'Officialité de Meun-sur-Loire, ne se soit souvenu du livre de Jehan Regnier, et ne l'ait imité, en le surpassant, il est vrai. La situation des deux poètes était alors analogue, et la tournure de leur esprit avait une frappante analogie. Chacun d'eux se résignait à son sort avec une philosophie à la fois railleuse et mélancolique; l'un s'attendait à être pendu par ordre du roi Charles VII, l'autre se préparait gaiement à subir le même supplice; tous deux se rappelaient leurs péchés et en demandaient pardon à Dieu, en consacrant à la poésie leurs derniers moments.

Les points de rapport qui existent entre les *Fortunes et adversitez* de Jehan Regnier et les *Testaments* de Villon, n'ont pas échappé à l'abbé Goujet; mais il n'a point assez insisté dans la

comparaison qu'il fait des deux ouvrages et des deux poètes. L'abbé Goujet a de la peine à croire que le testament rimé de Jehan Regnier ait été rédigé sous la menace de la mort infamante qui semblait lui être destinée. « Un homme qui n'a que la mort devant les yeux, dit-il, et surtout une mort violente, ne se seroit pas amusé à décrire toutes les cérémonies qu'il voulait qu'on observât à ses funérailles, ni à plaisanter sur un sujet si grave. Il n'y a que Villon qui ait été capable de porter la plaisanterie jusque là. » Nous sommes loin de partager l'idée de l'abbé Goujet et nous pensons que le testament de Jehan Regnier, dans lequel on retrouve en germe la donnée et l'esprit des *Testaments* de Villon ; a été rimé, comme il le dit, la veille du jour fixé pour son exécution.

Ce n'est pas seulement ce testament qui a servi de modèle à Villon, ce sont les autres pièces, chansons, ballades, complaintes, etc. qui forment le recueil du prisonnier de Beauvais. On y remarque, comme dans le *Grand Testament* de Villon, une ballade à la Sainte-Vierge, une chanson à sa maîtresse, un rondel à une belle dame, une ballade que rappelle exactement celle des *Neiges d'antan*, etc. Les similitudes, les réminiscences sont plus caractéristiques encore, quand on compare vers à vers les deux poètes ; ce sont souvent les mêmes proverbes, les mêmes



dictons, les mêmes coupes de vers, les mêmes inspirations, le même style, la même langue. Il faut de nombreuses citations mises en regard les unes des autres pour faire toucher au doigt la ressemblance des deux poètes et des deux ouvrages.

Il suffit de citer ce huitain qui se trouve presque textuellement dans Villon :

Amy, il te le fault passer,  
Car tu es en trop dur passage ;  
Vueilles ton vouloir compasser,  
Ou autrement tu n'es pas sage.  
Tout homme convient trespasser,  
Tant soit grant, ne de fort corsage.  
Mais pour parler de repasser,  
Jamais tu n'en verras message.

Il suffit de citer la ballade dont le refrain est :

Dieu si vous doit honneur, santé, liesse.

La ballade qui se distingue par un dialogue si vif et si animé :

Amy sire, or me dis doucement ?

La ballade qui a fourni évidemment le refrain : *Il n'est bon bec que de Paris*, et qui roule sur cette équivoque égrillarde :

Qu'il n'est d'ouvraige que de Rains.

Voilà ce qui fait surtout la valeur littéraire de Jehan Regnier, lequel a été le précurseur, l'inspireur et souvent le modèle de François Villon; car on ne saurait mettre en doute l'antériorité de la composition des poésies de Jehan Regnier, qui a pris soin de les dater de la manière la plus rigoureuse. C'est en 1432 qu'il commença de les écrire dans les prisons de Beauvais; c'est en 1460 que Villon composa son petit *Testament* dans les prisons du Châtelet de Paris.

Il résulte de ce fait que les poésies de Jehan Regnier étaient connues de ses contemporains et qu'elles devaient jouir d'une espèce de renommée, pour que Villon se soit attaché à en imiter le sentiment, le caractère et la forme. Au reste, Jehan Regnier vivait encore, et l'on peut supposer qu'il avait lui-même donné communication de ses vers à Villon. Toutefois ce n'est que longtemps après sa mort que le manuscrit de ses poésies tomba en la possession de quelque ami des lettres, qui le fit imprimer pour être agréable à un parent de l'auteur, à noble homme messire Claude Le Marchant, chevalier, seigneur de Bouchet et élu d'Auxerre.

A cette époque, les œuvres de Villon, réimprimées dix ou douze fois, avaient acquis une éclatante célébrité; tout le monde les savait encore par cœur, à la cour comme à la ville, quoi-

qu'elles eussent déjà beaucoup vieilli ; mais elles furent effacées et bientôt oubliées, dès que Clément Marot eut créé une nouvelle école poétique. On s'explique ainsi comment le livre de Jehan Regnier, malgré sa valeur incontestable, a passé alors inaperçu, sans acheteurs et sans lecteurs. On ne voulait plus des vieux poètes, on ne les comprenait plus, et Clément Marot essaya en vain, pour les faire lire, de rajeunir le texte de Villon et le *Roman de la Rose*. Le nom de Jean Regnier resta donc absolument inconnu, en dépit de la publication posthume de son ouvrage ; cependant La Croix du Maine et Du Verdier, sieur de Vauprivas, n'ont pas négligé de l'inscrire dans leurs *Bibliothèques françoises*.

P. L.



# LES FORTUNES

ET

## ADVERSITEZ

DE FEU NOBLE HOMME

**JEHAN REGNIER**

ESCUYER EN SON VIVANT, SEIGNEUR DE GARCHY  
ET BAILLY D'AUCERRE

---

ILS SE VENDENT A PARIS

AUPRÈS DE LA PORTE DE LA GRANT SALLE DU PALAIS.

---

Cum privilegio



**DE PAR LE PREVOST DE PARIS  
OU SON LIEUTENANT.**

Il est permis à Jehan de la Garde, libraire juré de l'Université de Paris, faire imprimer ce petit livre jusques à deux ans à compter de la date qu'il sera parachevé de imprimer. Et deffend à tous imprimeurs ne le imprimer jusques apres les ditz deux ans passez, sur peine de confiscation des ditz livres et d'amende arbitraire. Fait le dixiesme jour de May mil cinq cens xxiiii. Signé RUZE.

## PROLOGUE

*adressant à noble homme Messire CLAUDE  
LE MARCHANT CHEVALIER, Seigneur du  
Bouchet et esleu d'Aucerre.*

Mon très honoré et redoubté seigneur, pensant en moy et préméditant à qui je pourroys ce présent livre dédier et adresser, l'œil de juste raison a regardé la resplendeur des vertus qui en vous sont infuses habondamment. Parquoy l'audace de mon petit courage a esté vous adresser ce petit livre contenant en soy plusieurs choses de recreation lequel composa jadis feu de bonne memoire noble homme Jehan Regnier, en son vivant, bailly d'Aucerre, luy estant prisonnier à Beauvais, lequel ainsi que ay entendu, estoit vostre parent en aucun degré. Lequel livre donc accepterez et prendrez en gré le vouloir de vostre humble petit serviteur obédient à tous voz bons vouldirs.



LES  
FORTUNES ET ADVERSITEZ  
DE  
JEHAN REGNIER

---

O Jesus qui te souffris pendre  
En la croix et ton corps estendre  
Ta chair percer ton coste fendre  
Pour nous racheter et descendre  
De voye de damnation  
Sire vueilles a moy entendre  
Je ten supplie de cueur tendre  
Car fortune si ma fait prendre  
Ne delle ue me puis deffendre  
Se de moy nas compassion.

A toy mon ame je veulx rendre  
En ta garde sans plus attendre  
Affin que desespoir nesclandre  
Ne la puisse en riens surprendre  
Ne la mettre a perdition  
Ung petit livre vueil emprendre  
De ma fortune sans mesprendre  
Pour passer temps et pour apprendre.  
Sire en bonne intention  
Donne moy sens de le comprendre.

## LAY.

Las en mon temps nay pas apris  
Ne entrepris  
A user en ceste maniere  
Mais fortune se ma surpris  
En son pourpris  
Si fort car il faut que je quiere  
Pour passer temps quelque matiere  
Necte et clere  
Si te supply toy de hault pris  
Que ne face avant narriere  
Riens que naffiere  
Ne chose dont soye repris.

---

Nulz homs ne doit estre oyseux  
A son povoir sçay je ouy dire  
Car cest ung des pechez de ceulx  
Des sept quon tient à peine pire  
Si me vueil prendre a escrire  
Pour passer temps aucunement  
Et en douleur me vueil deduire  
Par tout faut il commencement.

Combien que soye en destresse  
Et questre me fault en estant  
Car prison si est ma maistresse  
Dont je ne puis estre contant  
Mais neantmoins veulx faire tant  
Envers Dieu de tout mon sçavoir  
Que de moy ne soit mal contant  
Chascun doit faire son devoir.

En cest livre vueil racompter  
De ma fortune ung petit compte  
Qui la voudra ouyr compter  
Elle nest de duc ne de conte  
Et pource se je me mescompte  
Prenez en gre le mescompter  
Cest fort que homme face son compte  
Se de premier ne scet compter.

## RONDEL.

Puis que je vueil passer ce pas  
Bien adviser doy le passaige  
Et y entrer par bon compas  
Puis que je vueil passer ce pas  
Se je faulx je ne d'oubte pas  
Quon dira que ne suis pas saige  
Puis que je vueil passer ce pas  
Bien adviser doy le passaige.

A toutes gens je recommande  
Trestous mes dictz et tous mes faitz  
Et leur supply non pas commande  
Que se j'ay fait aucuns forfaitz  
Que par eux ils soyent refaits  
A trestous pardon je demande  
Amender vueil tous mes meffaitz  
Eu mes prisons naffiert qu'amende.

## LAY.

Encores prie je humblement  
Et doucement  
Tous ceulx qui rime sçavent faire  
Que si je faulx aucunement  
Ne nullement

Qui leur plaise à le refaire  
Là où je suis jay tant daffaire  
Sans meffaire  
Que je ne sçay pas bonnement  
Se mon œuvre sçauray parfaire  
Sans forfaire  
Dieu y mette bon finement.

Pareillement en l'écriture  
Si ne vous vueillez trop fier  
Car ma lettre nest que paincture  
Je ne sçay octograffier  
Je ne fuz oncques clerc greffier  
Point na este ma nourriture  
Neantmoins je my vueil affier  
Il na riens qui ne sadventure.

Se sçavoir voulez qui je suis  
Icy apres vous le sçaurez  
Combien toutefois se je puis  
A le trouver peine aurez  
Se querez mon nom trouverez  
Ceste chose si est certaine  
Faictes en ce que vors pourrez  
Nul ne scet riens sil ny met peine.

Icy mon nom je nommeray  
En tout le mieulx que je sçauray  
Hastez vous doncques de lentendre  
Advis mest que je le diray  
Ne plus ne moins je ny mectray  
Regardez se sçaurez comprendre  
En ung cuer qui est doulx et tendre  
Grant volente le fait apprendre  
Nee doubtez ainsi le sçaurez  
Il ny fault rien oster ne prendre  
En ce point ne pourrez mesprendre.  
Regardez se le trouverez.

Bien povez icy regarder  
A mon droit nom sans plus tarder  
De langage ne fault farder  
Lysez atraict et bellement  
Il ny fault riens contrelarder  
Du sçavoir ne vous puis garder  
Advisez pourquoy ne comment  
Veez a bon entendement.  
Croyez quil ny fault autrement  
Et avec le nom et surnom  
Reprendrez le lieu proprement  
Relatant mon gouvernement  
En office de grant renom.

CY COMMENCE LE PRISONNIER A PARLER  
DE SA FORTUNE.

Homme si ne se peult garder  
Se dit on de son aventure  
Par mon fait le puis regarder  
Une men est venue trop dure  
Et si la tenoye a seure  
Autant ou plus comme nes une  
Qui me peust certes courir seure  
Mais nul ne peult contre fortune.

Lan trente et ung et quatre cens  
Le quatorziesme de janvier  
Perdis partie de mon sens  
A lheure que fus prisonnier  
Car je nay maille ne denier  
Pour moy ravoir ne point de terre  
Par Dieu qui soit a engaiger  
Qui na argent il en fault querre.

Des compaignons de la freillye  
Fus rencontre en male estraine  
Ung dimenche dont chiere ly  
Ne puis faire sinon a peine  
Et fus mene en leur demaine  
Du hault dung boys en lhermitage  
Cecy si est chose certaine  
Faulte dargent fait bailler gaige.

Christofle Guillier me serroit  
Trestout au long de ce voyage  
Mais son mantel vestu avoit  
Dequoy depuis le tins a sage  
Car baille luy fut sur la naige  
Tel coup certes dune guisarme  
Le mantel luy fist advantage  
Du corps luy fust partie lame.

Par les compaignons fuz mené  
Trestout a pied par le bocquage  
Dieu scet se je fuz pourmené  
Jusques je fus en lhermitage  
La trouvasmes pain et fromage  
Cidre, cervoise largement  
Qui me fut trop mauvais breuvage  
Boire nen peuz aucunement.

Je faisoie le menestrie  
Pour trouver ma salutation  
Mais jestoye si fort lecie  
Que ce fut ma destruction  
Trouver ny peuz solution  
Pour avoir nulle delivrance  
Ne aucune remission  
Maintesfois si nuyt congnoissance

Et quant je veis que fus congneu  
Ainsi que les lettres lysoient  
Bien vy que seroye detenu  
Car les lettres trop macusoient

Pour ce les compaignons disoient  
Quilz avoient homme de hault pris  
Dequoy grant chiere ilz faisoient  
Il a bien chasse qui a pris.

De lhonneur tantost me fount tant  
Quant onyrent les lettres lyre  
Et leur sembloit que argent contant  
De mon corps les feroit desduire  
Et adonc je leur prins a dire  
La verite sans chanceler  
Dequoy ilz se prindrent a rire  
Verite ne se doit celer.

Les compaignons si me disoient  
Que je feisse tres bonne chiere  
Et que certes ilz me feroient  
Compaignie non pas trop chiere  
Pource faisoye la maniere  
Destre joyeux, fienster et rire  
Combien quil me tensist derriere  
Tel chante qui au cueur souspire.

Aussi fut prins Gaultier Talbot  
Avec Guillaume Sondonel  
Gaultier Talbot se eut dung bot  
De guisarme pas ne fut bel  
Car percee luy fut la pel  
Jusques a la chair durement  
Et fut puis prins Colin Pinel  
Qui nous donna esbatement.

Ainsi par fortune de guerre  
Nous fusmes prins deux bourguignons  
Et deux escuyers dangleterre  
Qui estoient gentilz compaignons  
A nous garder nous ne daignons  
Colin Pinel fondoit monnoye  
A Rouen or ne nous faignons  
Payer nous faudra la lemproye

Et adonc quant noz maistres virent  
Quilz avaient lors faicte leur charge  
Droit a Beauvais leur chemin prisrent  
Pour faire de nous leur descharge  
Point nous nallions le chemin large  
Errer nous convint toute nuyt  
A fort aller nul ne sestarge  
A tel feste nest pas deduyt.

Quant a Beauvais fusmes venus  
Dieu scet se fusmes bien logez  
De voller feusmes bien tenus  
Car nous fusmes bien enforgez  
Comme faulcons fut mis aux getz  
Et me fut dit tout doucement  
De ce lieu cy ne vous bongez  
Faire ne se peult autrement.

A Beauvais certes suis venu  
Pour payer de mon appatis  
Mieulx me vaulsist estre tenu  
A Rouen, je fus trop hastis  
En mauvais pre suis en patis  
Dieu me doint bonne delivrance  
Manger my fault du pain festis  
Il vaincq tout qui a pacience.

Combien que se je me plaignoye  
De la prison que je vous compte  
Certainement grant tort jauroye  
Et fusse roy, ou duc, ou conte  
Car on tint de moy ung grand compte  
Mais estrange mest la prison  
Aussi chascun dit et racompte  
Quil nest nulle belle prison.

Benedictus donis suis  
On doit Dieu de tout gracier  
Et pource tant comme je puis



De bon cueur le vueil mercier  
Mais je ressemble le mercier  
Qui va criant argent me fault  
Qui nen a il en fault chercher  
Homme ne meurt que par deffault.

Mes maistres ung jour sadviserent  
Quilz me mettroient a finance  
Et pource si me demanderent  
De mon estat de ma puissance  
Si leur dis en ma conscience  
De mon fait la verite toute  
Mais en riens ny eurent fiance  
Chanter me firent autre note.

Quant mes maistres au vray sçauront  
Mon estat et gouvernement  
Il me semble que ilz auront  
De moy pitie aucunement  
Je le croy ainsi fermement  
A ce jay aucun reconfort  
Se faire ne puis autrement.  
Il fault vivre jusque a la mort.

Pource mes maistres vous supplie  
Tant cour je puis par amytié  
Du nom de la vierge Marie  
Que vous ayez de moy pitié  
Et je suis prest et appointé  
De mettre mes biens en exil  
Voire encor plus la moytié  
On dit ultra posse nihil.

En mon temps jay trop peu pensé  
A amasser dont je suis nice  
Helas se jeusse amassé  
A present me fust bien propice  
Point nay pense a lavarice  
En honneur jay mis ma flance

Et disoye en ma premisses  
Envye est qui a chevance.

Mes maistres si me demandoient  
Dix mille salus de finance  
Drois et despens avoir vouloient  
Et les marcs qui est grant chevance  
Pas ne sçavoient bien ma puissance  
Mais avant quaye sauf conduit  
Ilz trouveront bien autre chance  
Il nest pas or queuct qui reluit.

Quant la parolle ouy dire  
Sachez qu'il me despleust moult fort  
Tant euz au cueur de dueil et dyre  
Que jesusse voulu estre mort  
Neantmoins je prins en moy confort  
Requerant Dieu qui est la hault  
Quil me donnast bon reconfort.  
Ung jour de respit cent solz vault.

Le prisonnier  
Qui na argent  
Est en dangier  
Le prisonnier  
Pendre ou noyer  
Le fait l'argent  
Le prisonnier  
Qui na argent.

Ha fortune la tres diverse  
Pour doulte de toy converser  
Je prenaye longue traverse  
Affin que ne peusse verser  
Mais tu mes venu traverser  
Par ta volente si perverse  
Que tout jus mas fait renverser  
Il nest charrette qui ne verse.

## BALADE.

Las jay en mon temps-trespasé  
Maint dangier, maint aventure  
Mais je me tiens pour trespasé  
Car ceste cy passe mesure  
Point ne convient que je mexcuse  
Car folement fis lentreprise  
Parquoy convient que je lendure  
Tant va le pot a leue quil brise.

Se jeusse mon fait compassé  
Et advisé la voye seure  
Hélas point ne fusse passé  
Par voye que fust tant obscure  
De compaignie navoye cure  
Qui fut bien cause de ma prise  
Pour ce en ay douleur tres dure  
Tant va le pot a leue quil brise.

Tant dolent suis et tant lasse  
Que du tout je me deffigure  
Car oncques riens je namasse  
Pour moy oster de ceste ordure  
Saucune bonne creature  
A mon povre fait se navise  
Ce sera ma desconfiture  
Tant va le pot a leue quil brise.

Prince roy des cieulx or procure  
Pour moy se ta main ny est mise  
Icy sera ma sepulture  
Tant va le pot a leue quil brise.

En attendant mon bien ou mal  
Mettre me vueil a Dieu prier  
Affin que du tres grant travail  
Ou je suis me vueille vuider

De ce le vueil je supplier  
Tres humblement bien l'appartient  
Le monde me fault oublier  
Bonne parolle bon lieu tient.

COMMENT LE PRISONNIER SE COMPLAINTE A  
DIRE PAR MANIERE DORAISON.

O roy des cieulx ou roy de gloire  
O puissant roy de magesté  
Sire vueilles avoir memoire  
De moy par ton humilité  
Pecheur je suis, cest verité  
Dire je ne puis le contraire  
Mais se dicy je suis gecté  
Jay bon vouloir de moy retraire.

Vray Dieu se vray que requérir  
Je tay esté ou passion  
Pour moy racheter voulz souffrir  
Ayes de moy compassion  
En lieu suis de perdition  
Se tu ne me viens secourir  
Se de toy nay salvation  
Il me convient icy mourir.

Sire ne vueilles prendre garde  
A mes pechez na ma folie  
Mais en pitié si me regarde  
De tres bon cueur je ten supplie  
En dangier je suis de ma vie  
Se tu ne me metz en ta garde  
Je nay bien heure ne demye  
Tant estre hors dicy me tarde.

## LAY.

Se fortune si ma fait prendre  
Et surprendre  
Sans attendre  
Ne me vueilles habandonner  
Mais te plaise moy reprendre  
Et deffendre  
De cuer tendre  
Las vueilles moy tout pardonner  
Grace si me vueilles donner.  
Sans tarder  
Ne fuier  
Que ta grace puisse emprendre  
Sans elle je ne puis durer  
Sejourner  
Nendurer  
A la mort il me convient rendre.

## LAY A NOSTRE DAME.

Vierge de tres hault arroy  
Mere du souverain roy  
Ayez de moy souvenance  
Car doubtaunce  
Si me tient en sa balance  
Mourir me fauldra se croy  
Dame ayez pitié de moy  
Car pour vray  
Jay en vous tant de fiance  
Et creance  
Trop seray en mal couroy  
Et desroy  
Se ny mettez diligence.

## LAY.

Vierge pucelle  
Vous estes celle  
A qui confort  
Mon cueur appelle  
Bonne nouvelle  
Car a grand tort  
Dangier moult fort  
Me fait effort  
Par sa cautelle  
Je me tiens mort  
Se reconfort  
Nay de vous belle.

O doulce vierge Marie  
Je te prie  
Et supplie  
Que ton filz veuilles prier  
Que de ceste maladie  
Que je crye  
Ne soublye  
A moy venir ayder  
Qui suis povre prisonnier  
Supplier  
Et crier  
Ne cesseray en ma vie.

O vierge je te requier  
De cueur chier  
Sans targer  
Ma priere soit ouye.

## LAVE MARIA QUE LE PRISONNIER FIST.

Ave vierge je te salue  
Maria car tu es la nue

Gratia de bonte tres plaine  
Plena fus a la descendue  
Dominus se print sa venue  
Tecum pour prendre chair humaine  
Benedicta, tu es fontaine  
In mulieribus, certaine  
Et par ce dois estre congneue  
Benedictus hors de la peine  
Fructus ventris tui, me meine  
Jesus amen, a mon yssue.

Glorieux saint Michel lange  
Ne me vueillez oublier  
Et saint Gabriel larchange  
Vueillez Dieu pour moy prier  
Jay de vous tous grant mestier  
En prison suis trop estrange  
Mourir me fault prisonnier  
Se Dieu si ne me revenge.

Glorieux saint Jehan Baptiste  
De qui le droit nom je porte  
Et saint Jehan levangeliste  
Vueillez vous deux dune sorte  
Prier Dieu qui me conforte  
Et me douint allegement  
De ceste prison trop forte  
Ou mourir me fault briefvement.

Saint Pierre et saint Andry  
Saint Jehan, saint Barthelemy  
Saint Jaques et saint Phelippe  
Saint Pol qui fus chevalier  
Et saint Thomas bon ouvrier  
Qui prist de Dieu la suite  
Parmy les desers degypte  
Faictes que je soye quicte  
Plaise vous luy supplier  
Que par son tres grant merite

De ceste prison me gite  
Qui suis povre prisonnier.

Sainct Simon, saint Barnabé  
Ne mayez en oubliance  
Sainct Luc, saint Marc, saint Mathé  
Sainct Jude que par science  
De la divine puissance  
Fustes le monde prescher  
Priez Dieu que delivrance  
Luy plaise moy avancer.

O glorieux saint Estienne  
Qui fus le premier martir  
Je te prie quil te souviengne  
De moy dicy departir  
Tant de mal me fault sentir  
Et suis en tel pestilence  
Que lame sen veult partir  
Se brief je nay delivrance.

O monseigneur saint Laurent  
Saint Mor, saint Sebastien  
Saint George et saint Vincent  
Saint Blaise et saint Fabien  
Saint Cosme et saint Damien  
Saint Eusebe et saint Hylaïre  
Et saint Denys aussi bien  
Veuillez moy dicy hors traire.

A monseigneur saint Gervais  
Me recommande humblement  
Et monseigneur saint Prothais  
Tant com je puis chierement  
Saint Christoffe vraiment  
Qui portas le noble roy  
Priez les tous doucement  
Que il ait pitié de moy.



O monseigneur saint Germain  
Jadis fus conte daucerre  
Nuyt et jour, soir et matin  
Vueillez Dieu pour moy requerre  
Car je suis ne de la terre  
Et de Dieu ne met la main  
La mort vient a moy grant erre  
Avant ennuyt que demain.

Saint Martin, saint Nicolas  
Saint Thibault et saint Sevestre  
Vueillez moy oster des latz  
Et saint Claude mon doulx maistre  
Trop las je suis dicy estre  
Crier il me fault helas  
Priez Dieu que de cest estre  
Moste pour avoir soulas.

Saint Symeon, saint Morice  
Saint Loys, saint Marian  
Priez Dieu par bonne guise  
Saint Mamer, saint Julien  
Saint Aymé, saint Pelerin  
Et saint Yves sans faintise  
Saint Amatre, saint Albin  
Delivrez moy de ma prise.

O saint Ladre qui de mort  
Dieu si vult ressusciter  
Envers luy fais ton effort  
Dicy me vueille gecter  
Et je te iray visiter  
A Avalon je me fais fort  
Ce mal ne puis plus porter  
Se nay aucun reconfort.

Maintenant vueil requerrir  
Saint Lyenard devotement  
Cest celluy qui secourir

Veult prisonniers doucement  
Si luy supplye humblement  
Qu'il luy plaise de sa grace  
Prendre en gré paciemment  
Quelque chose que je face.

O saint Lyenard a qui donnée  
Fut de Dieu grace et accordée  
Pour tous prisonniers racheter  
Je te prie en ceste journée  
Ta grace soit sur moy monstrée  
Et me vueilles dicy gecter  
Las tant de mal me fault porter  
Que je ne le puis supporter  
Navoir ne puis longue durée  
Se tu ne me fais apporter  
Nouvelles pourquoy transporter  
Je me puisse en ma contrée,

Tu as par tout la renommée  
Tes miracles l'ont approuvée  
Et pource nul nen doit doubter  
Du monde na prison fermée  
Tant soit forte ne enserrée  
Que bien ne ty saches bouter  
Pour les prisonniers conforter  
Or vueilles donc sans demourée  
Que ta grace me soit monstrée  
En pitié me vueilles escouter  
Ta priere soit eslevée  
Lassus aux cieulx et exaulcée  
Pour moy venir reconforter.

O saint Lyenard  
Ayez regard  
Bien a mon fait.  
Le cuer me part  
Et si my art  
Trop mal me fait.

Se jay meffait  
Aucun meffait  
Dout Dieu me gard  
Il men deplait  
Du cueur parfait  
Et tost et tard.

## LAY.

Je fais veu de bon courage  
Que voyage  
Je feray a ton ymage  
Se a Aucerre puis venir  
Pour toy rendre vray hommage  
Et truage  
Se me fais tel avantage  
Bien men devra souvenir  
Nul ne me scauroit tenir  
Que servir  
Du droit lieu et requérir  
De Corbigny bien le sçay je  
Je ne taille sans faillir  
Sans mentir  
Se je devoye mourir  
A pied feray le message.

Glorieuse dame sainte Anne  
Mere de vierge couronnée  
Qui portas la fleur et la manne  
Dont mainte ame sera sauvée  
Toy et ta fille honorée  
Priez vostre filz sans actente  
Que par vous deux soit délivrée  
Ma grief prison de ceste sente.

O Maries qui achetastes  
Le tres precieux oingnement  
Duquel le corps Jesus lavastes

Et oingnistes moult doucement  
Priez le pour moy humblement  
Aussi vrayement que vous lalastes  
Puis visiter au monument  
Duquel lieu pas ne le trouvastes.

Lange dist a vous surrexit  
La pierre veistes revolue  
Du lieu duquel Jesus yssit  
Dont nostre foy fut soustenue  
En Galilée si fut veue  
La vraye resurrection  
Priez toutes que descendue  
Soit sur moy sa remission.

O gloriense Magdalene  
A qui Dieu veult tant pardonner  
Repentance euz si certaine  
Que Dieu ne veult habandonner  
Or vueilles donc pour moy pener  
A moy oster de ceste peine  
Graces je ten iray donner  
A Vezelay en ton demaine.

O vierge sainte Catherine  
Qui es au mont de Synay  
De prier nuyt et jour ne fine  
Dieu pour moy qui suis esbahy  
Car fortune si ma trahy  
La mort le cueur trop fort me myue  
Mais que de Dieu ne soye hay  
Je ne quiers autre medecine.

O Marie legiptienne  
Sainte Agnes, sainte Crestienne  
Sainte Elizabet, sainte Marthe  
Sainte Colombe, sainte Eugene  
Sainte Luce, sainte Helene  
Sainte Apoline et sainte Agathe

Chascune pour moy se combate  
Que fortune plus ne me hate  
O Geneviefve et sainte Avoye  
Priez Dieu que il me rachate  
Et quil me garde de la pate  
De lennemy et de sa voye.

O vierge sainte Marguerite  
Qui si tres noblement respondre  
Voultes a la gent sarrazine  
Pour leur mauvaise loy confondre  
Suppliez Dieu que de lencombe  
Ou je suis bien tost si me gicte  
Et vous mettez toutes du nombre  
Faictes devant Dieu ma poursuyte.

O tous les saintz de paradis.  
Et les saintes assemblement  
Tant com je puis en faictz et ditz  
Je vous supplie humblement  
Priez Dieu pour moy doulcement  
A le prier soyez hardis  
Quavoir puisse a mon finement  
La gloire qui dure tous dis.

COMMENT LE PRISONNIER SE COMPLAINTE  
APRES SA PRIERE FAICTE.

Oicy longuement demourer  
Je suis trop bien en adventure  
Mal endurant ne peult durer  
Et pource fault-il que jendure  
Fain et soif, et chault et froidure  
Ainsi quil viendra sans muser  
Combien que la chose soit dure  
Qui veult vivre fault endurer.

## FATRAS.

Endurer, endurer my fault  
Mal endurant ne peult durer  
Endurer, endurer my fault  
Alloit cryant ung grant jarfault  
Qui des cailloux faisoit muser  
Pour les gecter a ung assault  
Qui fut failly par le deffault  
Dung chat qui devoit procurer  
Que pierre et gres a escurer  
Feussent fromage mol et chault  
Mais le rat dit, qu'il ne luy chault  
Et a ce se vint opposer  
La souriz si vint proposer  
Ung preschement en ung chaffault  
Qui dist au peuple tout en hault.  
Mal endurant ne peult durer.

Chascun peult bien appercevoir  
Sans ce que je le doive dire  
Que fortune fait son devoir  
De moy mettre a grief martyre  
Car du tout si me veult destruire  
En moy demandant grant avoir  
Et point nen ay qui est du pire  
Ce sera fort que de lavoir.

Helas jay usé ma jeunesse  
A vivre si joyeusement  
Et il faudra quen ma vieillesse  
Vive en peine et tourment  
Et que je perde esbatement  
Joye, soulas avec lyesse  
Ou jay prins mon nourrissement  
Aspiron enuis ou delaisse.

Or me fault il prendre congé  
 De lyesse sans plus attendre  
 Dont jay le cueur trop fort chargé  
 Advis mest quon le doye fendre  
 Car je nay riens pour moy deffendre  
 Mes joyes toutes si se partent  
 Je nen puis plus il me fault rendre  
 Amours trop enuis se departent.

## LAY.

A Dieu lyesse  
 Dueil et tristesse  
 Me fait dangier et grant tourment  
 Car il me blesse  
 Par tel destresse  
 Que vivre ne puis longuement  
 Solagement  
 Aucunement  
 Je nay du mal qui tant me presse  
 Presentement  
 Certainement  
 Fortune trop mal si madresse.

A dieu mes orgues qui sont belles  
 A dieu, or a dieu vous commant  
 A dieu fleustes, a dieu vielles  
 A dieu ung chascun instrument  
 Que je tenoye chierement  
 Pour mon tresor et ma mout joye  
 A dieu vous dy presentement  
 Il nest tresor que davoit joye.

Cuydez vous quant je me recorde  
 Que mes harpes sont descordées  
 La ou ne souloit faillir corde  
 Tant estoient bien accordées

Advis mest que jay encordées  
Les mains tant suis en grant discorde  
Après ces choses recordées  
Je nattens plus misericorde.

LAY.

Homme nest de tel parage  
Du lignage  
Du corsage  
Qui soit sage  
Se en fortune se fie  
Car elle est si tres sauvage  
En courage  
Sans langaige  
Que cest raige  
On lappelle fol si fie  
Car personne ne deffie  
Mais espie  
La partie  
Endormye  
Pour lavoir a lavantage  
A lung vaudra seigneurie  
Baronnye  
Courtoysie  
En sa vie  
A lautre si fait dommage.

LAY.

Las a elle ne pensoye  
Ne songeoye  
Mais ainsi que men alloye  
Par la voye  
Elle me fist espier



Riens de mal je ne disoye  
Ne faisoye  
Car lyesse au cuer avoye  
Grant mout joye  
Dont jay maintenant mestier  
Car dangier  
Si me detient prisonnier  
Tout plauier  
Bien vouldisse estre en la voye  
Au fort Dieu est droicturier  
Ayder  
Me peult se suis en dangier  
Supplier  
Doulcement je len vouldroye.

## LAY.

Fortune qui est si sainte  
Si sacointe  
Tousjours du bien ou du mal  
Lung ou lautre si appointe  
Par attaincte  
A joye ou a travail  
Soit homme destat royal  
Du vassal  
Se sa roue la enceinte  
Il ny a ne mont ne val  
Ne cheval  
Qui le gard davoir la pointe

## LAY.

Las sa roue a tournée  
Et virée  
Certes sur moy durement  
Ma joye en est muée  
Et changée

A peine et a tourment  
Mais espoir si doucement  
Me command  
Que de moy soit escoutée  
Sa pensée  
Et ma dit certainement  
Que briefment  
Ma douleur sera finée.

COMMENT UNG POURSUYVANT APPORTA DES  
NOUVELLES AU DIT PRISONNIER  
DONT IL FUT JOYEULX.

Espoir mest venu conforter  
Pource quil ma fait apporter  
Par ung poursuyvant des nouvelles  
Pour moy ung peu reconforter  
Et ma grant douleur supporter  
Dieu les me doint bonnes et belles  
Et quelles puissent estre telles  
Sans mal engin et sans cautelles  
Par qui jaye delivrance  
Helas, helas celles estoient telles  
Bien venroient les damoyselles  
Chascun si vit en esperance.

Ledit poursuyvant si parla  
A mes maistres tres tous ensemble  
Mon terme si en recula.  
Jusques a Pasques se me semble  
Mais de grant paour le cueur me tremble  
Tant doubte que quant serons la  
Que aucun mon fait ne dessemble  
Par forfait deça ou dela.

Christofle je feis en aller  
Avecques ledit poursuyvant

Afin que il sceust mieulx parler  
De mon estat et plus avant  
Car il le mavoit en convant  
De revenir et de laller  
Bien verray sil tiendra couvent  
Ou se il vouldra reculer.

Sil le tient il fera que sage  
Et que fol sil ne le tient mye  
Car je suis demeuré hostaige  
Et pource feroit il folie  
Quant est a moy en luy me fie  
Mais je faiz veu de bon courage  
Que une fois luy tauldray la vie  
Sil ne vient acquiter son plaige.

Une nuyt espoir me trouva  
En mon lict ou pas ne dormoye  
Et me dit quant il arriva  
Esperance a toy menvoye  
Au surplus que je me devoye  
Conforter et le me prouva  
Bien louy et si sommeilloye  
Or escoutez comment il va.

Je lentendy se me sembla  
Et si le prins a regarder  
Le cueur ung peu si me troubla  
Oncques je ne men sceuz garder  
De louyr me devoit tarder  
Mais je ne sçay qui maffubla  
Je ne me peuz contregarder  
Que tantost apres si sembla

Son langaige estoit haultain  
Bien jentendy ce quil disoit  
De ce quil dit je suis certain  
Et de tout ce quil devisoit  
Dire vueil ce quil racomptoit

Car pas ne parloit en latin  
Or escoutez ce que cestoit  
Je lescripvís au plus matin.

CY APRES ORREZ LA BALADE QUE ESPOIR  
APPORTA AUDIT PRISONNIER.

Amy affin quil te souviengne  
De moy espoir, et que te tiengne  
A toy menvoye esperance  
Affin que ton cueur si ne preigne  
Desplaisir dequoy il mespreigne  
Envers Dieu qui a la puissance  
De toy envoyer allegance  
Se tu veulx faire diligence  
A le prier de ta besongne  
Après de luy recongnissance  
Et du surplus ne fais doubtañce  
Quil nest nul mal dont bien ne viengne.

Pense tu point quil appartiengne  
Et que servir Dieu te conviengne  
Tu lavoys mis en oubliance  
Il nest si bon qui ne mespreigne  
Or fais que ton cueur se revienigne  
A bon vouloir et repentance  
Mieulx te vault estre a ceste dance  
Quattendre de Dieu la sentence  
Et avant que la mort testrange  
Que tu faces ta penitence  
Et pource ayes congnoissance  
Quil nest nul mal dont bien ne viengne

Or garde bien que quil adviengne  
Que doucement tu te maintiengne  
Prends en gre et en patience  
Il nest si sage quon nenseigne

Tu en as ici belle enseigne  
Tu le vois par experience  
Pense a Dieu, a ta conscience  
Sans point avoir impacience  
Importunité ne vergongne  
Tu as ta part des biens de France  
Prendre les te fault en souffrance  
Il nest nul mal dont bien ne viengne.

Or requier a Dieu audience  
Et des saintz fais ton alliance  
Affin que chascun te soustiengne  
Belle chose est dobedience  
Mais tiens de moy telle science  
Quil nest nul mal dont bien ne viengne.

COMMENT LE PRISONNIER SE REJOUYST DES  
NOUVELLES QUE ESPERANCE LUY A  
ENVOYÉES PAR ESPOIR.

Espoir ma moult reconforté  
Et resjouy en petit d'heure  
Mon cueur estoit si tourmenté  
Je lavoye plus noir que meure  
Si prie a Dieu quil me sequeure  
Selon sa bonne volenté  
Sans faire si longue demeure  
Car pource est qui na santé.

Puis que espoir si me asseure  
Que bon confort si maydera  
Une chanson vueil par mesure  
Faire qui me confortera  
Sçavez pour qui on la fera  
Pour la tres douce creature  
Ou mon cueur si est et sera  
Dieu si luy doint bonne adventure.

**CHANSON EN RONDEL QUE LE PRISONNIER  
FIT POUR LAMOUR DE SA FEMME DE  
JOYE QUIL EUT DE ESPERANCE.**

Courroux dangier avec tristesse  
Ont mis mon cuer hors de lyesse  
Et si mont prins si durement  
Par fortune qui faulcement  
S<sup>i</sup> leur a baille la deesse  
Chascun des trois me point et blesse  
Par leur rigoureuse rudesse  
Jusques au cuer si asprement.  
Courroux, dangier, etc,

Mon cuer de souspirer ne cesse  
Tant craint le dueil de ma maistresse  
Quelle seuffre et que le tourment  
Selle scet mon gouvernement  
Bien scay quel mourra de destresse  
Courroux, dangier, etc.

Puis que a chanter me suis prins  
Pour si peu point ne me vueil taire  
Affin que ne soye reprins  
Autre chanson vueil encor faire  
A nul si men vueille desplaire  
Se je prens en moy reconfort  
Car en riens ne cuyde meffaire  
Ce nest riens que ne fait plus fort.

**AUTRE CHANSON.**

Fortune bien te dois mauldire  
Quant tu me cuydes departir

De celle dont mon cuer partir  
Neouldroit pour riens qu'on sceust dire  
Tu me fais souffrir grief martyr  
Et me fauldra mourir martyr  
Fortune bien, etc.

Jay le cuer plain de dueil et dire  
Parquoy ne se peult espartir  
Nous ne voulons noz biens partir  
Vaten Dieu te vueille conduire.  
Fortune bien te dois mauldire, etc.

Encores fault il que je die  
Une chanson pour abreger  
Pour porter a ma doulce amye  
Pour son tres doulx cuer allegier  
Pensée sera messagier  
Qui point ne poyse une oublye  
Il en yra plus de legier  
Car qui bien ayme a tard oublye.

#### AUTRE CHANSON.

Tenez moi pour excusé  
Se ne vous voy ma doulce dame  
Car prisonnier suis par mon ame  
Fortune si ma abusé  
Car a dangier ma accusé  
Par Dieu elle est mauvaise femme  
Tenez moi pour excusé.

Courroux si ma le corps usé  
Mon corps en art plus fort que flame  
Espoir veult que pitié reclame  
Selle ne sera refusé  
Tenez moy pour excusé.

COMMENT LEDIT PRISONNIER RESCRIPT UNE  
LETTRE PAR PENSÉE A SA FEMME.

Belle puis que jay delay  
Et loysir de vous escripre  
Envoyer vous veulx ung lay  
Pour passer vostre martyre  
Je sçay bien que lavez pire  
Dix fois plus que je ne lay  
Dont mon cueur plainct et souspire  
En faisant ce virelay.

Ma compaigne tres bien aymée  
Nuyt et jour je suis en pensée  
Comment je vous puisse rescripre  
Pour vous oster hors du martyre  
Duquel pour moy estes navrée.

Ma doulenr point ne finera  
Se je ne sçay certainement  
Quant la vostre si cessera  
Et que soyez hors de tourment.

Soyez en voz faictz attrempée  
Ne vueillez estre courroucée  
Car vostre douleur trop mempire  
Nuyt et jour mon cueur en souspire  
Tant estes de moy désirée.  
Ma compaigne, etc.

Ne doubtez point Dieu maydera  
Mon espoir y est fermement  
Et sil luy plaist on vous dira  
Bien grief de mon fait largement.



Soyez en vous reconfortée  
Priant la vierge couronnée  
Que nostre fait vueille conduyre  
Garder que de courroux ne dyre  
Vous ne soyez trop empeschée  
Ma compaigne tres bien aymée.

**AUTRES LETTRES QUE LEDIT PRISONNIER  
RESCRIPVOIT A SA FEMME PAR PENSÉE.**

Je vous prie porter paciemment  
Sans vous troubler le cueur aucunement  
A Dieu prier vous mettez doucement  
Bonne parolle en tout temps bon lieu tient  
Esperance en vostre entendement  
Ayez toujours a Dieu tant seulement  
Vostre vouloir ne prenez autrement  
Contenez vous comme il appartient.

Regraciez Dieu de tout humblement  
Et ne prenez point impaciemment  
Se fortune si ma mis en tourment  
Tout plaist a Dieu, endurer le convient.  
Je lendure tres debonnairement  
En gre je prans tout son commandement  
Ne ploiez plus, prenez ce quil advient  
En attendant de Dieu le jugement.

**LAY.**

Ma douce seur souveraine  
Tres certaine  
Porter ne pourrez la peine  
Qui vous maine

Se Dieu si ne vous deffend  
Car vous estes tant humaine  
Et mondaine  
Et courroux si vous pourmaine  
Et ramaine  
Si grosse questes denfant  
Quant gy pense je nay veine  
Que ne soit pleue  
De douleur est ma fontaine  
Trop villaine  
De desconfort le cuer me fend  
Fortune en son demaine  
Nous demaine  
Requerons joye haultaine  
Qui est saine  
Fol est qui vers Dieu offent.

## LAY.

Helas convient il par les faitz  
Que en ma vie jay faitz  
Et forfaitz  
Par voulente ou par fait  
Que jay fait  
Que vous en ayez a faire  
Et que vous portiez les faitz  
Que ne sçavez contrefaitz  
Com je faitz  
Avist mest que cest mal fait  
Et tort fait  
Las comment se peult il faire  
Si fault que soye deffaitz  
Pour moy pugnir des meffaitz  
Imparfaitz  
Ou vous navez riens meffait  
Ne forfait  
On ne peult trop bien deffaire

Car de mes maux suis confes  
Mais voz vouloirs sont parfaits  
Et refais  
Sans nul estre contrefait  
Ne infait  
Dont on ne vous doit meffaire.

## RONDEL.

Belle, bonne, douce, bien faicte  
Qui nestes en riens contrefaicte  
Pour mal que fortune me face  
Vostre vouloir ne se mefface  
A moy aymer soyez parfaicte.

Et garder que soyez deffaicte  
Par nes ung moyen, ne infaicte  
Vostre couleur ne vostre face  
Belle, bonne, etc.

Vostre amour point si nest meffaicte  
Ne oncques si ne fut forfaicte  
De bien en mieulx Dieu la parface  
Cest cil qui efface et defface  
Sa volente si en soit faicte  
Belle, bonne, douce, bien faicte, etc.

## FATRAS.

Belle, bonne, douce, bien faicte  
Faisoit jouer de la musette  
Devant elle une lymasse  
A ung chapperon sans cornette  
Ou il pendoit une sonnette  
Et chevauchoit une ramasse

Ung bouc qui avoit une masse  
Menoit dedans nne brouette  
Lhostel de la porte barbette  
Parmy Paris a saint Eustace  
En allant dist à la grimasse  
Ne vous troublez gente gorgette  
Qui nestes en riens contrefaict  
Pour mal que fortune me face.

LAY.

Pour la grant conduite  
Dont vous estes duicte  
Mon cuer se delite  
Et en vous habite  
Ne jamais nen partira  
Je vous ay eslite  
En mon cuer escripte  
Vostre amour profite  
Par vostre merite  
Chascun le dit et dira  
Fortune despite  
Soit de Dieu mauldicte  
Qui ma mis en fuyte  
De joye petite  
Dont mon cuer le mauldira  
Or faictes poursuyte  
Sans estre destruite  
Que je soye quicte  
Dicy on me gite  
Et mon cuer vous servira.

LAY.

Puis le jour que vous euz veue  
Du premier, et apperceue

Ma volente fut esmeue  
De vous tenir ma maistresse  
Par la tres grande noblesse  
Qui par moy fut recongneue  
Que en vostre cueur estoit  
Car quant je veiz vostre veue  
Et loeil qui ne se remue  
Sans point estre dissolue  
Mon cueur si eut tel largesse  
De joye et de lyesse  
Ma volente fut pourveue  
Que a peine le portoit.

Pas ne fustes esperdue  
Par vous me fust respondue  
Responce de grant value  
Qui damours furent ladresse  
Vous et moy feismes promesse  
A nous deux seulement sceue  
Qui mon cueur reconfortoit.

En tel temps fustes esleue  
Ma dame de grant value  
Sans point estre mescongneue  
Je vous tiens pour ma deesse  
De souhaicter ne vous cesse  
A vous fut mamour rendue  
Pour le bien quelle y sentoit.

Et quant vous euz bien congneue  
Et avecques moy tenue  
De meilleur dessoubz la nue  
Ne de la plus grant proesse  
De bien, dhonneur, de richesse  
Ne qui moins fust esperdue  
A mon gre certes nestoit.

Se ma volente fut menee  
Et de joye despourveue

Dont vous eussiez apperceue  
Ma douleur ou ma tristesse  
Qui ores le cueur me blesse  
De plaisir estiez pourveue  
Qui bien me reconfortoit.

Mais fortune la chenue  
Nous a de ce coup deceue  
Car faulcement ma vendue  
Et ma livre a rudesse  
Parquoy de vostre largesse  
Ne me sera secourue  
Se Dieu peine ny mettoit.

## LAY.

Puis que fortune ma prins  
Et surprins  
Par sa mauvaise entreprinse  
En soy prinse  
Trestout en gre nous fault prendre  
Pource belle de hault pris  
Se suis pris  
Si ne faictes pour ma prinse  
Nul emprinse  
Dont vous soyez a reprendre  
Ce qui sera entreprins  
Et comprins  
Par voz amys, ce je prise  
Sans reprise  
Vous le povez entreprendre  
Vous avez sens bien aprins  
Non reprins  
Si faictes que bien aprinse  
Non surprinse  
Si serez et sans mesprendre.

## LAY.

Mon cuer se plaint et souspire  
Tant est plain de dueil et dyre  
Advis mest quon le dessire  
Car je ne sçay a qui dire  
    Mon martyre  
Et encores lay je pire  
Que ne me povez escripre  
Lettre que je puisse lyre  
Pour ung peu mon cuer deduire  
    Et conduire  
Sçavoir encores plus desire  
De vostre estat sil empire  
Ce seroit pour moy destruire  
Et de tous pointz desconfire  
    Et occire  
Si prie a Dieu nostre sire  
Car cest le souverain mire  
Joye vous vueille reduire  
Tant quil vous doive souffire  
    Sans mesdire  
Et me vueille raconduire  
Au droit chemin et conduire  
Pour aller vers vous de tire  
Sans le vouloir contredire  
    Ne desdire.

## LAY.

Belle en gre tout prenez  
Car envers Dieu mesprenez  
Se vous faictes le contraire.  
Vostre vouloir reprenez

Endurez et apprenez  
Et riens si nentreprenez  
Qui a Dieu doit desplaire  
Se bien luy voulez complaire  
Son amour si retenez  
Du tout a luy vous tenez  
Saintz et saintes detenez  
Car ainsi vous fault il faire  
Vous et moy pourriez deffaire  
Se courroux vous nabstenez  
Mais se bien vous maintenez  
Et doucement contenez  
Grace Dieu pourrez attirer  
Parquoy me pourrez retraire  
Dicy se lentreprenez.

## LAY.

Ma seur pensez de vous premierement  
De noz enfans aussi songneusement  
Dieu si nous doint a tous amendement  
Car cest celluy qui le monde soustient  
Se je demeure plus icy longuement  
En bien brief sera mon trespasement  
Pour la douleur qui me tient durement  
Mon cuer se part et ne sçay quil devient  
Si vous supply que de mon testament  
Que vous baillay a mon departement  
Vous en faciez bon accomplissement  
Trestout ainsi que lescript le contient  
Je prie a Dieu, qui fist le firmament  
Que mon ame garde de dampnement  
Car je doute trop fort le jugement  
De mon ame se Dieu ne la retient  
Ma compaignie de cuer piteusement  
A Dieu vous dy, or a Dieu vous command  
Le cuer me part quant de vous me souvient  
Icy mon lay si fait soi finement.



## COMMENT LEDIT PRISONNIER SE COMPLAINT.

Or avez vous ouy comment  
Je luy escriptz moult doucement  
Voulentiers les luy envoyasse  
Se a courroucer ne doubtasse  
Mais bien sçay que pas ne seroit  
Ayse quant elle les verroit  
Ja nest besoing de plus luy faire  
De mal elle a assez affaire  
Dieu la vueille reconforter  
Et a moy mon mal supporter.

## RONDEL LAYE.

Tout doucement me convient prendre  
Et attendre  
La voulente dame fortune  
Puis que ainsi me veult surprendre  
Sans despendre  
Tout doucement me convient prendre  
Et attendre  
Dieu la me doint en gre comprendre  
Sans mesprendre  
Au fort la mort si est commune  
Tout doucement, etc.

Se fortune si me fait tort  
Neantmoins si me fait Dieu grant grace  
Quant mon maistre si est daccord  
Que pour passer le temps je face  
Quelque chose qui me solace  
Pour moy donner aucun confort  
Mais que mon cueur ne se defface  
Mieulx me vault estre prins que mort.

Je fais balades et rondeaulx  
 Cest le plus fort de ma besongne  
 Lunetes, perdris et moyneaulx  
 A les nourrir je membesongne  
 Et si ay fait mainte coloigne  
 Et des ymages assez beaulx  
 Affin que ma douleur seslongne  
 De maintes fleurs on fait chapeaulx.

Puis que mon maistre est content  
 A broder certes me vueil mettre  
 Car le temps si mennuye tant  
 Je ne scay de quoy mentremettre  
 A Guillot le convient promettre  
 Si le convient faire pourtant  
 Le temps pourray a ce remettre  
 Car trop ennuye qui attend.

BALADE QUE LEDIT PRISONNIER FIST DOUB-  
 TANT QUIL NE LUY SURVINT ENCORES  
 FORTUNE.

Je sais la sepmaine peneuse  
 Et ay passé la quarantaine  
 Qui ma esté assez chargeuse  
 Vecy la derniere sepmaine  
 Se le poursuyvant ne mamaine  
 Chose qui soit a moy joyeuse  
 Guillot me dist et macertaine  
 Que ma cause est dangereuse.

Ma cause sera gracieuse  
 Se Christofle si me ramaine  
 Chose qui ne soit courrouceuse  
 A mes maistres ne incertaine  
 Mais par ma foy son les pourmaine  
 Par voye qui soit ennuyeuse

Je reseray en plus grant peine  
Ma cause sera dangereuse.

Bien doy avoir pensée doubteuse  
Tant que seray en ce demaine  
Cest par fortune lenvieuse  
Que si durement me demaine  
Par ma foy elle est bien villaine  
Et envers moy trop oultrageuse  
Se nouvelle je nay certaine  
Ma cause sera dangereuse.

Princesse royne souveraine  
Envers moy si soyez piteuse  
Et me donnez joye haultaine  
Ou ma cause est dangereuse.

BALADE LAYÉE QUE LE PRISONNIER FIST  
LE JOUR DE PASQUES.

Puis que je suis en la journée  
De Pasques la tres honorée  
Une balade je feray  
Louenge a Dieu en soit donnée  
Et a la vierge couronnée  
Que jay servie et serviray  
En tout le mieulx que je scauray  
Tant doucement je le feray  
Incontinent sans demeurée  
Et de ma main je le scripray  
Dequoy grant joye je auray  
Celle peult estre couronnée.

Chascun si doit estre paré  
Et tout son peché esparé  
Pour recevoir le Dieu des dieux  
Qui denser nous a desparé  
Par son corps qui la comparé

Ce jour de Pasques glorieux  
Or soient nos cueurs gracieux  
Purs et netz de pechez mortelz  
Quant pour nous tant sumilia  
Ne soyons pas ambicieux  
Crions trestous jeunes et vieulx  
Alleluya, Alleluya.

Le monde en est reparé  
Qui des cieulx fut deseparé  
Par le peché tres vicieux  
Qu'Adam fist com fol esgaré  
Et pource tant que je sçauray  
Et aussi vous soyez songneux  
De garder ce corps precieux  
Gouvernons nous de bien en mieulx  
Car doucement nous deslya  
Du puy denfer tres furieux  
Et chantons tous de cueur joyeulx  
Alleluya, Alleluya.

A chanter me suis préparé  
Regina celi letare  
Car certainement ton doux fieulx  
Quem meruisti portare  
Resurrexit dont joye auray  
Et cent millions autres tieulx  
Il a été victorieux  
Et a nous sauver curieux  
Quant en la croix on le lya  
Par les faulx Juifz envieux  
Dequoy ilz furent roupieux  
Sicut dixit alleluya.

Prince ung chant concordieux  
Chanterons et melodieux  
Ora pro nobis maria  
Cest ung chant trop delicieux  
Chanter puissions lassus es cieulx  
Alleluya, Alleluya.

COMMENT LEDIT PRISONNIER SE COMPLAINTE  
DU POURSUYVANT, LEQUEL NE RETOURNA  
PAS AU JOUR QUIL AVOIT PROMIS.

Helas or est le jour passé  
Que le poursuyvant avoit prins  
Dont jay le corps trestout lassé  
Helas certes bien a mesprins  
Bien sçay que je seray reprins  
Et auray tout le corps cassé  
La mort que ne mas tu surprins  
Je voudroye estre trespasé.

Poursuyvant qui te dis loyal  
De retourner promis mavoyes  
Appeller te puis desloyal  
Car trop vers moy tu te forvoyes  
Se eusses esté en Savoye  
Si te tenois je si feal  
Que vers moy reprendroyes la voye  
Fust de pied, ou fust de cheval.

COMMENT LEDIT PRISONNIER SE COMPLAINTE  
DE SON VARLET LEQUEL NE RETOURNOIT  
POINT.

Christoffe que peulx tu songer  
Tu scez bien que je suis ton pleige  
Je tay osté hors de dangier  
Et si tay fait tel avantaige  
Penses y tu feras que sage  
Ne me laisse point laidangier  
Tu me feroyes trop grant outrage  
Une fois men pourroye venger.

Tu scez a quoy tu te soubmis  
A lheure que te feis partir  
Fais ton devoir vers mes amys  
Que dicy puisse departir  
Mieulx te vouldroit en deux partir  
Ton corps se devoir ny amis  
Se tu devoyes mourir martir  
Se tien ce que tu as promis.

Desja sans aller plus avant  
Tu mas faulsée ta promesse  
Tu ne mas pas tenu convant  
Pourquoy je suis en grant destresse  
Je ne sçay se riens si te blesse  
Que tu ne reviens plus souvent  
Je nay que douleur et tristesse  
Ne de toy ne du poursuivant.

Je ne sçay pas a quoi il tient  
Ne se en toy tient la demeure  
Se la faulte par toy si vient  
Tu lauras faicte a mal heure  
Jen ay le cueur plus noir que meure  
Toute douleur en soy contient  
Se tu es sage si labeure  
Pour moy comme il appartient.

Las fortune seras tu point  
Lassée de tant moy meffaire  
Tu me metz en si mauvais point  
Certes que je ne sçay que faire  
De tous pointz tu me veulx deffaire  
Le cueur me part et si me point  
Chanter ne puis pour moy refaire  
De plein chant ne de contrepont.

Puis que ainsi ne me veulx laisser  
Je te prie a la mort me livre  
Affin que mon mal puist cesser

Je voudroye estre delivré  
Bien voy que plus je ne puis vivre  
Haulser ne me puis ne baisser  
Delivre toy point ne suis yvre  
Vueilles la mort vers moy presser.

A coup me vouldroit mieulx mourir  
Que languir ainsi longuement  
Puis que ne me venlx secourir  
Delivre moy appertement  
Mais se dung peu dalegement  
Il te plaisoit moy secourir  
Je te prendroye lyement  
Bien tén vouldroye requerir.

COMME LEDIT PRISONNIER SE COMPLAINT  
DES PAYS ESTRANGES OU IL A ESTÉ BIEN  
AYSE ET AU PAYS DONT IL EST NATIF  
IL A GRANT FORTUNE, ET SE  
LAMENTE DES MAULX QUIL  
VOIT VENIR EN FRANCE.

Or ay je esté en Lombardie  
Et par le pays Dytalie  
En Cecille, en Romenie  
Qui sont pays de grant valeur  
Et au pays Desclavonie  
En la Morée, en Candie  
Ou croist la bonne malvesie  
Qui fait revenir la couleur.

En Rhodes et en Ciflorine  
En Grèce, en Alexandrie  
Au royaulme de Ermenye

Et puis en pays de Turquie  
Jusques devant lestandelour  
En Hierusalem, en Surie  
En Cyppre, dedans Nicotie  
La veis la croix de labbaye  
En ce pays fait grant chaleur  
Par le royaulme Darmenye.

Et par tout ay fait chiere lye  
Sans avoir mal ne villenie  
Peine, tourment, ne maladie  
Oncques ne feis chere meilleur  
Et en France qui a nourrie  
Ma personne sera ma vie  
Finée en toute douleur  
Par fortune que dieu mauldie.

En Surye que cy vous compte  
La vy je faire chevalier  
De Salibery le droit conte  
Qui puis fut grant aventurier  
En France, et grant guerroyer  
Chascun le dit et le racompte  
Mais fortune au derrenier  
A la fin en a fait le compte.

Maint chevalier, maint escuyer  
Ont esté fortunez en France  
Lung par mort, lautre prisonnier  
Qui est une grant desplaisance  
Les aucuns sont mors par finance  
Laquelle ilz ne ont peu payer  
Autres sont tenus en souffrance  
En la prison en grant dangier.

Advis mest que les gens deglise  
Si ne sont mie davantage  
Bourgeois, marchans de toute guise  
Gens de mestier, gens de village



Fortune a tout mis en servage  
Elle a par tout mis sa devise  
Helas nest ce pas grant dommage  
De veoir tout ce que vous devise.

## LAY.

Helas par ma foy se je osasse  
Je parlasse  
Plus avant de ceste matiere  
Se autre que dieu ne doubtasse  
Je comptasse  
La chose qui est assez clere  
Mais la gent est de tel maniere  
Si tres-fiere  
Que il convient que je men passe  
Ainsi que fait la chamberiere  
En sa saziere  
Qui farine par gros sas sasse.

Or vueil je donc trestout sasser  
Gros et gresle trestout ensemble  
Autrement ne men puis passer  
Entendez le se bon vous semble  
Il convient que trestout jassemble  
Se bien je vueil tout compasser  
Encor faudra il que jen emble  
Pour la doubte de rapasser.

Combien que je ne pense a dire  
Riens que a nul doive desplaire  
A mon pouvoir ne contredire  
Saucunement faiz le contraire  
Doulcement je men vueil retraire  
Voire se besoing est du dire  
Combien que je ne pense a faire  
Chose dont on puisse mesdire.

Prenez en gre se je dy rien  
Qui soit bon cest a laventure  
Se je dy bien prenez le bien  
Se je dis mal nen ayez cure  
La prison si mest si tres-dure  
Que pas ny sçay bien mon maintien  
Je vous pry que chacun mexcuse  
Se veez que ne dise rien.

On a veu que ceulx Dalemaigne  
En France au Conseil venoient  
Ceulx Darragon et ceulx Despaigne  
De tous pays y accouroient  
Et si bon conseil y trouvoient  
Quon nommoit France la montaigne  
Ou tous bons consaulx si estoient  
Et de tous biens estoit compaignie.

Or escoutez se cest grant fait  
Quant ceulx qui conseiller souloient  
Et qui maint bon conseil ont fait  
Quant conseiller ne se sçavoient  
Ou a tout le moins ne vouloient  
Je le puis dire sans meffait  
Je ne sçay a quoi ilz pensoient  
Le royaume en est deffait.

Je mesmerveille moult forment  
Quant la guerre si commença  
Comment ung peu plus largement  
A ce faire on ne pensa  
Qui ce fist peu y pourpensa  
De faire en France tel tourment  
Et de bien peu il avanca  
Se me semble son sauvement.

On a veu les gens par plaisance  
Venir en France pour deduyre  
Pour le bien et pour lhabondance

Dhonneur, qui si souloit conduyre  
Mais les bons sen veullent esduire  
Par une grande desplaisance  
Et ceulx qui la veullent destruire  
Y acourent a grant puissance.

Bien voy que seul pas je ne suis  
Tres-mal gouverné par fortune  
A mon œil veoir je le puis  
En France elle est bien commune  
Tel navoit vaillant une prune  
Qui a de chevance plain puy  
Et a ceulx a qui elle estoit une  
Si en sont a présent destruis.

## LAY.

O fortune tu as bien mis  
Le royaulme de France en guerre  
De malle heure y fus commise  
Destruis en sont tous ses amys  
Et gastée toute sa terre  
Que je vis en si bon point mise  
France a beaucoup dennemys  
Guerre si en a la deffere  
Telle a partout mis sa devise  
Des grans maulx qui y sont commis  
Quant gy pense le cueur me serre  
Voulez-vous que vous en devise.

## LAY.

Mainte eglise en est polue  
Et destruite et abatue  
Dont le service diminue

De ceulx qui les avoient fondées  
Noblesse si en est perdue  
Plus na rente ne revenue  
Que la guerre si nait tollue  
Mal sont payez de leurs souldées  
Dames vefves sont demourées  
Et damoyselles esgarées  
Femmes et filles violées  
Et maint orphelin soubz la nue  
Maintes femmes sont avortées  
Par la guerre de leurs portées  
Quelles ont en leurs corps portées  
Il nest riens que guerre ne tue.

## LAY.

Marchans si nont pas leur saison  
Bien leur fault payer leur moison  
Quant a eulx en peut advenir  
Laborieux ont du mal foison  
Car ilz nont borde ne maison  
Ou ilz se sachent maintenir  
Ilz ne savent que devenir  
Ne ou aller, ne eulx tenir  
Guerre si est toute prison  
Dont ce que aux champs peult venir  
Guerre si veult tout detenir  
Et tout happer, c'est venoison.

Ne veez vous pas tous les jours faire  
Guerre le filz contre le pere  
Et le pere au filz par contraire  
Et le frere contre le frere  
Nest ce pas chose bien amere  
De veoir parens a eulx meffaire  
Et enfans yssus dune mere  
Lung lautre tuer et deffaire.

## LAY.

Bien est de mauvaise nature  
La créature  
Qui voit la guerre si tres-dure  
Que France endure  
Qui na pitié en son courage  
Guerre nest pas sa nourriture  
Trop luy est dure  
Car sans raison et sans mesure  
Tant est obscure  
Que on ny voit fons ne rivage  
France prent le nom de servage  
Cest grand dommage<sup>e</sup>  
Bien est maudit de malerag<sup>e</sup>  
Qui tel oultrage  
A la chrestienté procure  
Car destruit en est maint lignage  
De grant parage  
Villes, chateaulx et maint village  
Et maint passage  
Et le surplus en adventure.

## LAY.

Encor nay je fait mention  
De ceulx qui sans confession  
Sont mors et lesquelz sont en voye  
En dangier de dampnation  
Se dieu nen a compassion  
Dieu par sa grace les pourvoye  
Se au surplus dire vouloye  
Les maulx que la guerre envoye  
Ce seroit admiration

Escripre je ne le sauroye  
Se descripre je ne cessoie  
Dicy jusques a l'ascension.

LAY.

Paix doit estre bien louée  
Honorée  
Bien prisée  
Et aymée  
Par trestoute la contrée  
Ou son plaisir si sadresse  
Car plaine est de richesse  
Et de tout bien parée  
En luy gist bonne pensée  
Attrempée  
Amassée  
Entassée  
Bien doit estre couronnée  
Par sa tres-grande noblesse  
Mais guerre la larronnesse  
Si la de France esgarée  
Et ostée  
Par emblée  
Et chassée  
Tant que est deseparée  
Par une grande rudesse  
De douleur et de destresse  
France en est deshonorée  
Et en friche demeurée  
Et gastée  
Et pillée  
Desrobée  
Et de tous pointz desolée  
Se paix ny reprent ladresse  
Jamais naura que tristesse  
Car elle est désespérée.

## LAY.

La guerre tres oultrageuse  
Et chargeuse  
Dommageuse  
Fourrageuse  
Et en tout mal courageuse  
France te doit bien mauldire  
Car trop luy est courrouceuse  
Dangereuse  
Angoisseuse  
Et doubteuse  
Et de tout mal desireuse  
Souffrir luy fais grant martyre  
Chassée a paix lheureuse  
La piteuse  
Gracieuse  
Doulcereuse  
Et qui tant est amoureuse  
Qui France souloit conduyre  
Mais par voye vicieuse  
Ennuyeuse  
Furieuse  
Ennimeuse  
Toi qui es ambicieuse  
De tous pointz la veulx destruire.

## LAY.

France courtoyse  
Guerre mauvaise  
Si ta destruite  
Moult il me poyse  
De ceste noyse

Si tres despite  
Fais quon la gite  
Hors par conduicte  
Quelle sen voise  
Se estiez quicte  
Quen vous nabite  
Bien seriez ayse.

Sçavez vous point a quoy il tient  
Que France a tant daversité  
Certes toute la faulte vient  
Que on nose dire verité  
Il ne court foy ne charité  
Je mesbahis que tout devient  
En chastel, ville ne cité  
Jen dis plus quil ue mappartient.

Se preudhomme fist son devoir  
Verité si ne doit celer  
Il deust toujours dire le voir  
Sans nullement y chanceler  
Ceulx qui cuydent dissimuler  
Si y perdent sens et sçavoir  
A la fin les fault deceler  
Chascun le peult appercevoir.

Faulte damour principaulment  
Nous oste tous amendemens  
Dieu nous bailla premierement  
En la loi dix commandemens  
Desquels deussions estre amans.  
Et se lung tenions fermement  
Hors nous serions de tous tourmens  
Et vous orrez tantost comment.

#### LAY.

Se dieu seulement aymions  
Et parfaitement croyions



Comme ceulx qui sommes siens  
Chascun si le doubteroit  
A luy on obeiroit  
De cueur on le serviroit  
Comme bons vrais chrestiens  
Ses commandemens ferions  
Eu vain ne le jurerions  
Et les festes festerions  
Aux peres on porteroit  
Honneur, meurdrier ne seroit  
Ne rien on ne roberoit  
En faulx ne tesmoignerions  
Nostre voysin garderions  
Sa femme et tous les siens  
En tous biens nous conduyrions  
Jamais nul ne pecheroit  
Justice si regneroit  
Dieu adonc nous donneroit  
Tres largement de ses biens  
Se telz voulentez avions  
Paix certes tantost aurions  
Et des biens faire pourrions  
Verité chascun diroit  
Point on ne la celeroit  
Par ainsi paix on auroit  
Mais quoy on nen fera riens.

Nous chantons trop bien placebo  
Mais de dilexi navons cure  
Trestout si vient de flatebo  
Ainsi chascun se desnature  
On ne chante plus par nature  
Mais par bequarre et par bemo  
Ou est cil qui le bien procure  
Qui me respond certes nemo.

O creature qui tentremetz  
Ou tes entremis de user  
A vouloir servir de tel metz  
Ne ty vueilles plus abuser

Envers dieu te fault excuser  
A le servir si te soubz metz  
Delivre toy sans plus muser  
Car il vault mieulx tard que jamais.

LAY.

Pensons, pensons que dirons  
Ne ferons  
Quant yrons  
Devant dieu et compterons  
Car la fauldra rendre compte  
Du conseil point ny aurons  
Nous verrons  
Et sçaurons  
Noz pechez et les lyrons  
Soit pape, roy, duc ou conte  
Absence avoir ne pourrons  
Nous orrons  
Ou serons  
Ne quel faix nous porterons  
Cest vray ce que je racompte  
Se bien nous nous advisions  
Nous fuyrions  
Et lairrions  
De peché nous retrairions  
Car la fin fera le compte.

LAY.

Bien croy que se parler vouloye  
Trop plus avant dire pourroye  
Dont nous vient ceste maladie  
Mais de bien peu mavanceroye  
Il nest homme qui ne le voye

Ja nest besoing que plus en dye  
Se chascun eust mené la vie  
Qui de droit luy est estable  
Sans prendre sentier nautre voye  
On eust delaissé toute envye  
Qui est celle que dieu mauldie  
Par qui le monde se devoie.

## LAY.

Helas pour dieu veuillez entendre  
A nous amender de cneur tendre  
Et a bien faire revenir  
Chascun vueille son estat prendre  
Car point ne fera a reprendre  
Ne honte ne le doit surprendre  
Pour riens quil luy puisse advenir  
A ceste vie maintenir  
Mais ne povons nul bien apprendre  
Fors envers dieu tousjours mesprendre  
De quoy compte nous fauldra rendre  
Devant luy au temps advenir  
Trop bien nous on deust souvenir  
Que une fois fault rendre ou prendre  
Ne point ne nous scaurons deffendre  
Ne vueillons le besoing attendre  
Trop mieulx nous vauldroit parvenir  
Que en France tousjours tenir  
Ceste douleur ne ceste esclandre.

Or escoutez hauctorité  
Que levangille nous enseigne  
Qui dit quil est nécessité  
Aucunes fois quesclandre adviengne  
Mais cil par qui fault quelle viengne  
Est maudit de la deité  
Chascun la parole retiengne  
Car ce est pure verité.

Je doubte que nous ne soyons  
Maulditz, car cest par noz pechez  
Parquoy esclandre nous ayons  
Car trop fort sommes entachez  
Nous en avons tous les meschiefs  
Et les tourmens que endurons  
Faisons que soyons descachez  
Ou autrement point ne durrans.

Helas se nous sommes maulditz  
Prions dieu quil nous desmauldisse  
Et mettons noz faictz et noz ditz  
Hors de peché et de tout vice  
Faisons le bien, laissons malice  
A bien faire soyons hardis  
Affin que la paix venir puisse  
Avec nous demourer tous dis.

On dit bien vient de male voye  
Qui du meillieu si sen retourne  
Prions ce dieu qui nous convoye  
Et a bien faire nous atourne  
Et que fortune plus ne tourne  
Sa roue qui tant nous forvoye  
Car nostre vie se bertourne  
Bien brief se dieu ne nous pourvoye.

#### LAY.

Qui enfer fouyr s'il voudroit  
Le droit chemin aller fauldroit  
De paradis pour le acquerre  
A amender se conviendrait  
Et dieu prier, car cest le droit  
Et doucement si le requerre  
Et que nous eussions paix en terre.

Meilleur chemin ne sçaurons guerre  
Que je devise cy endroit  
Car trop ennuis on peult acquerre  
Paradis pour faire la guerre

Trop de choses il y faudroit.  
Or puis que donc on nous asseure  
Que la paix est a lame seure  
Et que guerre luy est contraire  
A la paix mettons nostre cure  
Et de la guerre nayons cure  
Et delle nous vucillons retraire  
Veillons nuyt et jour pour attraire  
La paix en nos cueurs et pourtraire  
Car cest moult belle pourtraicture  
Plus belle nul ne sçauroit faire  
Tous ceulx qui la veullent distraire  
Silz sont de mauvaise nature.

## LAY.

Paix est de tous biens tresoriere  
Paix est de joye la portiere  
Paix est de douceur grenetiere  
Paix est de grace au'mosniere  
Non usuriere  
Paix est de plaisir chanceliere  
Paix est de justice lumiere  
Paix est damour la celeriere  
Paix est pure, necte et clere  
Comme verriere  
Paix fait tyrer la guerre arriere  
Paix garde quon ne sentrefiere  
Paix est douce et non pas fiere  
Paix na riens que bien ny affiere  
Par grant maniere  
Paix est une chose moult chiere

Paix fait faire tres bonne chiere  
Paix a chascun est chamberiere  
Paix a aucun nest torsonniere  
Ne forsouniere.

LAY.

Puis que paix si est tant bien faicte  
Et parfaite  
Que ne pensons nous a bien faire  
Sans deffaïre  
Certainement ce fut bien fait  
Et sans meffait  
Et que toute noyse sefface  
Ou autrement France est deffaïcte  
Et infaïcte  
Or pensons donc a la refaire  
Sans meffaïre  
Car destruiect est par notre fait  
Par nous forfait  
Faisons que par nous se reface  
Et que plus ne soit contrefaïcte  
Ne imparfaïcte  
Car qui bieu la voudra parfaire  
Sans infaïre  
Le peuple sera tout refait  
Et tout parfait  
Mais que point on ne la defface.

LAY.

Les anges si chantent haultement  
Et leglise pareillement  
Gloire es cieulx, a la deité  
Et en terre semblablement

Paix est donnée vraiment  
A gens de bonne volenté  
Or soyons donc entalenté  
Davoir vouloir de verité  
Si aurons de paix largement  
Pour ce royaume inhabité  
Qui tant plain est diniquité  
Dieu y mette amendement.

A ses apostres dieu donner  
Si ne vult pain blanc ne pain bis  
Quant il les vult habandonner  
Fors quil leur donna pax vobis  
De plus bel joyau ne rubis  
Si ne les pavoit guerdonner  
Requerons luy pax pro nobis  
Et nos pechez a pardonner.

## LAY.

O clergie plain de sapience  
Qui avez divine science  
A prescher qui est chose utile  
Pour dieu navez en oubliance  
A prescher de la conscience  
Car elle est a lame fertile  
Prenez vous point sur levangile  
Saint Jehan, saint Luc, Marc et Matille  
Sans donner au peuple audience  
Et sans mouvoir commun de ville  
Car tel chose est trop subtile  
Pour faire folle aliance.

Preschez de paix et de concorde  
Pour tous les princes accorder  
De pitié, de misericorde

Si vueillez souvent recorder  
Pour les ensemble encorder  
Affin que chascun si accorde  
Et que puissent concorder  
Car trop dure ceste discorde.

Helas saucuns au temps passé  
Ont riens fait pour avoir offices  
Ou pour avoir or amassé  
Ou pour avoir des benefices  
Certainement ilz sont bien nices  
Se leur temps nont bien compassé  
Car on rendra compte des vices  
Après quon sera trespasé !

## LAY.

Quant en France paix aviez  
Clergie moult ayse estiez  
Car parmi ses beaulx moustiers  
    Vous alliez  
    Et disiez  
    Voz psaultiers  
Sagement vous conteniez  
Les prestres messe chantoient  
Ou leur volenté faisoient  
Ceulx qui a lecolle estoient  
    Apprenoient  
    Et lysoient  
    Ou preschoient  
Les sciences que acqueriez  
A grant honneur vous menoient  
Princes belle court tenoient  
Ou toutes gens recevoient  
Les estranges festeoient  
    Ilz dansoient



Et chantoient  
Et rioient  
Et souventes fois joustoient  
Sur palefrois et destriers  
Et dessus ses grans coursiers  
Faulcons avoient faulconniers  
Espreviens  
Et lamiers  
Et levriers  
Chiens courans et gros limiers  
Dont souvent deduit avoient  
Chevaliers et escuyers  
Marchans bien vous mainteniez  
Quant en paix vous conteniez  
Vous portiez  
Voz deniers  
Et alliez  
Seurement ou vous vouliez  
Toutes gens a vous venoient  
Les laboureux labouroient  
Ilz couppoient  
Et rompoient  
Acertoient  
Les boys et les arrachotent  
Tant labouroient volentiers  
Certes pas assez navoient.

## LAY.

Pensons à faire revenir  
Le temps dont vous faiz souvenir  
Les maulx fais passez oublions  
Et que la paix puisse venir  
Pour nostre vie soustenir  
Hors de ces tribulations  
Laissons toutes divisions

Et toutes vindications  
A dieu en laissons convenir  
Lung a lautre si nous fions  
Et tous faulx rappors si fuyons  
Pour en amour nous maintenir.

LAY.

Pour plus declairer la matiere  
De ceste paix et quon la quiere  
Quelle soit pure, necte et clere  
Et telle que je la demande  
La voye seroit la premiere  
De trouver par bonne maniere  
Par requeste ou par priere  
Que de trois pars les gens on mande  
A qui la paix on recommande  
Si fera chascun sa demande  
Et qui aura tort quil lamende  
Sans point tyrer le ciel arriere  
Ceste voye dieu la commande  
Faisons que chascun y entende  
Affin que nul si ne descende  
Dedans enfer en la chaudiere.

LAY.

Ceulx qui voudront faire la guerre  
Soient de France ou Dangleterre  
Aillent sur les Boesmiens  
La pourront ilz conquerer terre  
Et leur salvation acquerre  
Et y faire beaucoup de biens

Car Boesmes sont heresiens  
Et vallent pis que Suriens  
Lempereur si fait gens requerre  
Par tous royaulmes chrestiens  
Le pape en absout tous les siens  
Et la doit on aller grant erre

La guerre si est honorable  
A soy combatre pour la foy  
Et a lame tres proufitable  
En soustenant la bonne loy  
De Jesus, qui est nostre roy  
Telle guerre est moult notable  
Chascun face paix par arroy  
Pour faire guerre veritable.

## LAY.

Pere saint excommuniez  
Votre puissance deslyez  
De votre bouche maudissez  
Et en tous estatz pugnissez  
Qui a paix yra du contraire  
Clergie vos cueurs humiliez  
Envers dieu si vous raliez  
En oraisons vos cueurs liez  
Piteusement le suppliez  
A fin que puissiez paix attraire  
Noblesse or vous raveillez  
Et a faire paix si veillez  
Car en guerre trop sommeillez  
Soient voz cueurs appareillez  
Pour paix en vous du tout pourtraire  
Bourgeois marchons peuples criez  
A haulte voix vous escriez  
Et point si ne vous descriez

La paix vueillez en vous retraire  
Ou vrayement vos jours sont briefz.

LAY.

Prions trestous jeunes et vieulx  
Prions Jesus de bien en mieulx  
Prions ce doulx roy precieulx  
Prions pour avoir paix en France  
Prions ce prince glorieux  
Prions ce roy victorieux  
Prions quil nous soit gracieux  
Prions quil nous doint alegance  
Prions le que par sa puissance  
Prions quil nous tienne en souffrance  
Prions que la paix nous avance  
La guerre a destruit plusieurs  
Prions et faisons penitence  
Prions dieu a grant diligence  
Prions quil nous doint audience  
A nostre fin lassus es cieulx.

COMMENT APRES CE QUE LE PRISONNIER  
PARLE DES FAITZ DE LA GUERRE IL  
PARLE DAUTRES MATIERES EN CON-  
TINUANT SON ŒUVRE.

Vous qui cy devant avez veu  
Et bien au long vous avez leu  
Sçavoir povez que cest de guerre  
Cest destruction de terre  
Et trestoute perdition

Sans y trouver dilection  
Charité ne misericorde  
Ne raison point ne si accorde  
Mais trahison et tricherie  
Larrecin et la pillerie  
Si ont tout le gouvernement  
De guerre generalmente.

En mon temps jay leu pour apprendre  
Trestout le livre Dalexandre  
Et puis celluy de Troye la grant  
Qui est ung livre bel et grant  
Des roys Artus, de Charlemaigne  
Et debliopatois Despaigne  
Et de ceulx de la table ronde  
Qui firent guerre par le monde  
Mais oncques livre ne peuz lire  
Ou je sçeusse trouver ne dire  
Les maulx qui au jourdhuy se font  
Jay merveilles que tout ne font  
Car pour la nommer vraiment  
Ce nest pas guerre proprement  
Mais est parfaicte tyrannie  
Ja nest besoing que plus en dyé  
Sçavez pourquoy; car je sçay bien  
Que de tout on ne fera rien  
Aussi chascun sçet la science  
Tout par force dexperience  
Pourquoy le monde se desvoye  
Et se dieu du ciel ny pourvoye  
Nous sommes bien en aventure  
De estre encores en ceste ordure  
Si luy prie par amitié  
Quil en vueille avoir pitié  
Car se par luy nest fait le fait  
Cest royaulme si est deffait  
Mais quant son plaisir y sera  
Incontinent si refera  
En brief temps sans longue demeure  
Car en peu dheure dien labeure.

## LE PRISONNIER.

Bien sçay que plusieurs qui liront  
Ce livre, si sesbahyront  
Comment ces choses faire puis  
Veu ce que prisonnier je suis  
Et diront que je suis bien aise  
Mais toutefois ne leur desplaise  
Se laisse que jay ilz avoient  
Par trop ayses ilz ne seroient  
Dont la vierge du ciel les garde  
Car je vous prometz quil me tarde  
Que mes maistres soient contens  
De moy, si sera fait mon temps  
Dieu si la vueille avancer  
On doit souvent homme dancer  
Qui a chapeau dessus sa teste  
Qui est marry en son soupper  
Et na plus dollent en sa feste  
Ainsi fault mon fait compasser  
Pour plus aise le temps passer  
Car plusieurs gens vers moy si viennent  
Qui compaignie si me tiennent  
Pource quilz prennent grant plaisance  
A escouter de ma science  
Et encores faire me font  
Des balades qui pour eulx sont  
Pour envoyer ou bon leur semble  
Et pour ce que de paour je tremble  
Veu le dangier en quoy je suis  
Je fais tout le mieulx que je puis  
Et ne metz ailleurs mon desir  
Fors a faire a tous plaisir  
Soit en mes faitz ou en mes ditz  
Et ainsi le feray tousdis  
Car moult souvent jay ouy dire  
Doulce parolle frainct grant ire.

Ung jour si vint ung escuyer  
Vers moy lequel me vint prier  
Que je luy feisse une balade  
Disant quavoit esté malade  
En dangier de perdre la vie  
Et pource doubtoit que samye  
Laquelle long temps navoit veue  
Nen fust dolente ou esmue  
Si que pour la reconforter  
La balade luy fist porter  
Laquelle je feiz doucement  
Et vous orrez tantost comment.

## BALADE.

Puis que vers vous ma tres douce maistresse  
Aller ne puis au moins vous vueil rescrire  
Ce quay souffert la doulear la destresse  
Parquoy vers vous ne me puis raconduire  
Pour vostre cueur et pour le mien deduire  
Qui a esté a mon cueur grant tristesse  
Si plaist a dieu brief de vous peusse dire  
Dieu si vous douit honneur, santé, lyesse.

De mal jay eu certes si grant largesse  
Oncques sans mort homme si ne leut pire  
Et suppose que le droit mal me laisse  
Neantmoins sens je le cueur qui me souspire  
Conregarder me fault quil ne mempire  
Mais ce je sens que a droit me redresse  
Incontinent yray vers vous de tire  
Dieu si vous doint honneur, santé, lyesse.

Oncques je neuz au cueur si grant angoisse  
Qua vous mon cueur ne se vouldist conduire  
Se vers vous puis reprendre mon adresse

Je seray hors de trestout mon martire  
Car je vous tiens pour mon souverain mire  
Tant a en vous de bien et de noblesse  
De vous oncques homme ne sçeut mesdire  
Dieu si vous doint honneur, santé, lyesse.

Prince damours vueillez moy raconduire  
Vers celle en qui ne vy oncques rudesse  
Car cest celle que plus mon cueur desire  
Dieu si luy doint honneur, santé, lyesse.

---

En ung autre jour a moy vint  
Ung escuyer a qui convint  
Une balade tantost faire  
Pource quil en avoit a faire  
Mais il me bailla le refrain  
Dont il me fit ronger mon frain  
Car je doubte comme on me dist  
Que pour moy essayer le fist  
Si en feis une ce me semble  
Mais trois si en avoit ensemble  
Ensemble dire on la pourroit  
Ou chascune a part qui voudroit  
Bien estrange fut la maniere  
Vous en orrez cy la matiere.

---



LE DIT PRISONNIER FIST LA BALADE QUI CY  
APRES EST ESCRIPTE A LA REQUESTE DUNG  
GENTIL HOMME; MAIS POURCE QUE LON DIST  
AUDIT PRISONNIER QUE LE DIT GENTIL  
HOMME ESTOIT FACTEUR, QUI LE FAISOIT  
POUR LESSAYER LEDIT PRISONNIER LUY EN  
FIST TROIS EN UNE AFFIN QUE LE DIT GENTIL  
HOMME NE SEN APPERCEUST COMME VOUS  
ORREZ.

Mamour souveraine  
Je vous vueil escripre  
Et soyez certaine  
Pour riens qui m'empire  
Trop bien povez lire  
A celle enseigne  
Que me feistes dire  
Amez qui vous ayme.

Vous estes fontaine  
Que plus je desire  
Se sens vostre alaine  
Je suis sans martire  
Dieu si le vous mire  
Quant estes si plaine  
En vous je me mire  
Amez qui vous ayme.

Vraye chastellaine  
Pour aller de tire  
Sur moy je nay veine  
Que vers vous me tire  
Mais dangier le pire

Trop fort me pourmaine  
Car il est plain dire  
Amez qui vous ayme

Prince je souspire  
Veoir ne puis a peine  
Celle qui sçet dire  
Amez qui vous ayme.

Croyez certainement  
Pour nous donner joye  
De mon sentement  
Ne vous changeroye  
Ce que vous envoie  
Croyez fermement  
Dont je me resjoye  
Du cueur loyaulment.

Sachez vraiment  
Fors que je vous voye  
Jay allegement  
Rien ne men devoye  
Et si me pourvoye  
De confortement  
Doulce simple et coye  
Du cueur loyaulment.

A vous doucement  
Mon cueur prent la voye  
Croyez seurement  
Si ne se forvoye  
Le nom rabajoye  
Si me fait tourment  
Autre ne doubtoye  
Du cueur loyaulment.

Mamour ma montjoye  
Sans grant doubtement  
Je vous desiroye  
Du cueur loyaulment.

Encores si viennent plusieurs gens  
Vers moy qui sont trop diligens  
A me demander mon estat  
Et voyent bien qui va de plat  
Et sçaissent la necessité  
Ou je suis et la verité  
Je ne sçay qui les meult a faire  
Si ne tendent a moy deffaire  
Pource par mon opinion  
Ay pryns en ma conclusion  
Qua ceulx qui me demanderont  
Qui de riens chargez nen seront  
Je respondray tout le contraire  
De ce quilz voudront de moy traire  
Et le plus loing de mon penser  
Sans les aucunement tencer  
Une balade en diray  
Que cy après je escripray  
Mais affin que mieulx on la forme  
Je escripay en lettre de forme  
La responce du respondant  
Que je feray en demandant  
Dont plusieurs se prindrent a rire  
Quant du premier loyrent dire.

## BALADE.

Amy Syre. Or me dis doucement.  
Que diray je ? Compte moy la maniere.  
De quel chose ? De ton prisonnement.  
Dy quon te fait. On me fait bonne chiere.  
De ta rançon ? Elle nest pas trop chiere.  
Payeras tu bien ? Dy et bien briefment  
Vient ton argent ? Ouy, en une civiere.  
Je nen crois riens. Certes le ribault ment.

Comment vis tu ? Je vis joyeusement  
De pain de vin. Je ne boy eaue ne biere.

Que mangez tu ? Chair poisson largement.  
 Gis tu en lict ? Ou donc ? Sur la litiere ?  
 Nenny. Ou donc ? En chambre belle et clere.  
 Et dessus quoy ? Sur lict de parement.  
 As tu argent ? Plaine ma gibeciere.  
 Je nen crois riens. Certes le ribault ment.

Or me dy. Quoy ? De ton gouvernement  
 As tu point paour quon te bate ne fiere  
 Batre. Pourquoi ? Nenny. Certainement.  
 Non dea, Tu as a faire a gent moult fiere  
 As tu nulz poulz ? Qui en a si les quiere.  
 Tu es es fers. Ce nest quesbatement.  
 As tu bon feu ? Du devant et derriere.  
 Je nen crois rien. Certes le ribault ment.

Or prie a dieu. Besoing nay de priere.  
 Non dea, pourquoy ? Je suis sans pensement  
 Et sans soucy : ma joye est toute entiere.  
 Je nen crois riens. Certes le ribault ment.

**AUTRE BALADE QUE LEDIT PRISONNIER FIT  
 POUR UNG ANGLOIS LEQUEL ESTOIT  
 PRISONNIER AVECQUES LUY.**

En la prison la ou jestoye  
 Ung anglois prisonnier avoit  
 Qui pas ne demenoit grant joye  
 Par piedz, par mains es sepz estoit  
 Francois parler il ne sçavoit  
 A peine ne mot ne demy  
 En anglois tousjours il disoit  
 God and o ul lady helpemy.

De son mal grant pitié avoye  
 Et aussi mon cueur se doubtoit

Que ung jour avoir en pourroye  
Autant qui me desconfortoit  
Et quant a luy on demandoit  
Helas quavez vous mon amy  
Autre chose ne respondoit  
God and o ul lady helpemy.

A racompter je ne sçauroye  
Comment moult fort se dementoit  
Ne reposer je ne povoye  
Car sans arrester il parloit  
Myfiet and my haudez brelroit  
Disoit oncques je ne dormy  
Mais son refrain toujours estoit  
God and o ul lady helpemy.

Prince du grant mal quil avoit  
Dieu si men gard et saint Remy  
Le dict estoit bon quil disoit  
God and o ul lady helpemy.

Maintz prisonniers estions ensemble  
De maintes langues ce me semble  
Entre lesquelz ung prisonnier  
Estoit un gentil escuyer  
Qui de Jehan si portoit le nom  
Et faulcon estoit son surnom  
Né du pays de Normandie  
Moult fort si regrettoit samye  
Si me pria pour lamour delle  
Que une balade nouvelle  
Feisse pour son cueur allegier  
Et la porta ung messagier  
Qui veult ouyr que on la dye  
Cy après verrez la coppie.

---

## BALADE.

Belle, bonne, douce, plaisant et sage  
Mon reconfort, mon amoureuse joye  
Je vous supply de tres humble courage  
Que suppose que prisonnier je soye  
Vostre vouloir de moy ne se forvoye  
Mais me soyez tousjours loyalle amye  
Sans vous troubler et ne moubliez mye  
Car jay en vous tres parfaicte fiance  
Et priez Dieu et la vierge Marie  
Que il nous doint a tous deux pacience.

Vostre douleur me fait au cueur tel rage  
Quant gy pense pis me fait que la moye  
Car grant courroux et grant tourment ce sage  
Pour moy souffrez dont maintesfois lermoye  
Si vous supply tres douce simple et coye  
Que de maintien soyez si bien garnie  
Que vous ne moy neu ayons villennie  
Entretenez de nous deux laliance  
Et priez Dieu et la vierge Marie  
Que il nous doint a tous deux pacience.

Souviengne vous quant je fus au village  
Ou je vous vy pas je ne me cuidoye  
Vous eslongner ne faire tel voyage  
De retourner vers vous grant fin avoye  
Mais fortune si sest mise en ma voye  
Qui marresta que Dieu si la mauldye  
Moult me tarde que ma douleur vous dye  
Si ne mayez doncques en oubliance  
Et priez dieu et la vierge Marie  
Que il nous doint a tous deux pacience.

Ma princesse du cueur je vous supplie  
Que vous ne moy lung lautre si noublye

Mais noz amours tenons en audience  
Et prions Dieu et la vierge Marie  
Que il nous doint a tous deux patience.

---

Vers moy vint une créature  
Bien parfaicte selon nature  
A la forme dune femelle  
Doulce plaisant estoit et belle  
Et en ses faictz tres gracieuse  
Bien sembloit estre amoureuse  
Celle pour moy reconforter  
Ung jour si me vint apporter  
Ung brain de ne moubliez mie  
Et de son don ne doubtez mie  
Que encor le cueur me revint  
Quant dung tel don il me souvint  
Et len merciay humblement  
Et pour le don moult doucement  
Dune chanson luy feis present  
Que vous orrez cy en present.

## RONDEL.

Bon jour bon an et bonne vie  
Bien et honneur sans villanie  
Doint dieu a ma doulce maistresse  
Qui ma donné de sa largesse  
La fleur de ne moubliez mie.

De tres bon vouloir la mercie  
Nuyt et jour pour elle je prie  
Et de dire mon cueur ne cesse  
Bon jour bon an.

Bien doucement si sumilie  
Et luy vient de grant courtoysie  
Quant a joye si me radresse  
Qui suis prisonnier en tristesse  
Nesse bien raison que je dye  
Bon jour bon au.

### LE PRISONNIER.

Quant la chanson si eut ouye  
Moult doucement la me mercye  
Mais moult fort la veiz souspirer  
Et sa couleur a empirer  
Si luy demanday quelle avoit  
Elle respond quel ne sçavoit  
Si me passe a tant du surplus  
Du demourant je nen dis plus.

### LE PRISONNIER

Autres femmes a moy venoient  
Qui leurs secretz si me disoient  
Dequoy des biens souvent avoye  
Car balades je leur faisoye  
Selon leur vray entendement  
Vous orrez cy après comment.

### BALADE QUE LE PRISONNIER FIT A LA RE- QUESTE DUNE DEMOISELLE.

Nommer je me doy eueuse  
Davoir trouvé bel amy



Duquel je suis amoureuse  
Car aussi lest il de my  
Pas nay le cueur endormy  
De laymer suis trop songeuse  
Mon cueur a percé parmy  
Plus le voy plus suis joyeuse.

Quant le voy je suis honteuse  
Tout le cueur si ma fremy  
Car trop fort je suis doubteuse  
De dangier nostre ennemy  
Sil en sçet mot ne demy  
La chose est trop dangereuse  
Dieu le gart et saint Remy  
Plus le voy plus suis joyeuse.

Sa chiere est si gracieuse  
Il est gay, il est joly  
Bien seroye envyeuse  
Se jaymoye autre que luy  
Et donc puis quil est ainsi  
Tousjours seray curieuse  
De le tenir sans soucy  
Plus le voy plus suis joyeuse.

Prince jay le cueur ravy  
De luy je suis trop piteuse  
Car oncques plus bel ne vy  
Plus le voy plus suis joyeuse.

**AUTRE BALADE LAYE QUE LEDIT PRISONNIER  
FIT A LA REQUESTE DUNE FEMME DE  
LAQUELLE LE NOM EST AU  
COMMENCEMENT.**

Par une simple plaisance  
Et par plaisant contenance

Riant et de bien pourveue  
Regard ma fait congnoissance  
Et ma donné souffisance  
Necte plaisant a ma vene  
En amour ma retenue  
Toute la couleur men mue  
Tant ay damour grant mout joye  
En mon cueur je suis ferue  
Dung amant qui damer sue  
Dieu luy doint honneur et joye.

Et quant par experience  
Vis en luy celle habondance  
Donneur de si grant value  
Sa douce obeysance  
Sans avoir oultrecuidance  
De laymer suis si esmeue  
Que mon cueur ne sen remue  
De son regard suis repeue  
Trop plus que se je mangeoye  
Dont a luy me tiens tenue  
Car samour ma soustenue  
Dieu luy doint honneur et joye.

Bien sommes dune aliance  
Car jay en luy grand fiance  
Dont je ne suis point deçue  
Mais jay au cueur grant doubtaunce  
Que malle bouche ne pence  
La chose qui ne soit sçeue  
Celle estoit apperçue  
Ou aucunement congneue  
Jamais bien certes nauroye  
Bien seroit lamour perdue  
Du meilleur dessoubz la nue  
Dieu luy doint honneur et joye.

Prince damour vous salue  
Vous mavez bien entendue  
Tout le cueur si me resjoye

Et damour si me tressue  
Quant a si bon suis rendue  
Dieu luy doint honneur et joye.

AUTRE RONDEL EN MANIERE DE CHANSON  
QUE LE PRISONNIER FIT A UNE DAMOY-  
SELLE POUR ENVOYER A SON AMY.

Mon bel amy je vous envoie  
Nouvelles pour vous donner joye  
Pour vostre douleur secourir  
Et ne doubtez que pour mourir  
Je suis vostre ou que je soye.

Tres volontiers je vous verroye  
Se vers vous aller je povoye  
Mais pource que ny puis courir  
Mon bel amy je vous envoie.

Prions a Dieu quil nous pourvoye  
Car se ma voulenté avoye  
Vers vous seroit tout mon plaisir  
Bien sçay que cest vostre desir  
Vostre voulenté est la moye  
Mon bel amy je vous envoie

AUTRE BALADE QUE LE PRISONNIER DONNA  
A UNE DAMOISELLE POUR LENVOYER A  
SON AMY.

A dieu mon amy gracieux  
A dieu celluy que je desire  
A dieu lamour que jayme mieulx

Par qui souvent mon cuer souspire  
Moult me tarde que puisse rire  
Avecques vous joyeusement  
Car je vous ayme loyaulment.

Et pour Dieu soyeز curieux  
A retourner vers nous de tire  
Car vostre fait en vaudra mieulx  
Sur ce que je vous ay a dire  
Pource que le chemin empire  
De venir advisez comment  
Car je vous ayme loyaulment.

Je prie a Dieu le roy des cieulx  
Que vers moy vous vueille conduire  
Pour repaistre ung peu mes yeulx  
Et mon cuer qui en est martire  
Plus riens ne vous sçay que rescripre  
Mais que sachez certainement  
Que je vous ayme loyaulment.

Prince veuillez moy raconduire  
Mon be' amy pour moy deduire  
Je vous supplie humblement  
Car je layme tres loyaulment.

### LE PRISONNIER.

Aucunes gens sont envieulx  
De ce qui me voyent joyeulx  
Et en dient plusieurs parolles  
Qui me semblent estre tres folles  
Veu ce que ilz nont nullement  
Sur moy aucun gouvernement  
Advis mest que cest grant folie  
Ma douleur ilz ne sçavent mie  
Car on dit que douleur couverte

Si fait plus de mal que louverte  
Je men sçay a bien quoy tenir  
Mais ma douleur fault retenir  
Sans prendre courroux ne tenson  
Dire je vueil une chansou  
Si plaist a ceulx qui la liront  
De moy que bien ilz ne diront  
Pour Dieu au moins nen dissent rien  
De mal silz ne le sçavent bien.

## RONDEL.

Vous avez grant tort male bouche  
Qui a moy vous voulez combattre  
Se fortune si me veult battre  
Souffise vous riens ne vous touche  
Vous voulez que comme une souche  
Je me tieugne sans moy esbattre  
Vous avez grant tort, etc.

Se lyesse de moy sapprouche  
Qui ma douleur vueille rabattre  
Cause navez de le debattre  
Se ny sçavez villain reprouche.  
Vous avez grant tort, etc.

Or nest il plus chanson ne rime  
Soit consonnant ne leonine  
Par laquelle puisse tant faire  
Que male bouche se sçeust taire  
Sans cesser parler contre moy  
Dont mon cueur est en grant esmoy  
Elle a du tout gasté mon fait  
Car par sa langue elle a tant fait  
Quon ma deffendu le fleuster  
Et le rimer et le chanter  
Voire qui pis est lescripre

Dequoy je suis en grant martire  
Porter men fault trop grant tourment  
Vous orrez cy apres comment.

### LE PRISONNIER

Helas je ne sçay plus que faire  
Ne comment me doye maintenir  
Rien ne my vault crier ne braire  
Ma douleur ne puis soustenir  
Desplaisance se vient retraire  
Avecques moy et soy tenir  
Et ne puis aller au contraire  
Las que pourray je devenir.

Espoir tu mas long temps tenu  
Et abusé en ton langaige  
Que peulx tu estre devenu  
Plus ne te voy en mon usage  
Trop mal me seroit advenu  
Se tu ne remetz ton courage  
Se par toy il nest soustenu  
Je nauray que douleur et rage.

Ha fortune trop grant vengeance  
Tu prens sur moy quant desplaisance  
Tiens avec moy en la prison  
Souffrir me faitz grant pestilence  
Nuyt et jour seuffre grant grevance  
Par ta cruelle trahyson  
Si prie a Dieu par sa puissance  
Qui me doint avoir patience  
Sans faire vers luy mesprison  
Et se cestoit a sa plaisance  
Que la mort bien brief il mavance  
Ou quil menvoye guerison.

Homme qui a auctorité  
Ou qui a grant gouvernement  
Ne fault point destre visité  
Et trouve amys largement  
Mais si luy vient adversité  
Ou quelque autre encombrement  
Il peult bien veoir la verité  
Qui ayme du cueur loyaulment.

Je le puis veoir par mon fait  
Car je vois chascun endormy  
Puis que fortune me deffait  
Je congnoistray mon ennemy  
A nul ne cuide avoir forfait  
Mais ains quil soit la saint Remy  
Je congnoistray lamy parfait  
Car au besoing voit on lamy.

## COMPLAINCTE EN LAY.

Qui veult que je dye  
De ma maladie  
Ce quen puis sçavoir  
Bien voy que ma vie  
Si est estable  
Pour douleur avoir  
Fortune devoir  
A moy decevoir  
Si fait sa puissance  
Quant ne puis avoir  
Or, argent navoir  
Pour ma delivrance  
Car si grant finance  
Toute ma chievance  
Ne pourroit fournir  
Plus nay esperance  
Davoir alegeance  
Il me fault mourir

Se brief secourir  
 Dieu par son plaisir  
 Ne m'y fait sa grace  
 Las suis de gesir  
 En grant desplaisir  
 Ne sçay que je face  
 De ma povre face  
 La couleur sefface  
 Tant suis en tourment  
 Dieu si la parface  
 Et si la reface  
 En alegement  
 Car trop longuement  
 Je suis vrayement  
 En merencolie  
 Dieu tres humblement  
 Et piteusement  
 Du cuer je supplie  
 La vierge Marie  
 Et sa compaignie  
 Bien vueil deprier  
 Du mal qui mennuye  
 Que nuyt et jour crye  
 Me vueille venger  
 Qui suis prisonnier

## AUTRE COMPLAINCTE.

Plus ne sont en ma compaignie  
 Joye, soulas, ne chiere lye  
 Espoir, ne confort, ne lyesse  
 Esbatement si ny est mye  
 Plaisance si en est bannie  
 Bouté hors les en a rudesse  
 Pour y mettre merencolye  
 Et desplaisance qui me ennuye  
 Douleur, desconfort et tristesse  
 Courroux, soucy, dangier, envye



Chascune si est establee  
A moy servir par grant destresse

Souventes fois me sert dangier  
Si fait courroux oultre mesure  
Nuyt et jour si me fait manger  
De langoisse qui est trop dure  
Elle vient de mauvais vergier  
Telle poire qui nest pas mure  
Crainte si la me fait ronger  
Las ce nest pas ma nourriture.

Gesir me font dessus la paille  
Pain et eau si est ma vitaille  
Helas vecy trop dure vie  
Je souloye manger volaille  
Et le poisson a grosse escaille  
Mais il convient que je loublie  
Pouls et puces me font bataille  
Car jen ay plaine ma drapaille  
Desquelz ma chair est assaillie  
Ainsi fault que mon temps sen aille  
Et tout par faulte de cliquaille  
Ma vie si sera faillie.

De leur service suis tant las  
Que je ne le sçay a qui dire  
Souvent me font crier helas  
Tant me font souffrir grant martire  
Ilz mont osté joye et soulas  
Lesquelz me souloient conduire  
Bien voy puis que suis en leur las  
Que la mort me veulent esduire.

### LE PRISONNIER.

Ung jour vint a moy desconfort  
Qui desespoir si mamena

Dequoy il me desplut moult fort  
Car durement me pourmena  
Se ce neust esté reconfort  
Qui espoir ci me ramena  
Je cuide que je fusse mort  
Tant desconfort me demena.

Reconfort si tres doucement  
Se print a moy reconforter  
Et si me remonstra comment  
Je me devoye conforter  
Tant fit par son doulx parlement  
Que desconfort fit deporter  
De la peine et du tourment  
Qui me vouloit faire porter.

Voulez vous ouyr racompter  
De reconfort et sa parolle  
Laquelle il me vint compter  
On ne la doit tenir a folle  
Grant plaisir prins a lescouter  
Il me souvint dung apostole  
Oncques ne vy pour moy doubter  
A mon gré tel maistre descole.

Reconfort me vint saluer  
Car a mon fait eust grant esgart  
Douleur si me faisoit suer  
De tous costez et tost et tart  
La couleur me print a muer  
Quant je vy son tres doulx regard  
Oncques ne me sçeuz remuer  
Jusques il me dist Dieu te gart.

Son estat et son doulx maintien  
Estoit tant bel et son langage  
En son parler ne disoit rien  
Quil ne veusist de bon courage  
Si me dist, amy entens bien

Ma parolle et mon langage  
Tais toy et ecouste et retien  
Et si le metz en ton usage.

Bien voy que desconfort te trouble  
Garde toy bien de toy troubler  
Ton cueur qui est frauc et si noble  
Desconfort le te cuide embler  
Ne ty fie il est trop double  
Ne le vueilles point ressembler  
Tu trouveroyes ton fait si trouble  
Que ne le pourroyes assembler.

COMMENT LE PRISONNIER RESPOND A RECONFORT.

Ha reconfort se je me plains  
Jay bien cause de moy complaindre  
Mon cueur est de douleur si plains  
Que de bleu en noir le fault taindre  
Pardonnez moy se me complains  
Pas nay cause de moy desplaindre  
Puis que a nul dire mes plains  
Ne puis, a moy il me fault plaindre.

RECONFORT RESPOND.

Amy, or ne croy nullement  
Desespoir quon ta amené  
Car tu seroyes follement  
Trop mal seroyes pourmené  
Car se par leur enchantement  
Ilz ten avoient amené  
A grant peine et grant tourment  
Certes tu seroyes mené.

Desconfort si est tres mauvais  
Mais desespoir est encor pire  
Car desespoir si sert dung mes  
Qui fait lhomme du tout destruire  
En luy ne te fie jamais  
Car tu seroyes a martyre  
Na desconfort ne te submes  
Car ilz sont plains du peché dyre.

Desespoir si est ung peché  
Comme je trouve en escript  
Car cil qui en est entaché  
Peché contre le saint esperit  
Fais que ton cueur si soit fiché  
A aymer du tout Jesuchrist  
Se desespoir tavoit taché  
Tu seroyes a antechrist.

Se par fortune tu as peine  
Pas ne ten dois desesperer  
Ta volenté seroit villaine  
Tu la dois trop bien supposer  
Pacience la tres certaine  
Vueilles en ton cueur emposer  
A desconfort point ne te maine  
Car il te devroit trop peser.

Du monde na vertu tant belle  
Que la vertu de pacience  
Cest des vertus la vraye estoille  
La plus belle de sapience  
Du tout te dois fier en elle  
Et avoir parfaicte science  
Et ne doute point, car cest celle  
Qui vers Dieu a plus daudience.

Ceste vertu Dieu esprouva  
Quant souffrit battre sa chair tendre  
En lestache et le prouva  
Quant en la croix se souffrit pendre

La pacience Dieu trouva  
Pour nous rachapter et deffendre  
Du peché quadam nous couva  
Dont dampnez estions sans attendre.

Les saintz par le temps quilz regnoient  
Que les tyrans les martyroient  
Et aussi les benoistes saintes  
De grans tourmens ilz enduroient  
Qui grans douleurs si leur faisoient  
Car leurs chairs en estoient poinctes  
Mais pacience ilz avoient  
Et Dieu parfaitement aymoient  
Damours qui nestoient pas faintes  
Et par ce point tres bien sçavoient  
Que paradis ilz acquerroient  
Et viendroient a leurs atteintes.

Encor te vueil je racompter  
Une pacience mondaine  
Laquelle on doit bien compter  
Car ce en est une fontaine  
Ce fut Job qui la vout porter  
Pacience la tres certaine  
Car doucement vout supporter  
Mainte douleur et mainte peine.

## DE JOB.

Job fut ung homme moult notable  
Riche, puissant et veritable  
Et qui voulentiers Dieu servoit  
Job si fut homme honorable  
Aux povres estoit charitable  
Et leur donnoit ce quil avoit.  
Job fut tres doulx et amyable  
Et en tous ses faitz raisonnable

Nul plus estre ne le pavoit  
Du monde de plus piteable  
De plus courtois de plus féable  
En son vivant on ne sçavoit.

Job si vult tout son temps user  
A bien faire et a bien dire  
Oncques ne se vult abuser  
A mal faire et a mal dire  
Rien a nul ne sçeut refuser  
Ne creature esconduire  
Tout son temps vult sans plus muser  
Au vouloir Dieu du tout conduire.

Combien que Job fust tant parfait  
Neantmoins eut beaucoup a faire  
Dieu voulentiers cecy si fait  
A son amy pour le parfaire  
Mais Job soustint si bien son fait  
Que pour riens quon luy sçeust forfaire  
Son bon vouloir ne fut forfait  
Fors le vouloir Dieu tousjours faire.

Job vint a grant nécessité  
Et eut mainte adversité  
Mais doucement les supportoit  
Il fut en toute povreté  
De tous biens fut inhabité  
Paciemment il le portoit  
Job fut du tout desherité  
Et mis jusqua mendicité  
Car dhuy en huys se transportoit  
Mais par tres grant humilité  
Regraciant la deité  
Du tout a Dieu se rapportoit.

Job sa lignée si perdit  
Ne point ne luy en demeura  
Mais ung tout seul mot si nen dit  
Ne oncques certes nen plora

Tousjours a servir Dieu tendit  
Et songeusement honnora  
Graces du tout si luy rendit  
Et de bon cuer si ladora.

Job dist, se Dieu a pris le mien  
Mes enfans et tout mon lignage  
Prestez les mavoit tout est sien  
Long temps ma fait grant avantage  
Bien sçay que je navoye rien  
Fors que de sa grace usage  
Encor ma il fait trop de bien  
Graces luy en rendz et hommage.

Job fut bon povre et bon riche  
En tous estatz bien se porta  
Du tout ne comptoit une niche  
Le bien et le mal supporta  
Quant Job si fut du tout en friche  
Et plus a Dieu se transporta  
Tant qua la fin ne fut pas triche  
Lange es cieulx lame porta.

Se tout compter je te vouloye  
De Job la belle pacience  
Certainement je ne sçauroye  
Il y faudroit trop grant science  
Or prens de Job la droicte voye  
En amendant ta conscience  
De pacience te pourvoye  
Si auras de Job laliance.

### LE PRISONNIER.

Reconfort bien vouldroye ensuyvre  
Job qui fut si noble docteur  
Lequel trestout son temps vult vivre

A bien servir son créateur  
Mais grant douleur au cueur me livre  
Job qui fut si noble facteur  
Par ce que il dit en son livre  
Vix justus salvabitur.

Job qui fut de tous biens fontaine  
Eu son livre si dist qua peine  
Le juste saulvé si sera  
Il a mené vie humaine  
Et toutefois il se demaine  
Disant quil ne sçet quil fera  
Las moy qui ay vie mondaine  
Menée qui est incertaine  
Ma douleur point nalegera  
Se aucunement ne mamaine  
Parolle vraye et certaine  
Qui mon vouloir confortera.

#### RECONFORT RESPOND AU PRISONNIER.

Amy pour toy reconforter  
Il convient que je te responde  
Or me vueilles donc escouter  
Qui plus est sage en ce monde  
Et plus luy verras Dieu doubter  
Se Job doubtoit a ce te fonde  
On doit craindre a soy bouter  
Eu la vallée denfer parfonde.

Je te dy tout premierement  
La mort du pecheur nullement  
Dieu si ne veult uy ne demande  
Mais veult quil vive longuement  
Pour venir a amendement  
Et quen vivant toujours samende  
Dieu de sa bouche proprement



Nous baille cest enseignement  
Par levangile le nous mande  
Mais qui vivra plus largement  
Sans samender aucunement  
Tant plus grosse sera lamende.

Je te dy sans plus enquerir  
Du monde na si grant pecheur  
Que sil veult bien Dieu requerir  
Quil ne soit plus grant pardonneur  
Mais il fault sa grace acquerir  
Par repentance de douleur  
Se ceste voye veulx querir  
Tu ne pourroyes trouver meilleur.

Se exemple en veulx avoir  
Assez certes il en y a  
Par saint Pierre le puis sçavoir  
Qui trois fois Dieu si regnia  
De soy repentir fist devoir  
Et doucement sumilia  
Tant quen la fin cecy est voir  
Du tout a Dieu se ralia.

Saint Paul fut grant persecuteur  
Durant le temps quil fut payen  
Et fut moult grant executeur  
Dessus le peuple chrestien  
Depuis il congneut son erreur  
En soy repentant par moyen  
Tant que il fut noble docteur  
Et fit après beaucoup de bien.

La glorieuse Magdaleine  
Mena longtemps vie mondaine  
Et si fut grande pecheresse  
Mais depuis print vie humaine  
Pour repentance tres certaine  
En grant douleur et en destresse  
De repentance fut si plaine

De ses yeulx fit une fontaine  
Tant a fait au cuer grant tristesse  
De paradis tres souveraine  
Conquist par sa noble proesse.

Elle en est noble appelée  
De miracles a renommée  
Et de tout bien tres vertueuse  
Sus les vierges enluminée  
Aux apostres est comparée  
Par sa voullenté gracieuse  
Aux martyrs est associée  
Tant eut la voullenté piteuse  
La vierge royne couronnée  
Si est d'elle accompagnée  
Es cieulx ou est vie joyeuse.

Judas si fit moult grant offence  
Quant le roy de toute puissance  
Vendit pour souffrir passion  
Et depuis par desordonnance  
Se pendit par desesperance  
Et se mit a perdition  
Dont les clerks dient sans doubance  
Que sil eust eue repentance  
Dieu en eut eu compassion  
Car il ne veult point de vengeance  
Sil eust prié par diligence  
Dieu luy eust fait remission.

#### DU BON LARRON.

Depuis que Jesuchrist vult naistre  
Quant en la croix se souffrit estre  
Pour racheter l'humain lignage  
Ung larron fut mis a sa dextre  
Et ung autre a la senestre

Dequoy ly ung si fut moult sage  
Car Dieu pria disant, mon maistre  
De ta grace me vueilles paistre  
Je ten supplie de bon courage  
Mais Dieu qui bien le sçeut cognoistre  
Si luy dist, avec moy ton estre  
Ennuyt seras hors de servage.

Lautre si se desconfortoit  
Sans point avoir compassion  
Mais a Dieu dist quil ne sostoit  
Sil avoit domination  
Le bon luy dist que fol estoit  
De faire tel petition  
Par ce quil sen alla tout droit  
En enfer a dampnation.

APRES CES CHOSSES REMONSTRÉES PAR RECON-  
FORT AUDIT PRISONNIER, LEDIT RECON-  
FORT LUY RACOMPTE DUNG AULTRE  
LARRON QUI FUT SAUVÉ PAR SA  
REPENTANCE.

Encor te vueil compter et dire  
Dung larron une hystoire  
Qui moult fut plain du peché dyre  
La chose si est bien notoire  
Cest beau patron pour toy conduire  
Se le retiens en ta memoire  
En ton cueur le te fault escrire  
Du tout si ne vault une poire.

Ung larron fut et ung meurtrier  
Qui des maulx sans nombre faisoit  
Les gens si alloit espier  
Puis les roboit et les tuoit

Au jourdhuy ung, et deux hier  
Toute personne le doubtoit  
En luy nul ne se peut fier  
Par tous les lieux ou il estoit.

Mainte creature tua  
Et fit des maulx tres largement  
Mais depuis son vouloir mua  
En soy repentant durement  
Et en larmes si tressua  
En prenant bon amendement  
Dont depuis ne se remua  
Et vous orrez tantost comment.

Helas dist il: Or voy je bien  
Que dampné suis par mes meffaitz  
Car en ma vie je ne feis bien  
Mais des maulx sans nombre jay faitz  
Se peusse trouver bon moyen  
Que je peusse estre confes  
Plusieurs de mes maulx que je tien  
Si en pourroient estre deffaiz.

Mais a aller je noseroye  
En bonne ville ne entreprendre  
Car bien sçay que pris je seroye  
Pour moy bien pugnir sans attendre  
Droit au gibet mené seroye  
Pour moy faire mourir et pendre  
Car des maulx ay fait tel monjoye  
Que nul ne le sçauroit comprendre.

En ce point fort se lamentoit  
En ayant grande repentance  
Et moult fort se desconfortoit  
Neantmoins faisoit penitence  
Il ne beuvoit ne ne mangeoit  
Tant estoit plain de abstinence  
Nul homme compter ne sçauroit  
Comment avoit grant conscience.

Ung jour se print a adviser  
Et luy souvint dung hermitage  
Lequel estoit sur ung rochier  
Assis assez pres dung boscage  
A lhermite vout adresser  
Car il estoit bon clerc et sage  
Et prestre pour soy confesser  
A y aller print le voyage.

Trop si fut ce larron espris  
Daller parler a cet hermite  
Mais trop doubtoit a estre pris  
Pource que il estoit en fuyte  
Neantmoins son chemin a pris  
Affin quil en peust estre quicte  
Des grans maux quil avoit compris  
Moult doucement fist sa poursuyte.

Son chemin print par le travers  
Sans tenir ne sentiers ne voyes  
Souvent alloit le dos envers  
Par boys, par buyssons et par hayes  
Ses membres estoient tous couvers  
De sang tant y avoit de playes  
Son voyage fut si divers  
Que dire je ne le sçauroye.

Le larron tant alla et vint  
Quil approcha de lhermitage  
De lhermitage luy souvint  
Qui estoit près dung grant village  
Son chemin prendre luy convint  
Tout au plus hault de ce boscage  
Or escoutez quil en advint  
Assez ay compté du voyage.

Quant il fut monté sans attendre  
Lhermitage vout approucher  
Le chemin ne sçavoit comprendre  
Car il estoit sur le rochier

Son chemin commença a prendre  
Lequel si luy cousta moult chier  
Car ainsi quil cuida descendre  
Tout jus se print a trebuscher.

Lhermite si le vit cheoir  
Et trebuscher moult doucement  
Il le pavoit tres bien veoir  
A son huys estoit proprement  
Lhermite si fist son devoir  
De le secourir bonnement  
Mais riens ny fist sachez de voir  
Car il mourut soubdainement.

Ainsi le larron se tua  
En cuidant le roc avaler  
Noncques puis ne se remua  
Lhermite y cuida aller  
Mais tout son sang si luy mua  
Dont vous orrez icy parler  
Car grande merveilles veu a  
Laquelle ne se doit celer.

Il vit une compaignie danges  
Qui sur le mort si arriverent  
De cherubins et de archanges  
Lame prindrent et emporterent  
De chansons belles et estranges  
En lemportant tout hault chanterent  
En rendant graces et louenges  
A Dieu es cieulx ainsi monterent.

Quant lhermite si eut tout veu  
Il sen alla devers le mort  
Le larron tantost a cougneu  
Car de luy se doubtoit moult fort  
Dequoy il fut trestout esmeu  
Et en print moult grant desconfort  
Quant il eut le fait apperceu  
Bien luy semble que on luy fist tort.

Lhermite sesbahyt fortment  
Comment la chose se peut faire  
Ce larron qui si longuement  
Si navoit cessé de mal faire  
Et qui avoit si faulcement  
Voulu tuer et gens deffaïre  
Son ame veert promptement  
Porter es cieulx pour la reffaïre.

Las, dit-il, jay usé ma vie  
A servir Dieu et nostre dame  
Sans faire mal ne villenie  
Et sans avoir aucun diffame  
Mais ce meurdrier qui a meurdrie  
Plusieurs hommes et mainte femme  
Et je voy telle compaignie  
Porter en paradis son ame.

A peu ne tient que je ne dye  
Que mauvais doye devenir  
Si sera mon ame ravie  
Ou jay veu celle la venir  
Mais Dieu qui son amy noublie  
Lange a luy feist venir  
Qui losta de merencolie  
Parquoy au bien se vould tenir.

Lange luy dist, tu dois sçavoir  
La grace Dieu est nompareille  
Se lame du larron avoir  
A voulu si ne ten merveille  
Tousjours est prest de recevoir  
Qui a bien faire sappareille  
Mais quil face bien son devoir  
Et a le servir se travaille.

Après luy compta sans cesser  
Du larron son intention  
Comment se venoit confessër  
Par tres grande devotion

Le monde si vouloit laisser  
Par une grant contriction  
Le chemin nosoit approucher  
Doubtant de sa destruction.

Combien quil eust esté tempté  
Et que maint peché il eust fait  
Il estoit fort entalenté  
Et repentant de son meffait  
Par ce Dieu luy donna santé  
Par repentance fut refait  
Pource que bonne volenté  
Si est réputée pour le fait.

Se as ouy chanter beaulx ditz  
Ne ten merueille nullement  
Car nous faisons en paradis  
Du pecheur rejouyssement  
Plus de quatre vingtz et dix  
Qui nont besoing damendement  
Pource que les bons sont tousdis  
A nostre bon commandement.

Combien que par ce il nentend pas  
Que laisser doives a bien vivre  
Mais te gouverne par compas  
Garde que peché ne ten yvre  
Car tu ne sçez pas ton trespaz  
Ne quant pourras estre delivre  
Si te conduis par se bon pas  
Qua Dieu servir du tout te livre.

Lhermite plus ne vout enquerre  
Quant eut ouy ceste nouvelle  
Le mort tantost si alla querre  
Pour lenterrer en sa chappelle  
Une fosse si fist en terre  
Enterrer si le fist en celle  
Ceste hystoire en ton cueur serre  
Car elle est bonne et belle.



## CY APRES PARLE DE THEOPHILUS.

Encor te vueil dire comment  
Theophilus si eust grant blasme  
Qui par son fol gouvernement  
Renia Dieu et nostre dame  
Lettre de son sang proprement  
Fist au dyable par grant diffame  
En luy dormant generalement  
Quant quil avoit et corps et ame.

Neantmoins, sadvisa arriere  
En soy repentant par maniere  
De la faulte quil avoit faicte  
Et fist doucement sa priere  
Envers la vierge tresorriere  
Qui de secours est tant parfaicte  
Mais celle douce aulmosniere  
Si nen fut pas rude ne fiere  
Mais fist tant que sa paix fut faicte  
Par la douce vierge tres chiere  
Car la lettre si fut deffaicte.

Se plus compter je ten vouloye  
Dautres assez je ten diroye  
Assez en as pour le present  
Or te remetz droit a la voye  
De prier Dieu que te pourvoye  
Et de ton corps luy fais present  
Santrement fais tu te feroye  
Tout ne vault ung clou de couroye  
Se tu ne prens Dieu a garant  
Mieux conseiller ne te sçauroye  
Se de parler je ne cessoye  
Et fusse ton prochain parent.

Amy mas tu bien entendu  
Je ne sçay que tu contrepenses

Je voy ton vouloir tout tendu  
Se me semble en desplaisance  
Ton sang si est tout respandu  
Garde que vers Dieu tu noffences  
Car je te voy tant esperdu  
Au moins dy moy ce que tu penses.

#### LE PRISONNIER RESPOND A RECONFORT.

Ha reconfort trop je mettroye  
Se tout compter je te vouloye  
Ce que jay dedans ma pensée  
Aussi certes je ne pourroye  
Car de douleur est ma montjoye  
En mon cueur trop fort amassée  
Combien que me monstres la voye  
Parquoy conforter me devroye  
Et ma douleur estre cessée  
Mais suppose que je la voye  
Remedier je ny sçauroye  
Tant est ma douleur entassée.

#### RECONFORT.

Supplie Dieu et nostre dame  
De la garde de tes enfans  
Et aussi de ta povre femme  
Bien voy que de douleur en fens  
Garde que nen aye diffame  
Car envers Dieu trop fort offens  
Pense seulement a ton ame  
Et de lennemy te deffens.

#### LE PRISONNIER.

Helas trop me seroit contraire  
Se mon cueur convenoit retraire

De celle qui tant la retrait  
En elle mon cuer voulz attraire  
Car dung arc damours me vint traire  
De doulx regard estoit le trait  
Des ans il y a sept et treize  
Que mon cuer en luy voulz pourtraire  
Ne oncques puis nen fut fortrait  
Il nest rien qui me peust surtraire  
Delle et me deust on detraire  
Tant est mon cuer en luy entrait.

## RECONFORT.

Amy il le te fault passer  
Car tu es en trop dur passage  
Vueilles ton vouloir compasser  
Ou autrement tu nes pas sage  
Tout homme convient trespasser  
Tant soit grant ne de fort corsage  
Mais pour parler de repasser  
Jamais tu nen verras message.

Se tu es en affliction  
Endurer te fault et souffrir  
Prie Dieu par devotion  
Et a luy te vueilles offrir  
Se tu as bonne intention  
Point ne te laissera mourir  
Par luy auras salvation  
Et si te viendra secourir.

Toute personne que Dieu ayme  
Qui a aucun encombrement  
Ceste chose cy est certaine  
Que Dien est compains du tourment  
Mieux si te vault estre en peine  
Avecques Dieu assemblement

Que avoir plaisance mondaine  
Et en voye de dampnement

Dieu dist quil rendra le merite  
Des peines que pour luy on prent  
La promesse nest pas petite  
Car grant joye en soy comprennent  
Or fais labour qui te prouffite  
Car se desconfort te surprend  
Tu perdroyes joye eslite  
Dieu par cecy si le taprent.

Tu ne perdras fors par paresse  
La grant joye qui point ne cesse  
Laquelle Dieu si te promet  
Dieu tousjours son homme adresse  
Et luy donne quelque lyesse  
Sa le servir bien sentremet  
Et se il chet il le redresse  
Et le soustient quil ne se blesse  
Ou le bon ange y commet  
Le vouloir Dieu fais sans tristesse  
Pour acquerir la grant promesse  
A laquelle il se soubmet.

#### LE PRISONNIER.

Ha reconfort je vous mercye  
Le bien et la grant courtoysie  
Que de grace vous mavez faicte  
Remis mavez de mort a vie  
Ma volenté si est ravie  
Et ma douleur du tout deffaicte  
Dieu de bon cuer je regracie  
Et la douce vierge Marie  
De cuer et volenté parfaicte  
Que ma douleur si est faillie

Si leur plaist je les en supplie  
 Leur voulenté si en soit faicte.

BALADE LAYÉE QUE LEDIT PRISONNIER FIT  
 LE JOUR DE NOEL.

Puis que du jour de Noël me souvient  
 Qui est ennuyt prier Dieu me convient  
 Et requérir en ma nécessité  
 Que du grant mal qui nuyt et jour me tient  
 Par fortune qui sur moy la maintient  
 Et mainteñt tout lyver et lesté  
 Que douze moys en ce point jay esté  
 Si luy supplie en ma nécessité  
 Qu'il luy plaise estendre sa largesse  
 A moy oster le mal qui fort me blesse  
 Combien de tout le loue et lay loué  
 Mais sil luy plaist que ma douleur me cesse  
 Et moy donner aucun peu de lyesse  
 Jen crieray noel noel uoel.

Crier noel très bien il appartient  
 Quant en ce monde ung tel prince si vient  
 A son peuple donner sa charité  
 Car cest celluy qui le monde soustient  
 Trestout le cueur certes si me revient  
 Quant me survient de son humilité  
 Luy qui est roy de toute majesté  
 Qui naistre vult en grande povreté  
 Emprès le beuf et en costé lasnesse  
 O doulx Jesus qui as tant de noblesse  
 Desnoue moy du neu dont suis noé  
 Car fortune me detient en sa laisse  
 Mais sil te plaist que elle me delaisse  
 Jen crieray noel noel noel.

Et se par toy aucun bien ne madvient  
 Je pers espoir et ne sçay quil devient

De tout confort je suis desherité  
Desplaisance trop fort si me detient  
Se reconfort par toy ne me revient  
De trestout bien je suis inhabité  
Or me tiens je du tout en orfenté  
Sil ne te plaist par ta felicité  
Sur moy monstrier ta tres noble proesse  
Je te voue et si te fais promesse  
Que se dicy puis estre desnoé  
Et moy oster le dueil et la tristesse  
Qui nuyt et jour ainsi le cuer me presse  
Jen crieray noel noel noel.

Royne des cieulx tres puissante princesse  
Mon reconfort et ma douce maistresse  
De tres bon cuer a toy me suis voué  
Tu es celle qui maint pecheur redresse  
Je te supply que me monstre ladresse  
Et jen criray noel noel noel.

LEDIT PRISONNIER FIT CESTE BALADE LE  
PREMIER JOUR DE LAN.

Or ay je veu le temps que je souloye  
Estre estraine, et aussi jestrenoye  
Ce jour de lan, mais je doubte sans faille  
Que puis quil fault que prisonnier je soye  
Et que fortune si fortment me desvoye  
Par ce moyen que la reigle ne faille  
Car je sçay bien je nay denier ne maille  
Et par ainsi par faulte de cliquaille  
Mes estraines par ce point cesseront  
Pour ceste fois ainsi se passeront  
Drapper ne puis par deffaulte de laine  
De prieres mes estrenes seront  
Dieu doint a ceulx qui me conforteront  
Bon jour bon an et la tres bonne estraine.

Je doubte moult que au jourdhuy ne voye  
Mes estraines vers moy prendre leur voye  
Pour me mener grant guerre et grant bataille  
Pour ce qu'avoir ne pevent de moy monnoye  
Bien taille suis que remis je ne soye  
En la prison couché dessus la paille  
Poulx et puces seront en ma drapaille  
De pain et de aue si sera la vitaille  
Ainsi mes maistres a moy se courceront  
Et encor pis mettre ilz me feront  
Dessus le gril ou dedans francolaine  
Mais se Dieu plaist ilz se deporteront  
Dieu doint a ceulx qui me conforteront  
Bon jour bon an et la tres bonne estraine.

Helas ma seur quant devers vous jestoye  
A ung tel jour de mes biens vous donnoye  
Et en prison fault que mon temps sen aille  
Or nest il moys que vers vous je nenvoye  
A celle fin qua mon fait on pourvoye  
Mais je ny voy appointement qui vaille  
Battu seray et destoc et de taille  
Des coups auray plus que poisson descaille  
Tous mes membres après sen sentiront  
Las je ne sçay que mes amys diront  
En eulx avoye esperance certaine  
Je congnoistray tous ceulx qui maymeront  
Dieu doint a ceulx qui me conforteront  
Bon jour bon an et la tres bonne estraine.

Prince a tous ceulx qui adonc aideront  
Et ceulx aussi qui me pourchasseront  
A moy oster de ceste griefve peine  
Et a ceulx qui dicy men gecteront  
Dieu doint a ceulx qui me conforteront  
Bon jour bon an et la tres bonne estraine.

---

LEDIT PRISONNIER FIT CESTE BALADE LÈ  
JOUR DE LA PURIFICATION.

O vierge royne couronnée  
Une priere baladée  
Vueil faire par devotion  
En lhonneur de ceste portée  
Laquelle fut par toy portée  
A ta purification  
Au temple a saint Symeon  
Nunc dimittis servum tuum  
En le recevant si chanta  
Par ceste presentation  
Tu es en domination  
Post partum inviolata.

Tu fuz vierge avant nommée  
Vierge après es appelée  
Sans nes une corruption  
Par toy la porte est deffermée  
Qui par Eve nous fut fermée  
Par peché de temptation  
Ta noble generation  
Nous a mis a salvation  
Benoist soit qui tel fruict porta  
Porte las sans affliction  
Dont tu es sans condition  
Post partum inviolata.

Tres douce royne redoubtée  
De ta grace soit escoutée  
Par toy ma supplication  
Je suis en prison fort fermée  
Se par toy ne mest deffermée  
Du tout suis a perdicion  
Fais a ton filz petition



Qu'il me fasse remission  
 Si vrayment qui me rachata  
 Par sa benoïste passion  
 Toy qui es en possession  
 Post partum inviolata.

Royne en grant contrition  
 Je te prie par dilection  
 Eya eyro advocata  
 Metz moy hors de ceste prison  
 Et je diray sans mesprison  
 Port partum inviolata

### LE PRISONNIER.

En la prison je fuz malade  
 Tellement que ne peuz manger  
 Si pris a faire une balade  
 Pour moy contre le mal venger  
 Homme qui est en tel danger  
 Contre le mal si doit fuyr  
 Lyesse le doit revenger  
 Malade se doit resjouyr.

### BALADE.

Or est il temps que je commence  
 Que ma balade puisse faire  
 Si prie Dieu a grant puissance  
 Que sens me doint pour la parlane  
 Si qu'il luy plaise a retraire  
 Le mal dont suis entalente  
 Dire je ne doy le contraire  
 Dieu en face sa volente.

Helas vecy trop dure dance  
Se la mort me vouloit attraire  
Car il ny a escu ne lance  
Ne archier tant bien sache traire  
Que de la mort se sçeust fortraire  
Par ce mon cueur est tourmenté  
Rien ny vault le crier ne braire  
Dieu en face sa volenté.

A ceste mort souvent je pense  
Qui ainsi si me veult deffaire  
Et je voy bien que desplaisance  
Si tend moult fort a moy retraire  
A nul si ne vueille desplaire  
Se je pense de ma santé  
Car de penser ne me puis taire  
Dieu en face sa volenté.

Prince soyez moy debonnaire  
Car je suis tout espoventé  
La mort autour de moy repaire  
Dieu en face sa volenté.

**CY APRES COMMENCE LE TESTAMENT QUE  
ICELLUY PRISONNIER FIT CUIDANT MOU-  
RIR LUY ESTANT EN PRISON.**

On dit que tout bon chrestien  
Quant vient a son trespasement  
Si doit or disposer du sien  
Et faire aucun testament.

Leglise cecy nous commande  
Pour ce y devons obeyr  
Aussi seroit il en amende  
Qui youldroit desobeyr.

Son me respond, et qui na rien  
Il ne peult faire ordonnance  
Fais ce que peulx car Dieu sçet bien  
La voulenté et la puissance.

Or fault il donc que le mien face  
Se je vueil faire mon devoir  
Mais sil advient que je trespasse  
De lacomplir, c'est assavoir.

Chascun sçet que suis prisonnier  
Et je sçay bien trop que la gent  
Ne fait rien que pour le denier  
Que feray je se nay argent.

Au fort puisquil le convient faire  
Je le feray si tres petit  
Que ung mien amy a le parfaire  
Pourra prendre son appetit.

Si prie a Dieu de paradis  
Que a le faire me doint grace  
Tellement en faitz et en ditz  
Que son vouloir du tout je face.

Premierement luy reudz mon ame  
Du tout la metz en sa commande  
Aussi fais je a nostre dame  
De tres bon cueur luy recommande.

Item prie saint Michel lange  
Que mon ame vueille conduire  
Et de lennemy la revenge  
Affin quil ne me puisse nuire.

O patriarches et prophetes  
Apostres et evangelistes  
A mon ame avoir si faictes  
La grant joye que vous acquistes.

Martyrs, confesseurs et hermites  
De moy vous plaise souvenir  
Que mon ame par voz merites  
Puisse lassus es cieulx venir.

Les saintes ne vueil oublier  
Jay bien besoing de leur poursuyte  
Toutes les vueil bien supplier  
Mon ame soit par eulx conduyte.

Sainctz et saintes vueil requerir  
Tous et toutes ensemblement  
Quil leur plaise de acquerir  
A mon ame son sauvement.

En la foy de Dieu vueil mourir  
Qui pour moy souffrit passion  
Pour moy saulver et secourir  
De voye de dampnation.

A tout le monde mercy crie  
Se je me suis habandonné  
A faire mal ne vilenie  
Pour Dieu quil me soit pardonné!

Je vueil que mes debtes se payent  
Premierement et mes tors faiz  
A toutes gens amendes oyent  
Si sen alegera mon faiz.

Aux jacobins eslis la terre  
En laquelle vueil estre mis  
Pource quaux jacobins Daucerre  
Gisent plusieurs de mes amys.

Ung drap blanc estendu sera  
Sur ma chasse en souvenance  
Que nul homme n'emportera  
Autre chose de sa chevance.

Encor le drap blanc signifie  
Douleur et grant humilité  
Pource qua la fin de la vie  
Doit estre tout orgueil gecté.

Mais sus le drap je vueil chappeaulx  
Desquelz il sera tout couvert  
Et quilz soyent jolys et beaulx  
De belle herbe toute vert.

De venque les chappeaulx seront  
Cest herbe assez tost trouvée  
A tous ceulx qui honneur feront  
Au corps si en auront livrée.

Ceste venque a tel nature  
Verde est yver et esté  
Aussi doit toute creature  
Tousjours tenir sa loyauté.

La verdeur signifie lyesse  
Car tout homme doit de cuer fin  
Louer Dieu quant si bien ladresse  
Quil le reconnoist a la fin.

La venque dont je vous fais feste  
Plusieurs gens lappellent pervenche  
Et en porte on sus sa teste  
De beaulx chappeaulx dessus sa menche.

Encor vouldroye bien avoir  
Des menestriers ou trois ou quatre  
Qui de corner feissent devoir  
Devant le corps pour gens esbattre.

Que vault le plourer ne le braire  
Quon fait après ung trespasé  
La mort on ne sauroit retraire  
Puisque le coup si est passé !

Puisque je meurs tout advisé  
De mon fait de ma conscience  
Comme jay dessus devisé  
Je dois avoir en Dieu fiance.

Item au monstier je vueil estre  
Porté par quatre laboureurs  
Qui des vignes seront tins maistre  
Car de telz gens suis amoureux.

En signe que du grant labour  
De ce monde en l'autre vais  
Cest ung voyage sans retour  
Dieu doint quil ne nous soit mauvais.

Item les laboureurs auront  
Chascun cinq solz d'argent contant  
Les menestriers qui corneront  
Si en auront chascun autant.

Et quant est en mon luminaire  
Je nen vueil en rien deviser  
L'exécuteur le pourra faire  
Tel qui luy plaira adviser.

Il me suffira d'une messe  
De requiem haulte chantée  
Au cueur me feroit grant liesse  
Se estre pavoit deschantée.

Combien qui plus dire en voudroit  
Pas ne voudroye contredire  
Mais plus d'argent il y faudroit  
Et cest ce qui le me fait dire

Et encor trop bien je voudroye  
Qua tous chantres qui chanteront  
Qu'on leur donnast or ou monnoye  
Dequoy bonne chiere feroient.

A ce rapporter me convient  
Que mes executeurs auront  
Ordonne, car se deulx ne vient  
Mes ordonnances cesseront.

Mes executeurs vueil eslire  
Aumoins tandis quil men souvient  
Affin quil leur plaise conduire  
Mon fait se le cas y advient.

Je eslys Vitry le premier  
Sil luy plaist il nest pas estrange  
Et avec luy jay bien mestier  
De Perrenet du Boc du Cange:

A eulx deux jay ma grant fiance  
Car trouvé les ay mes amys  
Pour descharger ma conscience  
Si leur plaist je les ay commis.

Se je meurs ilz sen yront  
Sil leur plaist mes amys prier  
Et mon testament leur diront  
Affin quilz me vueillent ayder.

Davoir argent presentement  
Trouver ne puis autre maniere  
Et on dit tout communement  
De vuide main vuide premiere.

Silz ne pevent trouver monnoye  
Pour accomplir ce testament  
Mais que en terre sainte soye  
Il me suffit tant seulement.

Se autre chose faire ne puis  
De mon povoir je men acquiete  
Advis mest que vers Dieu je suis  
Par ce point de volenté quicte.

Se Dieu ne veult a moy entendre  
A moy donner quelque santé  
Je luy pry quil me vueille prendre  
Tout a sa bonne voullenté.

In manus tuas domine  
Commendo spiritum meum  
Se par trop suis enluminé  
Bien devray chanter te deum.

Je vous pry que près de la place  
Ou seray mis quon face escrire  
Ces vers icy en peu despace  
En lieu que on les puisse lire.

Tel et tel oster conviendra  
Pour le droit nom et surnom mettre  
Et puis le temps on comprendra  
Par bon moyen selon la lettre.

Icy devant en ceste terre  
Gist tel et tel bailly Daucerre  
Tout estendu le dos envers  
Lequel par fortune de guerre  
A Beauvais vint la mort acquerre  
Et sur ce vout faire ces vers  
Maintenant est mangé de vers  
Ses membres en sont tous couvers  
Lan mil quatre cens en fevrier  
Trente deux se dit prisonnier  
Audit moys mourut ung lundy  
Or veuillez Dieu pour luy prier  
Que son ame vueille aliger  
Sic transit gloria mundi.

---



**COMMENT LEDIT PRISONNIER APRES SON  
TESTAMENT FAIT PRIT CONGÉ.**

Puis que je voy que me convient mourir  
Piteusement par deffault de santé  
Que personne ne me veult secourir  
Attendre fault de Dieu sa voulenté  
De dire a dieu me suis entalenté  
Au departir tandis quil men souvient  
A dieu vous dy se mourir me convient.

Dire vous vueil dont me suis remembré  
En sommeillant dune trop dure dance  
Quon appelle la dance macabre  
Je doute moult qua teile je ne dauce  
Car jay au cueur douleur qui trop mavance  
Je tiens teneur, mais la mort contre tient  
A dieu vous dy se mourir me convient.

Tres hault prince noble duc de Bourgongne  
Conte de Flandres et du pays Dartois  
En vous servant et en vostre besougne  
Mourir me fault tres doulx prince courtois  
En ce point suis il y a treize moys  
Que fortune en cest estat me tient  
A dieu vous dy se mourir me convient.

Et vous aussi haulte puissant princesse  
A qui Dieu doint honneur santé et joye  
Depuis le temps que estes ma maistresse  
De vous veoir grant voulenté avoye  
Mais fortune si sest mise en voye  
Qui dy aller durement me retient  
A dieu vous dy se mourir me convient.

A dieu vous dy chevaliers, escuyers  
A dieu la court et trestoute noblesse

Servy vous ay en mon temps voulentiers  
Bien voy quil faut qua ce coup je vous laisse  
A dieu joye et trestoute lyesse  
Mon cueur se part et ne sçay quil devient  
A dieu vous dy se mourir me convient.

A dieu vous dy dames et damoiselles  
A dieu vous dy marchandes et bourgeoises  
Toutes vous ay trouvez bonnes et belles,  
Doulces, plaisans, gracieuses, courtoises  
Perdre me fault a ceste fois mes aises  
Car rudesse mes joyes si detient  
A dieu vous dy se mourir me convient.

A dieu a dieu povre cité Daucerre  
De moy long temps avez été servie  
Et maintenant par fortune de guerre  
En dangier suis que ne perde la vie  
Se fait danger qui a sur moy envie  
Qui en douleur durement me maintient  
A dieu vous dy se mourir me convient.

A dieu prelatz et toutes gens deglise  
Qui a Aucerre avez vos benefices  
Je vous supply que chascun si advise  
Se en mon temps vous ay faiz nulz services  
Priez pour moy chascun en voz offices  
Mourir me fault se Dieu ne me soustient  
A dieu vous dy se mourir me convient.

Archediacles et chantres et chanoines  
Soyent reguliers ou soyent irreguliers  
Prestres, cloistriers, moynes noirs et blancz moynes  
Les jacobins avec les cordeliers  
Priez pour moy et dictes vos psaultiers  
Je vous en prie comme il appartient  
A dieu vous dy se mourir me convient.

A dieu ma seur et ma chiere compaigne  
Or entendez a ce que je vous mande

Je vous supply pour Dieu quil vous souviengne  
De noz enfans, je les vous recomande  
Autre chose certes ne vous demande  
Priez pour moy se le cas y advient  
A dieu vous dy se mourir me convient.

Gens de conseil vers lesquelz je souloye  
Moy conseiller, a dieu je vous vueil dire  
Je pers le sens et le bien que javoye  
Après de vous tant ay de deuil et dire  
Se je me meurs Dieu me vueille conduire  
Je sens trop bien le mal qui me survient  
A dieu vous dy se mourir me convient.

A dieu nobles et les bourgeois aussi  
A dieu a dieu drapiers et espiciers  
A dieu marchans mourir me fault icy  
A dieu a dieu massons et charpentiers  
Car massonner faisoie volentiers  
Mais fortune a ce coup me retient  
A dieu vous dy se mourir me convient

A dieu vous dy toutes gens de mestier  
Aussi faiz je a ceulx de labourage  
A ceste fois jay de vous tous mestier  
Trouvé me suis en douloureux servage  
Courroux me fait nuyt et jour grant outrage  
Je sens trop bien la mort qui a moy vient  
A dieu vous dy se mourir me convient.

A dieu vous dy a tous les habitans  
Qui sont Aucerre et dedans Vezelay  
Aymez vous ay et servys tout mon temps  
Mais je voy bien que plus nay de delay  
Plus ne feray rondeaulx ne virelay  
Se autrement le cueur ne me revient  
A dieu vous dy se mourir me convient.

A dieu a dieu mes parens, mes amys  
Oncles, tantes, nepveux, cousins, cousines

A dieu vous dy a grans et a petis  
A dieu voisins et toutes mes voisines  
A dieu varletz et a dieu mes machines  
Mourir me fault se la mort ne sabstient  
A dieu vous dy se mourir me convient.

A Nicolas mon sosson de prison  
Desiré Marc sil vous plaist vous direz  
A mes amys sans nulle mesprison  
De mon estat quant vous en yrez  
Car bien compter certes vous le sçaurez  
Mon fait sçavez comment il se contient  
A dieu vous dy se mourir me convient.

A dieu mon maistre nommé Pierre Du Puis  
A dieu no dame et trestout le mesuage  
Je vous supply si fort comme je puis  
Quil vous plaise a faire mon message  
Aux prisonniers qui sont en ce tourage  
Quilz prient pour moy se la mort si maintient  
A dieu vous dy se mourir me convient.

A dieu vous dy Beauvais et Beauvoisin  
Et a tous ceulx qui y font leur demeure  
Je doubte moult que soye vostre voisin  
Car avec vous convient que je demeure  
La mort me fait le cueur plus noir que meure  
Elle me tue se joye ne parvient  
A dieu vous dy se mourir me convient.

*Du temps que ledit prisonnier commençoit  
a faire ses complainctes en lan quatre cens  
trente et deux, aucunes gens qui naymoient pas  
ledit prisonnier se trouverent par devers le roy  
Charles septiesme dont Dieu ayt lame en Tou-  
raine qui rapporterent audit roy comment ledit*

*prisonnier estoit en prison dans la ville de Beauvais en Beauvoisin, et rapportèrent beaucoup de mauke du dit prisonnier, pour laquelle chose le roy envoya hastivement ung escuyer nommé Alingeron qui pour lors estoit bailly de Sentis et de Beauvoisin auquel luy fut fait commandement pource que ledit Beauvais estoit de son bailliage quil sen allast audit lieu de Beauvoisin pour faire mettre a mort ledit bailly prisonnier. Mais il trouva en ladicte ville de Beauvais, la Hyre, Poton de Saintrailles, Floquet, messire Theaulde de Vasperge, Monsieur de Moustieraulier, Ricarville, messire Rignaut de Fontaines et plusieurs autres qui allerent au contraire, parquoy ledit Alingeron ne peut exploicter ledit mandement qui avoit esté ordonné pour plusieurs causes qui se disent cy après.*

CEST UNE COMPLAINCTE NOUVELLE QUE  
LEDIT PRISONNIER FIT.

Je voy trop bien quant a cela  
Quen mon fait na tour ne demy  
Car je ne voy ne ça ne la  
Personne qui parle pour my  
Je souloye chanter my la  
Mais chanter si my fault lamy  
Or garde son amy qui la  
Car en prison na nul amy.

Le lombard dit en ung commun langage  
Homo morto amico perduto

Oublié est tant soit de grant lignage  
 On ny attend ne quarto ne quinto  
 Puis dist après en son patois sauvage  
 Homo en peison non est comisuto  
 Plus na amys ne nes ung parentage  
 Bien lapperçoy dedans mon memento.

## BALADE.

Jay veu quon estoit bien joyeux  
 Davoir parens et grant lignage  
 Car on en souloit valoir mieulx  
 Mais a present gy ay dommage  
 Si vueil prendre le dit du sage  
 Qui dist, mieulx vault amy en voye  
 Que ne fait denier en courroye  
 Car mes parens sont endormis  
 Auxquelz esperance javoye  
 Et pource bien avoir vouldroye  
 Moins de pareus et plus damys.

Bien doy louer le roy des cieulx  
 Qui ma donné telle avantage  
 Dung amy qui est tant songneux  
 A moy oster hors de servage  
 Et ne me cognoist point, ce sçay je  
 Neantmoins de confort me pjourvoye  
 Plus que dire je ne sçauroye  
 Du tout a mon fait sest soubmis  
 Trop louer je ne men pourroye  
 Et pource bien avoir vouldroye  
 Moins de parens et plus damys.

Venir fais ma femme et mon fieulx  
 Par devers moy tenir ostage  
 Se supplie le Dieu des dieulx  
 Qui leur doint faire bon voyage

Se jestoye hors de cest tourage  
A mes parens trop bien diroye  
Comme a eulx tenu seroye  
Non pas comment mavoient promis  
De telz parens me passeroye  
Et pource bien avoir vouldroye  
Moins de parens et plus damys.

Prince roy des cieulx or envoye  
Bien et honneur santé et joye  
A lamy que tu as commis  
En paradis si le convoye  
Et pource bien avoir vouldroye  
Moins de parens et plus damys.

LEDIT PRISONNIER FIT CE QUI APRES ENSUIT  
POUR LE MEILLEUR AMY QUIL EUT  
ONCQUES PENDANT SA PRISON.

Se sçavez prendre par maniere  
Ce dont chasteaulx et tours se font  
Et y adjouster la matiere  
Dequoy les livres escriptz sont  
Sans vous y bouter plus parfond  
Le nom de mon amy sçaurez  
Par qui mes douleurs se meffont  
Et le surnom avec aurez.

BALADE.

Je ne sçay se la mort meslongne  
Mais mon cueur trop fort se remue  
Ce seroit trop bien ma besongne  
Selle pouvoit estre perdue

Autour de moy cest trop tenue  
Je la devroye bien doubter  
Mais se je peusse escouter  
Bonnes nouvelles que jattens  
Je me peusse reconforter  
Dieu me vueille faire apporter  
Après fortune le bon temps.

Je doubte bien quil me conviengne  
A attendre la revenue  
De plaisance quelle revienigne  
En elle jay mon attendue  
Selle fault ma joye est perdue  
Je me tiens mort a brief compter  
Mais selle sçet tant racompter  
Que mes maistres soyent contens  
Mon fait se pourra supporter  
Dieu me vueille faire apporter  
Après fortune le bon temps.

Moult me tarde que le jour viengne  
Que doyve payer mon yssue  
Et quant je seray en Bourgongne  
Je payeray ma bien venue  
Car jay long temps esté en mue  
Ou du mal on ma fait porter  
Mais se je me puis transporter  
Ancerre vers les habitans  
Chascun me viendra conforter  
Dieu me vueille faire apporter  
Après fortune le bon temps.

Prince veuillez moy visiter  
Ne me laissez desheriter  
A estre hors dicy je tens  
Si vous plaise moy en gecter  
Après fortune le bon temps.

---



COMMENT LEDIT PRISONNIER COMMENÇOIT  
 UNG PEU A SOY RESJOUYR DE LESPOIR  
 QUIL ATTENDOIT, ET FIT CESTE  
 CHANSON QUI CY APRES CE  
 COUPLET ENSUYT.

En attendant le secours  
 De ma tres loyalle amye  
 Pour oublier mes doulours  
 Vueil faire chanson jolye  
 Par elle sera ravie  
 Ma joye je my attens  
 Autrement je pers la vie  
 En espoir je passe temps.

## CHANSON.

Doulce maistresse  
 Se par vous je nay lyesse  
 Aucunement  
 Mourir me fauldra briefment  
 En grant tristesse.

Belle entendez ma raison  
 A vous me plains de dangier  
 Qui me fait du mal foison  
 Et me detient prisonnier  
 En tel destresse  
 Nuyt et jour le cuer me blesse  
 Durement  
 Souffrir me fait grief tourment

Par sa rudesse  
Doulce maistresse, etc.

Helas se suis en prison  
Ne me vueillez oublier  
Apportez moy guerison  
Pour ma douleur allegier  
Mon cueur ne cesse  
Dattendre vostre largesse  
Doulcement  
Se par vous nay allegement  
La mort me presse  
Doulce maistresse, etc.

COMMENT LEDIT PRISONNIER SE COMPLAI-  
GNOIT DE SA FEMME LAQUELLE FUT  
PRISE EN VENANT VERS LUY.

Haro haro las que feray je  
Haro vecy dure nouvelle  
Haro venu mest ung messaige  
Qui ma douleur trop renouvelle  
Car sans mal engin et cautelle  
Ma femme et mon filz sont pris  
Sans trouver faulceté en elle  
Et sans avoir en rien mespris.

Ha noble seigneur de hault pris  
Qui de Gaucourt avez surnom  
De vous saufconduyt avoye pris  
Pour lamour de vostre bon nom  
Pour Dieu gardez vostre renom  
On a esté de rien encontre  
Qui dira ouy je dy que non  
Bien en oseroye respondre.

Ne laissez vostre honneur confondre  
Vous estant lieutenant du roy

Car de douleur me fauldroye fondre  
Se vouliez souffrir tel desroy  
Remediez y par arroy  
Comme le sçaurez bien comprendre  
Car gens qui sont de tel arroy  
Certes si sont bien a reprendre.

Trop hardis sont de entreprendre  
Contre vous qui avez puissance  
De les faire noyer et pendre  
Ce vient de grant outrecuidance  
Pour Dieu or faictes diligence  
Le saufconduyt soit réparé  
Pour moy donner quelque allegence  
Ou jamais joye je nauray.

Car celle na pas comparé  
Que pour moy doive mal porter  
Mon cneur si fust tout réparé  
Se vers moy se peust transporter  
A vous men convient rapporter  
Four Dieu faictes votre devoir  
Sa douleur ne puis supporter  
Helas mettez peine a lavoïr.

Car a tous je fais assavoir  
Que se brief elle n'est delivre  
Vivre ne puis pour nul avoir  
A la mort du tout je me livre  
Ainsi si finera mon livre  
Puis que ne puis faire autrement  
Je le sens bien plus ne puis vivre  
Mourir me fault piteusement.

Quant elle qui si doucement  
Si venoit pour ma delivrance  
A esté prise faulcement  
Sur saufconduit Dieu quel fiance  
Mectre on la veult a finance  
Sans ce quelle ait en rien forfait

Or Dieu si nous doit patience  
Il me semble que cest tort fait.

## LAY.

Mon cuer se deffait  
Quant tout par mon fait  
Elle a tant d'affaire  
Fortune le fait  
Son cuer est infait  
A nous deux deffaire  
Et rien contrefaire  
Ne puis ne forfaire  
Pour avoir secours  
Je ne puis retraire  
Par plourer ne braire  
Toutes mes doulours  
A dieu mes amours  
Or a dieu mes flours  
A dieu ma mont joye  
En plainz et en plours  
Sen vont mes coulours  
Mon plaisir ma joye  
Tant vous desiroye  
Et joyeux estoye  
De vostre venue  
Car je m'attendoye  
Que pour vous seroye  
Mis hors de la mue  
Or est bien perdue  
Toute m'attendue  
Car a tres grant tort  
Elle est detenue  
En prison tenue  
En grant desconfort  
Je me tiens pour mort  
Se brief bon rapport  
Je nay de la belle  
Quelle soit au port

Parquoy reconfort  
 Je puis avoir d'elle  
 Mon cueur si l'appelle  
 Sil nen a nouvelle  
 Mourir le convient  
 La vierge pucelle  
 Si ayde celle  
 Qui lame soustient  
 Car selle ne vient  
 Fortune me tient  
 En trop grant martire  
 Quant il me souvient  
 Que on la retient  
 Ma douleur empire  
 Chanter puis et dire  
 Du cueur je souspire  
 Et pleure souvent  
 La mort si me tire  
 Se vers moy de tire  
 Par le poursuyvant  
 Ne me vient allegement  
 Nuyt et jour la mort si me chasse  
 Et ne cesse de moy chasser  
 Se le seigneur si ne pourchasse  
 Son selle on fait pourchasser  
 Il me fauldra faire enchasser  
 Mort ou vif dedans une chasse  
 Car je ne sçay tant rechasser  
 Que fortune ne me rechasse.

# RONDEL.

Jattens nouvelle de la belle  
 Qui me venoit reconforter  
 Dieu les me doint faire apporter  
 Dont ma joye se renouvelle.

Car de tout le monde cest celle  
 Par qui mes maulx puis supporter  
 Jattens nouvelle, etc.

Se brief je nay nouvelle d'elle,  
Ma douleur ne puis plus porter  
A Dieu men convient rapporter  
Saint Gabriel bonne nouvelle  
Jattens nouvelles, etc.

Se je nay nouvelle seure  
Briefment que mon cueur rassure  
De celle qui devoit venir  
Mon cueur ne peult plus soustenir  
Le mal que je sçay quelle endure.

Tout mon vouloir se destature  
Sans raison suis et sans mesure  
Ne je ne sçay que devenir  
Se je nay nouvelle, etc.

Helas la bonne creature  
Monstroït bien sa douce nature  
De venir hostage tenir  
Mon mal ne puis plus retenir  
Car la note trop si me dure  
Se je nay nouvelle, etc.

Du vendredy benist  
Faire je vueil dentente pure  
Ce vendredy benoïst ung dit  
Devant la precieuse figure  
De Jesus qui en croix pendit  
Pour nous quant Judas le vendit  
Sans cesser prier me convient  
Pource que moult souvent on dit  
Quon crie tant noel qui vient.

---

BALADE LAYÉE DE LA PASSION NOSTRE  
SEIGNEUR.

Jesus par grant contrition  
A toy ma supplication  
A tel journée vueil je faire  
Qué pour moy souffris passion  
Ayes de moy compassion  
Car nuyt et jour jay trop daffaire  
Fortune bien me veult deffaire  
Quant ma femme et mon filz venoient  
Lesquelz bon saufconduyt portoient  
Neantmoins on les a detenuz  
Ma delivrance pourchassoient  
Helas du mal assez avoient  
Miserere mei deus.

Dimenche par devotion  
Vint prendre la possession  
De hierusalem et repaire  
Le peuple par dilection  
Vint a grant congregation  
A laudevant pour toy complaire  
La chose te devoit bien plaire  
Des enfans qui rainceaulx gectoient  
Et qui a haulte voix chantoient  
Gloria laus benedictus  
De lentrée joyeux estoient  
Car doucement te recevoient  
Miserere mei deus.

Mercredy la vendition  
Aux juifz par temptation  
Judas de ton corps vult parfaire  
Et jeudy au mont de Syon  
De la cene refection

Tes apostres si voulz refaire  
Mais le jourdhuy roy debonnaire  
Les juifz lesquels pris tavoient  
En lestache si te battoient  
Tes membres furent estendus  
En la croix et si les clouoient  
Et despines te couronnoient  
Miserere moi deus.

Prince tes playes sur moy soient  
Estenduz et si me convoyent  
Car tous maux sont sur moy venus  
La nuyt et le jour me guerroyent  
Se tes vertus ne me pourvoyent  
Miserere mei deus.

#### RIME COMMUNE.

Helas sans plus rien deviser  
Chascun se peult bien adviser  
Et penser dedans son courage  
Que fortune me fait grant rage  
Quant a elle ne suffit pas  
De moy tenir en son trespas  
Se ma femme et son enfant  
Ne retient dont le cuer me fent  
Et si nest pas par mon deffault  
Helas icy ma rime fault  
Du mal je porte tel foison  
Que suis sans rime et sans raison  
Ne jamais mon cuer naura joye  
Jusques nouvelles d'elle jaye  
Pour le fait de sa delivrance  
Qui puisse estre a sa plaisance.

---



## RIME COMMUNE.

Helas puis que parler convient  
On dit que quant ung mal si vient  
Que volentiers seul ne vient mye  
Jà nest besoing que plus en dye  
On le peult bien apercevoir  
Car combien que jaye fait devoir  
Et ma femme sa diligence  
De trouver quelque alegence  
Neautmoins a pleu a mon maistre  
De moy faire sur le greil mettre  
Au pain et eaue de douleur  
Qui me fait perdre ma couleur  
En ce point me convient mourir  
Se Dieu ne me vient secourir  
Et poulx et puces et punaises  
Perdre me font toutes mes aises  
Jay bien ma part des biens de France  
Dieu les me doint prendre en souffrance  
Et a tous autres prisonniers  
Soient deglise ou chevaliers  
Escuyers, bourgeois ou marchans  
Ou laboureurs dessus les champs  
Il en y a moult largement  
En grant peine et en grant tourment  
Qui est chose moult piteable  
La peine est innumerable  
De toutes les pitiez la celle  
Qui soit a comparer a elle  
Jamais homme ne le sçauroit  
Qui essaye si ne lauroit  
Dieu garde tous bons chrestiens  
Destre lyé de telz liens  
Et doint bien briefve delivrance  
A tous ceulx qui sont en souffrance  
Je len supplie de cueur fin  
Et a pardon a nostre fin.

## LE PRISONNIER.

A Beauvais droit devant saint Pierre  
Ou je suis enfermé en pierre  
En grant douleur en grant servage  
Devant la tour de beauvisage  
Enfermé en fers bien estrois  
Lan mil quatre cens trente trois  
En avril du jour vingt six  
Sur la pierre je suis assis  
Ou je fais la fin de ce livre  
En attendant destre delivre  
Mais se Dieu du ciel me pourvoye  
Que estre hors dicy je soye  
Mon livre encores referay  
Et dautres choses y diray  
Dont a present je me vueil taire  
Doubtant qua tous ne puisse plaire  
Mieulx se vault taire pour paix avoir  
Questre battu pour dire voir  
Et encores on dit tousjours  
Longues parolles font cours jours  
Si prie ceux qui le liront  
Et en le lisant trouveront  
Des faultes que ilz les effacent  
Et que pour Dieu ilz les refacent  
On y en trouvera largement  
Faire ne se peult autrement  
En ce point fineront mesdis  
Dieu nous octroye paradis.

BALADE DU PREMIER JOUR DE MAY QUE  
LEDIT PRISONNIER FIT.

Bien soit venu ce premier jour de may  
Qui mapporte grant joye et grant liesse

Osté si ma de douleur et desmay  
Du bon rapport que jay de ma maistresse  
Oncques femme ne fist telle proesse  
Ne poursuyte a plus grant diligence  
Le cuer na pas endormy en paresse  
De son vouloir Dieu luy doint la puissance.

Ung messagier est venn sans delay  
Lequel ma dit que la belle ne cesse  
De pourchasser mon fait et mettre au vray  
Pour moy oster le mal qui tant me blesse  
Cecy luy vient de tres grande noblesse  
Quant tel devoir fait de faire finance  
Et si sçet bien que nous navons richesse  
De son vouloir Dieu luy doint la puissance.

Se vers moy vient bien compter luy sçauray  
Ce quay souffert, la douleur la tristesse  
Mais de la voir tant conforté seray  
Maulgré dangier vueille ou non rudesse  
Mon cuer si a long temps tenu en presse  
A ceste fois il avoit alegence  
Par le moyen de ma douce deesse  
De son vouloir Dieu luy doint la puissance.

Prince damours veuillez monstrar ladresse  
A celle qui poursuyt ma delivrance  
Car cest celle qui mon cuer si radresse  
De son vouloir Dieu luy doint la puissance.

---

Quant ma femme vers moy si vint  
Et mon filz tantost il convint  
Que pour moy tinsissent ostage  
Et leur fut fait maint grant oultrage  
Qui trop long seroit a compter  
Se tout vouloye racompter

Plus nen dy, mais quant fus party  
Et je me trovay sur les champs  
Je ouy des oyseaulx les chans  
Que chantoient du moys de may  
Et combien que fusse en esmay  
Mon cueur se print a resjouyr  
Esperant encor de jouyr  
De la grace dame fortune  
Selle mavoit baillé pour une  
Du bien encor me pourroit faire  
Sans me vouloir du tout deffaïre  
En ce lespoir fut tant surpris  
Que a chanter tantost me pris  
Une chanson que ne feïs oncques  
Mais pourquoy la chantay je doncques  
Pour ce que au cueur me tenoit  
Et a mon propos revenoit  
Maistre Alain duquel Dieu ait lame  
Lequel cy gist soubz une lame  
Si la fit comme lay ouy dire  
Icy apres la vueil escripre.

## CHANSON.

Triste plaisir et douloureuse joye  
Aspre doulceur, reconfort ennuyeux  
Ris en plourant, souvenir oublieux  
Maccompaignent combien que seul je soye.

Embuschez sont affin quon ne les voye  
Dedans mon cueur soubz lumbre de mes yeulx  
Triste plaisir, etc.

Cest mon tresor ma part et ma montjoye  
Parquoy dangier est sur moy envieux  
Bien le sera sil me voit avoir mieulx

Quant il me hait de ce quamours menvoyent  
Triste plaisir, etc.

---

Et quant la chanson euz chantée  
Il me souvint en ma pensée  
Que sans cause je lescripvoye  
Car pas faicte je ne lavoye  
Et quant jeuz pensé longuement  
Je la refis tout autrement  
Pour donner mon fait a entendre  
Ainsi que je sçauray comprendre  
Je vueil estre le charpentier  
Du masson qui est de mestier  
Qui font souvent par leur raison  
De vieil mesrien neufve maison  
Soyent charpentier ou masson  
Je la feray dautre fasson.

#### CHANSON EN BALADE LAYÉE.

Triste plaisir et douloureuse joye  
Aspre douleur, reconfort ennuyeux  
Triste plaisir et douloureuse joye  
Sont avec moy en allant par la voye  
Et si semble que je soye joyeux  
Ce fait fortune qui aussi me desvoye  
Car nuyt et jour trop fort si-me guerroye  
Mais jay espoir au puissant roy des cieulx  
Quant luy plaira quil me soit gracieux  
Se ce nestoit cest espoir je mourroye  
Povre, pensif et melencolieux  
Sans avoir bien, mais a tousjours auroye  
Aspre douleur, reconfort ennuyeux.

Ris en plourant, souvenir oubliens  
Maccompaignent combien que seul je soye

Ris en plourant, souvenir oublieux  
Souloye chanter en voulant par les cieulx  
Et en voulant jay pris une lamproye  
Mais il madvint ung cas moult merueilleux  
Car lous, regards et sangliers perilleux  
Me guecterent pour moy oster ma proye  
Si la mosterent et mangerent le foye  
Dequoy je fus et suis tout roupieux  
Et desrobé du grant bien que javoye  
Car desplaisir avec dueil angoisseux  
Maccompaignent combien que seul je soye..

Embuschez sont affin quon ne les voye  
Dedans mon cueur soubz umbre de mes yeulx  
Embuschez sont affin quon ne les voye  
En mon penser estrains de la courroye  
Du faulx dangier le villain chacieux  
Car la bonne, la douce, simple et coye  
Celle en qui tout reconfort trouvoye  
A mis son corps qui est tant precieux  
Pour moy oster du lieu tres furieux  
Et du dangier dedans lequel jestoye  
De ce plaisir me souvient en tous lieux  
Parquoy souvent je souspire et lermoye  
Dedans mon cueur soubz lumbre de mes yeulx.

Cest mon tresor, ma part et ma montjoye  
Parquoy dangier est sur moy envieux  
Cest mon tresor, ma part et ma montjoye  
Que de courroux qui a nom rabajoye  
Et pensement qui me tient soucieux  
Se ce nestoit espoir qui me pourvoye  
De reconfort tantost mort je seroye  
Car jay perdu tous mes ris et mes jeux  
Tous le peuvent veoir soient jeunes ou vieulx  
Se je mesbas ainsi que je souloye  
Mes faitz en rien ne sont melodieux  
Helas certes dire je ne sçauroye  
Parquoy dangier est sur moy envieux.

Bien le sera si me voit avoir mieulx  
Quant il me hait de ce quamour menvoye  
Bien le sera si me voit avoir mieulx  
Se faulx dangier qui est tant oultrageux  
Et plus rude que dire ne sçauroye  
Mais jay espoir destre victorieux  
Par la vierge qui porta le doulx fieux  
Qui les dolens et tristes cueurs resjoye  
Et le voit bien dangier qui me forvoye  
Et qui du tout si mest maugracieux  
Souffrir me fault et fault que tout je voye  
Cecy luy vient dung cuer moult despitieux  
Quant il me hait de ce quamour menvoye  
Triste plaisir et douloureuse joye.

## LE PRISONNIER.

Or avez vous ouy comment  
Jay mis en mon entendement  
Ainsi que faisoye mon voyage  
Ce rondel en nouvel langage  
Et ma finance pourchassoye  
Et du premier je pris ma voye  
Pour men venir tout droit Aucerre  
Mes parens prier et requerre  
Quil leur plaise a moy aider  
Affin que je peusse vuider  
Mes ostages hors du tourage  
Qui estoient en grant servage  
Pas ne feis a Aucerre demeure  
Ainçois me tiray en peu dheure  
Tout droit au pays de Bourgongne  
Culdant mieulx faire ma besongne  
Et quant fus ou aller vouloye  
Pas ne feis ce que je cuidoye  
Si men revins par la montaigne  
De Chastillon droit en Champaigne

Et dillec je me retournay  
Droit a Lisle et a Tournay  
Et puis a Gand, et puis a Bruges  
Besoing navoye d'avoir les druges  
Puis a Malignes, a Brucelles  
Et trestous ceulx et toutes celles  
Qui de mon fait parler oyoient  
Au cueur grant pitié en avoient  
Et ceulx qui avoient accointance  
A moy si prenoient grant plaisance  
A ouyr de mon livre lire  
Puis me venoient les aucuns dire  
Moult doucement et requerir  
Que pour leurs dames acquerir  
Je feisse chansons et rondeaulx  
Ou mottez qui feussent nouveaulx  
Ainsi quilz vouloient deviser  
Sil me falloit bien adviser  
Que a chascun plaisir je feisse  
Et moy bien garder que ne deisse  
Rien qui a nul si deust desplaire  
Et pour mieulx a chascun complaire  
De tout le mieulx que je sçavoye  
Rondeaulx et virelaiz faisoye  
Et balades pareillement  
Selon leur vray entendement  
Daucuns tantost vous en diray  
Que cy après je escripray.

## RONDEL.

Hau guecte hau, resveille toy resveille  
Ung eschelleur a moy prendre si veille  
Par ung engain fait sans boys et sans corde  
Mes yeulx le guident et mon cueur si accorde  
Se je suis pris ce nest pas grant merveille.

Pourgecté ma dune face vermeille  
Par ung regard de beaulté nompareille



Son doulx maintien ou ten que jen recorde  
Hau guecte hau, etc.

Qui sera las de veiller si sommeille  
A moy garder pour neant on travaille  
De leschelleur requier misericorde  
Requeux ou non et sans nulle discorde  
Son prisonnier je suis qui que le veille  
Hau guecte hau, etc.

## AUTRE BALADE.

Doulce, plaisant, gente et jolye  
Retenez moy vostre servant  
Et je meure joyeusement  
Pour lamour de vous chiere lye.

Pour moy oster melencolie  
Et tout soucy doresnavant  
Doulce, plaisant, etc.

Mon cueur en vous du tout se lye  
Plus vous voit plus se boute avant  
Puis quil vous requiert si souvent  
Retenez le je vous supplie  
Doulce, plaisant, etc.

## FATRAS.

Doulce, plaisant, gente et jolye  
Si rotissoit de la boullie  
Au plus haut dung molin a vent  
Et ung lus en une polye  
Monta dedans ung sac a lye

Ung abbé et tout son couvent  
Trois lieues oultre soleil levant  
Pour veoir le trou dont vient la pluye  
Mais du trou saillit une truye  
Qui des poussins alloit couvant  
Et leur porta a laudevant  
Deux grans tonnes de mallevoisie  
Et leur dist seigneurs je vous prie  
Retenez moy vostre servant.

## RONDEL.

Mourir my fault a grant martire  
Quant veoir je ne puis le mire  
Qui me souloit donner santé  
Pour luy dire ma volenté  
Ainsi que mon cueur le desire.

Bien sçay que souvent il souspire  
Car son doulx cueur vers le mien tire  
Se on ne leust espoventé  
Mourir my fault, etc.

Male bouche luy a fait dire  
Sil vient il le fera destruire  
Dangier aussi sen est vanté  
Mon cueur en est tout tourmenté  
Je les doy bien tous deux mauldire  
Mourir my fault, etc.

## RONDEL.

A dieu joye, a dieu soulas  
A dieu plaisir, a dieu lyesse

Car douleur soucy et tristesse  
Si me detiennent en leurs las.

De les servir je suis tant las  
Que de dire mon cuer ne cesse  
A dieu joye, a dieu soulas.

Ilz me battent dung eschallas  
De desplaisir par tel destresse  
- Et aussi font ils ma maistresse  
Dont ils me font crier belas  
A dieu joye, a dieu soulas.

COMMENT LEDIT PRISONNIER SE COMPLAI-  
GNOIT A CAUSE DE SA FEMME.

Mil quatre cens et trois jestoye  
En grant soucy et hors de voye  
Dedans Gournay en Normandie  
Pour pourchasser ma douce amye  
Qui pour moy si tenoit ostage  
A Beauvais dedans le tourage  
Et en faisant ma diligence  
De pourchasser sa delivrance  
En ce temps dung jour me remembre  
Qui fut quatriesme de septembre  
Que parmy Gournay je queroye  
Moyen pourquoy avoir pourroye  
Ung prisonnier a acheter  
Pour ma compaignie rachapter  
Mais ainsi que alloye querant  
Et ma compaignie pourchassant  
Je vueil dire ce quil madvint  
Dont toujours après me souvint  
Je trouvay une damoyelle  
Douce, plaisant estoit et belle  
Nommer ne sçauroye son nom

Mais de Blangis avoit surnom  
En son maintien tres gracieuse  
Combien que une chiere piteuse  
Faisoit la tres douce pucelle  
Assise dessus une selle  
Ou des nois vers elle cassoit  
Dont doucement se repassoit  
Et quant je vy son doux regard  
Je luy vins dire Dieu vous gard  
Et la saluay doucement  
Selon mon povre entendement  
Si se leva et remua  
Et doucement me salua  
Mais or quant elle fut levée  
Je vis quelle estoit enfergée  
Dont mon cueur souffrit grant martire  
Com cy après vous orrez dire  
Car il me souvint promptement  
De celle qui pareillement  
Pour moy portoit la penitence  
Encor je avoye desplaisance  
De veoir a celle creature  
En laquelle Dieu et nature  
Avoient ouvré si richement  
Porter si dur prisonnement  
Car cest contre Dieu et raison  
Quant femme lon tient en prison  
Mais maintenant lon tient lusance  
Parmy le royaume de France  
Car plusieurs prisonniers mourroient  
Se femmes ne les delivroient  
Pour aller leurs amys chercher  
Si me pris d'elle mapprocher  
Mais tantost des noix me donna  
Et toutes les mabandonna  
Dont je mangeay ou trois ou quatre  
Pour passer le temps et esbattre  
Puis luy enquis dont ce venoit  
Que telle prison si tenoit  
Si me respondit doucement

Que pour son pere proprement  
En la prison tenoit ostage  
Qui me fit mal en mon courage  
Veu sa beaulté, sa contenance  
Sa bonté et sa sapience  
Son maiatien et son doulx langage  
Yssue de noble lignage  
Et puis dautre me souvenoît  
Que par tel point prison tenoit  
Delle me prist si grant pitié  
Que je feis tant par amytié  
Que des fers la feis deffrger  
A ses maistres la feis pleger  
De tenir loyalle prison  
Sans faire nulle mesprison  
Dont tres fort la me mercia  
Et en moy du tout se fia  
Toute bonne estoit ce me semble  
Noz fortunes disions ensemble  
Lung a lautre feablement  
Un jour me requist doucement  
Que pour sa douleur supporter  
Je luy voulsisse apporter  
Et faire tant pour lamour delle  
Une balade bien nouvelle  
Laquelle faire luy promis  
Et ma peine du tout y mis  
Pour son cueur un peu resjouyr  
Cy après la pourrez ouyr.

BALADE LAYÉE QUE LE PRISONNIER FIT  
POUR UNE DAMOISELLE QUI TENOIT  
PRISON POUR SON PERE.

Ma tres douce et plaisante damoiselle  
Je prie Dieu que tres bonne nouvelle  
Il vous envoie de vostre partement

A celle fin que en la saison nouvelle  
Vostre joye du tout se renouvelle  
Et que puissiez trouver loyal amant  
Qui vous ayme de bon cueur vraiment  
Car vous lavez desservy loyaulment  
Chascun le voit, parquoy je le puis dire  
Vostre maintien et bon gouvernement  
Je prie a Dieu sans le dire autrement  
Qu'il vous doint ce que vostre cueur desire.

Se jen avoye en prison une autelle  
Fust par ostage ou par autre cautelle  
Point ne seroit enfermée nullement  
Car je vous tiens a si boune et si belle  
Et courtoise sans point estre rebelle  
Que vous aurez tout habandonnement  
Sur vostre foy sans le faire autrement  
Mais toutesfois portez paciemment  
Vostre prison sans courroux et sans ire  
Après sera vostre honneur grandement  
Je prie a Dieu sans le dire autrement  
Qu'il vous doint ce que vostre cueur desire.

Or requerez la tres douce pucelle  
Mere de Dieu, car par ma foy cest celle  
Par qui pourrez avoir alegement  
Qui de bon cueur la requiert et lappelle  
Soit en moustier ou en une chapelle  
Ou autre lieu a part secretement  
A secourir se mettra doucement  
Celluy ou celle qui requiert humblement  
De reconfort cest le souverain mire  
Or la priez doncques diligemment  
Je prie a Dieu sans le dire autrement  
Qu'il vous doint ce que vostre cueur desire.

Prince damours faictes le jugement  
De la belle qui douloureusement  
Pour son pere si souffre tel martire

En vostre court pourveez la grandement  
Je prie a Dieu sans le dire autrement  
Qu'il vous doint ce que vostre cueur desire.

## BALADE LAYÉE.

Homme qui veult estre tenu pour sage  
Doit Dieu prier de tres humble courage  
Saintz et saintes trestous assemblément  
En leur faisant souventesfois hommage  
Et requerant le tres noble heritage  
Lequel dure perpetuellement  
Qui ainsi fait en mon entendement  
Com je le dis et comme je propose  
Il me semble que cest fait sagement  
De trestous biens cest le vray fondement  
Fol est celluy qui plus demander ose.

Et sil est homme qui tienne son mesnage  
Qui ait hostel qui luy soit davantage  
Rentes et biens assez suffisamment  
Du blé, du vin, du boys et du potage  
Ung beau jardin pour avoir du fruitage  
Pour son estat maintenir doucement  
Sans rien devoir pour vivre lyement  
Sil nest content quant a moy je suppose  
Qu'il est homme de povre entendement  
Et puis dire partout publiquement  
Fol est celluy qui plus demander ose.

De requerir estat cest grant outrage  
Trop biens mondains ne valent ung fromage  
Qui plus en a plus est en pensement  
Nous ne devons pourchasser le dommage  
De nul qui soit, mais autel avantage  
Comment pour nous sans dissimulément  
Tendre devons qua nostre sauvement

Soyons au lieu ou nostre Dieu repose  
Pensons y bien et tres diligemment  
Se nous lavons nous aurons bon payement  
Fol est celluy qui plus demander ose.

Prince royal de tout le firmament  
Je ne requiers de toy tant seulement  
Que ta grace, je ne vueil autre chose  
Et du surplus de mon gouvernement  
Du tout me metz en ton commandement  
Fol est celluy qui plus demander ose.

### DICT EN COMPLAINCTE.

Se devant avez leu vous avez veu comment  
En prison fuz tenu et traité durement  
Tres bien y fuz battu et tres villainement  
Dequoy je me suis teu de parler nullement.

En la dicte prison assez souffris de peine  
Car mes maistres avoient la voulenté villaine  
A Beauvais chascun sçet ceste chose certaine  
Par ung an et huit mois la je fis ma novaine.

Et quant hors je fuz mis pas ne leuz davantage  
Car soubz mon saufconduyt fut fait grant outrage  
Sans faulte fuz repris ou je euz grant dommage  
Laisser vueil tout aller et parler du voyage.

Mez maistres eurent de moy sans partir de la ville  
Mil escus tous comptans et pour autre deux mille  
Mes ostages retinrent plus navois croix ne pille  
Pour le surplus trouver convient voye subtile.

En la prison disoye que quant serois delivre  
Que encor referoye dautre façon mon livre  
Mais tant daffaires jay qua peine je puis vivre  
Qui me font tout mon sang plus dur que pot de cuivre



Pour ravoir mes ostages je vendis de ma terre  
Et puis fuz mes amys deprier et requerre  
Gens deglise et gens laiz avecques gens de guerre  
Et les bons habitans de la ville Daucerre.

Et quant jeuz par tout pourchassé et bien quis  
Je trouvay plus secours en mes amys acquis  
Que en tous mes parens tant fussent bien requis  
Louer dois Dieu de lheur que telz amys conquis.

Philippe le bon duc de Bourgogne mon maistre  
De ses biens ma voulu tres-largement repaistre  
Et prie le doulx roy qui de vierge vult naistre  
Quil luy doint a sa fin paradis pour son estre.

Des grans biens quil ma faiz bien doy estre contant  
Car par luy suis delivre com vous vais racomptant  
Si furent mes ostages si dois dire pourtant  
Que qui bon maistre sert bon loyer en attend.

Qui bon maistre sert  
Bon loz en attend  
Son loyer ne pert  
Qui bon maistre sert  
On doit estre appert  
De servir pour tant  
Qui bon maistre sert  
Bon loz en attend.

Bien ma recompensé de trestout mon service  
Et puis si ma remis arriere en mon office  
Se ne le congnoissoye tenu seroye pour nice  
Et plain dingratitude qui est tres-mauvais vice.

Plusieurs autres si eut lesquelz pareillement  
Si me firent des biens assez et largement  
A eulx je me repute tenu tres-grandement  
Je les ay tous escriptz en mon entendement.

Trop longuement mectroie se les vouloye dire  
 Mais tous dedaus mon cueur je les ay fait escrire  
 Si prie a Dieu du ciel qui est souverain mire  
 Que il leur doint a tous ce que leur cueur desire.

Les grans biens quilz mont faiz raconter ne sauroye  
 Ne les recompenser aussi je ne pourroye  
 Mais le corps et le cueur, le poumon et le foye  
 Sont leurs pour les servir quelque part quilz soient.

Icy feray\*ma fin, plus ne pense descrire  
 Si prie tous ceulx qui ce livre voudront lire  
 Que pardonner me vueillent sil y a a redire  
 En le faisant jestoye tout plain de dueil et dire.

Je prie le vray Dieu quil doint paix et santé  
 Au noble sang de France, et des biens a planté  
 Et a leur povre peuple qui tant est tourmenté  
 Et a la fin sa gloire se cest sa volenté. Amen.

CY. APRES SENSUYT UNE REQUESTE QUE  
 LEDIT PRISONNIER FIT A MONSEIGNEUR  
 LE DUC DE BOURGONGNE AU PARTIR  
 DE LA PRISON.

Tres-humble supplication  
 Vous fait par lamentation  
 Piteusement sans fixion  
 Vostre povre bailly Daucerre  
 Qui vous a par dilection  
 Seray en bonne intention  
 Et sans dissimulation  
 Par temps de paix et temps de guerre  
 Dont il a grant vexation  
 Et de vous na solation

Car tant a eu d'affliction  
Que vendue en a sa terre  
Contrainct de persecution  
Et doubtant sa destruction  
Tres humblement vous fait requeste  
Que en avez compassion.

Sa terre na pas vendue  
Ne perdue  
Par jeu ne par grant despence  
Deux ans a esté en mue  
En la grue  
En prison en grant souffrance  
En dangier en grant balance  
Et doubtaunce  
La chose est assez congneue  
Perdu y a sa chevance  
A oultrange  
De desplaisir en tressue  
Des escorcheurs escorché  
Et torché  
Prins, navré, escarmouché  
Et haché  
A esté nouvellement  
Son gibassier arraché  
Et sarchié  
Son pourpoint fut destaché  
Et cherché  
Tout par tout bien rudement  
A pied fut mis promptement  
Lourdement  
Et battu villainement  
Longuement  
Son corps en fut tout taché  
Ilouldroit bien vrayement  
Que briefment  
Lescorcheux hastivement  
A tourment  
Au gibet fust attaché.

Mal sus mal si nest pas santé  
Trop sus trop si est grant oultrage  
Votre baillif est tourmenté  
Mal sus mal si nest pas santé  
Et quant il seu est lamenté  
On a dit que cest grant dommage  
Mal sus mal si nest pas santé  
Trop sus trop si est grant oultrage.

## FATRAS.

Mal sus mal si nest pas santé  
Quant incamo en fut planté  
En ung four tout chault plain de neige  
Et freno de sa volenté  
Si a maxillas enchanté  
Et luy a rompu le visage  
De beurre et dung gras fromage  
Gar eorum cestoit vanté  
Que il avoit donné santé  
A constraingre par ung breuvage  
Fait de poil de heste sauvage  
Duquel qui nen beut a planté  
Et dit approximant ad te  
Trop sus trop si est grant oultrage.

---

Prince de puissance  
Ayez souvenance  
De vostre servant  
Sil na alegeance  
Toute desplaisance  
Si le boute avant  
Et je vous couvant  
Que en maint couvent  
A usé jeunesse

A pluye au vent  
Derriere et devant  
Au large et en presse  
En joye et lyesse  
En toute noblesse  
Il se maintenoit  
Se sus sa vieillesse  
Douleur ou tristesse  
Si le gouvernoit  
Tost perdu seroit  
Ne sçay quil feroit  
Tantost seroit mort  
Plus ne chanteroit  
Son temps useroit  
En grant desconfort  
Vous estes le fort  
Plain de reconfort  
Ou du tout se fie  
Il na pas grant tort  
Donnez luy confort  
Il vous en supplie  
Vostre seigneurie  
A toujours servie  
De corps et d'avoir  
En dangier sa vie  
A esté partie  
Pour faire devoir  
Bien pourrez sçavoir  
Se cecy est voir  
Chascun le sçet bien  
Vueillez le pourvoir  
Faictes luy avoir  
Sil vous plaist du bien  
Car servy vous a du sien.

Oyez vostre povre bailly  
Qui se complainct piteusement  
Necessité la assailly  
Pour avoir servy loyaulment  
Se par vous na alegement

Vivre le fault en grant souffrance  
En peine, douleur et tourment  
Qui luy sera grant desplaisance.

Il a toujours vostre ordonnance  
Accomplie de point en point  
Escript luy avez sans doubance  
Plusieurs fois quil ne doubast point  
Et que vous ne luy fauldriez point  
Du tout en tout a vous se fie  
A nul autre ne sattend point  
Vostre sera toute sa vie.

Les mauvais ont sur luy envie  
Ou comptent de vostre service  
Ou il est ; mais je vous affie  
Quil leur fait raison et justice  
Il fait bien, car cest son office  
Rien ne doubte quil ne le face  
A telz larrons nest pas propice  
Parquoy souvent on les menace.

Il nose aller en nulle place  
De plat pays ne de villages  
Se des gens na une grant trasse  
A qui il fait des avantages  
Et si na que cent francz de gaiges  
Pour tout son estat maintenir  
Luy quinziesme et deux mesnages  
Et si luy fault tout soustenir.

Or vous plaise a souvenir  
Du povre bailly souffreteux  
Lequel vers vous nose venir  
Car de demander est honteux  
Et si sont les chemins doubteux  
Pour vous servir a mis en vente  
Les biens dont il est disetteux  
A vous sen complainct et lamente.

Aussi fait-il a vostre tante  
Sa tres-redoubtée maistresse  
Quil luy plaise mettre sentente  
A luy oster la grant destresse  
Qui nuyt et jour le point et blesse  
Laquelle tousjours durera  
Se par vous na quelque lyessé  
Parquoy sa douleur cessera  
Et jamais jour ne finera  
Que soy, sa femme et son mesnage  
En priant Dieu de bon courage  
Pour vous et vostre noble lignage  
Qui vous vueille garder tousdis  
Et vous doint après lheritage  
Du royaulme de paradis.

**AUTRE REQUESTE A TRES-HAUT, TRES-EX-  
CELLENT ET TRES-PUISSANT PRINCE  
MONSEIGNEUR LE DUC DE BOUR-  
GONGNE.**

Tres-noble duc de tres-haulte excellence  
Plain de vertus et de toute puissance  
Vostre bailly Daucerre vous supplie  
Quil vous plaise lavoïr en souvenance  
Servy vous a de bon cueur sans doubtañce  
Trente-six ans en vostre seigneurie  
Vostre pere servit une partie  
Puis vous après sans faire departie  
Tres-humblement si vous requiert pourtant  
Quil vous plaise de vostre courtoisie  
Luy ayder doucement vous en prie  
Car qui bien sert bon loyer en attend.

Vos sujetz a tenus en ordonnance  
Tousjours unis en vostre obeysance

Sans esclandre et sans grant tyrannie  
En vous servant partie de sa chevance  
A despendue, et sest mis en balance  
En grant dangier pour y perdre la vie  
Voz ennemys ont dessus luy envie  
Par plusieurs fois luy ont fait villennie  
Tout ce est vray qui vous va racontant  
Maintenant a la bourse desgarnie  
Necessité le contrainct quil le dye  
Car qui bien sert bon loyer en attend.

Or est ainsi quil sen va hors denfance  
Sa force pert plus naura que loquence  
Des jeux damours ne quiert plus compaignie  
Plus ne pourra porter escu ne lance  
Combien encore il se prent a la dance  
Cuidant faire ung peu de chiere lye  
Et se maintient de maniere jolye  
Mais par ma foy cest ung peu de folye  
Quant il dance il ne va pas saultant  
A fort souffler et suer ne soublie  
A vous se rend sa puissance est faillie  
Car qui bien sert bon loyer en attend.

Prince puissant en mainte seigneurie  
Faictes du bien a celluy qui deprie  
Si luy donnez pour Dieu quil soit content  
A receveur la demande ennuye  
Faictes luy tant que partout il publie  
Car qui bien sert bon loyer en attend.

### REQUESTE.

Se loyaulment vous a servy  
Sil vous plaist faictes luy du bien  
De bien avoir a deservy  
Se loyaulment vous a servy



Pour bien servir sest asservy  
Car despendre y a le sien  
Se loyaulment vous a servy  
Sil vous plaist faictes luy du bien.

CHANSON EN RONDEL QUE LEDIT PRISON-  
NIER FIT DEVANT MONSEIGNEUR LE  
DUC DE BOURGONGNE ET MONSEI-  
GNEUR LE DUC DE BOURBON  
AU BOYS DE DIJON A LEUR  
REQUESTE.

Lay la amans lay la  
Tirez-vous tous en vostre garde  
Chascun en son endroit bien garde  
Lœil au boys deça et dela.

Dangier y est quant a cela  
Qui de tous costez vous regarde  
Lay la, etc.

Amours crient haula haula  
Le deduyt est a lavantgarde  
Le veneur en larrieregarde  
Si va cornant qui la y la  
Lay la amans lay la.

BALADE MORALE QUE LE PRISONNIER FIT.

Na pas long temps que en mon lict jestoye  
En pensement, car point ne sommeilloye  
Si me boutay en grant melencolie

Et en ce point ainsi que je veilloye  
En moy-mesme ung compte je comptoye  
De ce monde son estat et sa vie  
Ou je ne voy que orgueil et envie  
Avarice, luxure et tricherie  
De verité peu de gens tiennent compte  
Loyaulté dort, bonne foy ny est mye  
Tout bien compté il convient que je dye  
Et somme neant a la fin de mon compte.

Et en ce lieu ainsi que je dormoye  
A mon advis peu de gens je veoye  
Aymer le bien de bonne policie  
Car nuyt et jour ung chascun se desvoye  
Pour amasser or, argent ou monnoye  
Et pour avoir la bourse bien fournie  
Puis après vient par une maladie  
Lame du corps estre tantost saillie  
Et devant Dieu si convient quelle compte ;  
La povre chair si est ensevelie  
Mangée de vers et en terre pourrie  
Et somme neant a la fin de mon compte.

Ou est Artus, ou est Hector de Troye  
Ou sont les preux qui crierent Montjoye  
Charlemaigne et sa grant seigneurie  
Ou est Paris qui en amours eut joye  
Ou est Helene la belle simple et coye  
Alexandre et sa chevalerie  
Vespasian qui conquesta Surie  
Et Facinquam qui fut en Lombardie  
Sallisbury qui fut si vaillant comte  
Ou est Boece et Chaton et Thobie  
Ou sont-ilz tous leur puissance est faillie  
Et somme neant a la fin de mon compte.

Se de telz gens nommer je vous vouloye  
Tous trespassez assez en nommeroye  
Il en y a trop grant genealogie  
Après ceulx-la nous fault prendre la voye

Or pensons bien que nul ne se forvoye  
Que lennemy en ses las ne nous lye  
Pensons y bien ou nous ferons folie  
Chascun vers Dieu humblement shumilie  
Pour le grant jour duquel chascun racompte  
Et loquatur est adverse partie  
Radiatur sera la departie  
Et somme neant a la fin de mon compte

O princesse, douce vierge Marie  
Ma deesse, ma maistresse, mamye  
Gardez-moy bien que je ne me mescompte  
A ce grant jour humblement te supplie  
Que face tant que pour Dieu je ne crie  
Et somme neant a la fin de mon compte.

#### LA COMPLAINCTE DE LA MORT DE ANNE DE CHAUVIGNY COMTESSE DE JOIGNY.

Plourez, plourez le comte de Joigny  
Bourbon, Lanciz, du Chon et Dantigny  
Plourez trestous manans et habitans  
Ceulx de Poilly, Bourbilly, Montigny  
Perdue avez ame de Chauvigny  
Vostre comtesse na pas esté long temps  
De plus sage neustes passé cent ans  
Ne plus douce, courtoise, honorable  
Dien la vouloit, nen soyez mal contens  
Après yrons a cela je mattens  
Perdue lavons jamais nest secourable.

Plourez, plourez chevaliers, escuyers  
Bourgeois, marchans et gens de tous mestiers  
Plourez, plourez dames et damoiselles  
Plourez prestres, jacobins, cordelier  
Et chantez messe par dedans ses moustiers

Plourez marchandes, bourgeoises et pucelles  
Plourez, plourez ces piteuses nouvelles  
Vostre mirouer a sa lune cassée  
Plus ny verrez les laides ne les belles  
En ce mirouer plus ny congnoistrez celles  
Puis que la lune est morte et trespasée.

Plourons, plourons, nous servans et servantes  
Plus ne nous fault y avoir noz attentes  
Perdue avons nostre bonne maistresse  
Bien devons estre tous dolens et dolentes  
Querir nous fault noz parens et parentes  
Pour les servir en peine et destresse  
Perdue avons lexemple de noblesse  
Endoctrinée de bons enseignemens  
Pour toutes gens de jeunesse ou vieillesse  
Par son maintien et sa douce simplesse  
Meilleur navoit dessoubz les elemens.

Qui ne plaindroit une si haulte perte  
Que chascun sçet et qui est tant experte  
Quant ceulx qui oncques ne la virent la plaignent  
Et quant sa mort si a esté ouverte  
Et a chascun a esté desouverte  
Non cognoissans durement la complaignent  
Quel dommage quant telz choses adviennent  
Veu la grace que Dieu luy avoit faicte  
Car toutes genz si bonne si la tiennent  
Et en tous lieux la dient et maintiennent  
Car elle estoit sur toutes tres-parfaicte.

Las que dira son bon seigneur de pere  
Et sa notable et tres-bonne grant mere  
Quant ses piteuses nouvelles ilz orront  
Et puis sa sœur, las quel douleur amere  
Et que dira le frere a son frere  
Las quel douleur ilz auront, quel martire  
Jamais douleur ne pourront avoir pire  
Le roy des cieulx les vueille conforter  
Tous plains seront de grant douleur et dire

Ha mort, ha mort, on te doit bien mauldire  
Dieu leur doint tout patiemment porter.

Helas helas qui orroit les complainctes  
Arrachez de son cueur a grants plainctes  
Que nuyt et jour si fait le piteux comte  
En sa chambre a genoulx a mains jointes  
Disant parolles lesquelles ne sont fainctes  
Cest grant pitié que den ouyr le compte  
Car tous les biens delle souvent racompte  
Et puis après se gecte sus sa couche  
A bouchetons et de luy ne tient compte  
Plains et souspirs nesung si nen mescompte  
En souspirant plus dru que chat ne mousche.

La maladie le jour de Noel prit  
Par froidure qui si fort la surprit  
A matines si fut trop longuement  
Cuydant bien faire, combien quelle mesprit  
Le bon comte plusieurs fois len reprit  
La bonne Anne respondoit doucement  
Ha monseigneur cest nostre sauvement  
Ce jour cy est de grant auctorité  
Car ce jourdhuy si est lenfantement  
Que la vierge enfanta humblement  
Le doux Jesus en sa nativité.

Trois jours après son mal plus fort sentoit  
Tousjours disoit que de froit si estoit  
En sa chambre se tenoit chauldement  
Neantmoins sa main sur son ventre mettoit  
Et son enfant remuer si sentoit  
Dont elle avoit grant esbahissement  
Si nen faisoit semblant aucunement  
Mais prenoit tout en grande patience  
En priant Dieu tousjours devotement  
De tres-bon cueur et tres-piteusement  
Elle navoit en autre sa flance.

En bon estat a Noel sestoit mise  
Sa conscience du tout avoit remise  
Au doulx Jesus et a sa voulenté  
Et puis après vould faire son emprise  
Sainsi estoit que de mort fut surprise  
Destre son corps en la terre porté  
En l'hostel Dieu par grant humilité  
Hors de Joigny esleut sa sepulture  
Avec les povres priant la deité  
Quil luy plaise recevoir en pitié  
Celle qui est de mort en adventure.

De testament ne fit autre ordonnance  
Fors seulement quelle donna puissance  
A son mary et a son pere faire  
A leur vouloir elle y avoit fiance  
Et tant certaine de leur grant conscience  
Que ilz mettroient peine pour le parfaire  
Plus rien ny vault ne faire ne deffaïre  
Autre chose si ny fut ordonnée  
Au vouloir deulx du tout se vould abstraire  
En priant Dieu quil luy pleust a retraire  
Son corps son ame quelle luy a donnée.

Et puis après son bon mary manda  
Quant fut venu a Dieu luy commanda  
Et doucement si luy fit sa priere  
Grace et pardon après luy demanda  
Criant mercy et tout luy amenda  
Et quil luy pleust donner sa grace entiere  
Et prendre en gré delle sa chamberiere  
Se envers luy na bien fait son devoir  
En faitz, en dictz, en sens ou en maniere  
Selle a mespris en chose qui naffiere  
Mercy requiert pour pardon recevoir.

Quant le bon comte ouyt ceste requeste  
Helas Dieu sçet quil ne fist pas grant feste  
Au cueur en eut une grant desplaisance  
En arrachant les cheveulx de sa teste

Plourant, criant et bullant comme beste  
Ha Dieu, dist-il, en qui jay ma fiance  
Las me veulx-tu oster mon aliance  
Se tu la mostes si me prens avec elle  
Mon reconfort, toute mon esperance  
Se je la pers je perdray pacience  
Envoye-moy avant la mort cruelle.

La bonne Anne requist moult humblement  
Quon luy donnast son dernier sacrement  
Qui sappelle derniere unxion  
Si la reçeut de cuer piteusement  
Les assistans plouroient moult doucement  
Priant a Dieu pour sa remission  
Au cuer avoit grande contriction  
Et cela fait maint homme et mainte femme  
Virent faire la separation  
Comme il sembloit a leur advision  
Et departir du noble corps son ame.

La ouyssez plourer, crier et braire  
De desconfort nul ne se sçeut retraire  
Plus grant plainte ne sçavoit estre veue  
Cheveulx tirer, arracher et destruire  
Nul si neust peu resister au contraire  
Pour la bonne que lon veoit perdue  
Plusieurs avoient en elle attendue  
Quel dommage de telle creature  
Plus grant douleur si ne fut oucques veue  
Veoir la perte dune telle venue  
Que Dieu avoit formée et nature.

Le dueil si fut le lendemain plus fort  
Plourer veissiez et mener desconfort  
Tout le peuple et tous les habitans  
Criant a Dieu, sire tu nous fais tort  
Tu nous ostes le donion et le fort  
De la bonne nous estions bien contans  
Nous de Joigny manans et habitans  
En elle avions du tout nostre fiance

Femmes filles toutes desconfortans  
Petis enfans salloient lamentans  
Lune des bonnes perdons qui soit en France.

Se tout compter icy je vous vouloye  
Le dueil quon fit dire ne le sçauroye  
Jamais homme ne le sçauroit penser  
Tousjours diray le dueil ou que je soye  
Il nest homme qui assez ne le voye  
Cest tous les jours a le recommencer  
Se personne on en vouloit tancer  
On trouveroit assez gens pour respondre  
Ne preignent pas heure de commencer  
Bien leur fauldroit du premier pourpenser  
Gens trouveroient assez pour les confondre.

La bonne Anne ainsi son temps passa  
Le jour des roys a mynuyt trespassa  
Mil quatre cens avec cinquante six  
Sa povre vie en brief temps compassa  
Et a ce jour grant peuple samassa  
Qui nestoient pas fort bien de sens rassis  
Courcez estoient et dolens et pensifz  
Quant telle dame on na peu secourir  
Rien ny vallent trestous les deffensis  
Venans au monde de peu sont a nansis  
Quant chascun jour ainsi il fault mourir.

A ceste mort doit chascun garde prendre  
Et envers Dieu soy garder de mesprendre  
Car cest celluy qui tout lye et deslye  
A le servir doit chascun bien apprendre  
Et soy garder de plus rien entreprendre  
Contre son vueil, car on feroit folye  
Chascun vers Dieu humblement shumilie  
A celle fin que quant la mort viendra  
Que lennemy qui sur tous a envie  
Ne leur puisse reproucher de leur vie  
Dieu par ce point a luy les retiendra.



Prions Jesus le roy tres-glorieux  
 Prions ce prince qui est victorieux  
 Prions le tous pour ceste trespassee  
 Que a son ame vueille estre gracieux  
 Pour le servir elle a cherché maintz lieux  
 Et mainte peine pour luy si a passee  
 Son plaisir soit que soit recompensee  
 Car servy la en ses faitz et ses ditz  
 Elle en a bien de tous la renommée  
 Si vueille Anne de Chauvigny nommée  
 Pour son salaire luy donner paradis.

CY APRÈS SENSUYT UNG COMPTE LEQUEL FIT  
 LEDIT JEHAN REGNIER, BAILLY DAUCERRE,  
 POUR UNE MAUVAISTIÉ QUE LON VOULOIT  
 CONTRE SON DOMMAGE ET DESHON-  
 NEUR, LEQUEL REGNIER SE GOU-  
 VERNA SI BIEN QUE TOUT VINT  
 A SON HONNEUR ET TOUT FUT  
 SÇEU A LA FIN.

Je vueil icy compter ung compte  
 Au mieulx que le sçauray compter  
 Vray si est ce que je racompte  
 Comme je le vueil racompter  
 On ne me sçauroit mescompter  
 Vous qui gectez et tenez compte  
 Rayez ce qui nest de compter  
 Tout dire si ne me mescompte.

Dung lieu partis ou le flot monte  
 Et avec moy ma compaignie  
 Bon Heu est les autres surmonte  
 Regars plaisans ny faillent mye

Visages fais en femenie  
Gracieux plus doux que par main  
Neantmoins nous tirasmes vie  
Sans attendre le lendemain.

Ce jour prismes nostre chemin  
Ensemble tous estions joyeux  
Tantost en pris ung par la main  
Bien parlant pour deviser mieulx  
Oncques comptes plus gracieulx  
Ne furent ditz ne plus sauvages  
En devisant de plusieurs lieux  
Tant damours que de voyages.

Ainsi que estions en langages  
De tout ce que nous voulions dire  
Nous tous retournions noz visages  
Sus ung qui nest fait que pour rire  
Si lappelle disant beau sire  
Dictes pour vostre bien venue  
Quelle chose il nous fault lire  
Elle sera bien retenue.

Et quant ma voix eut entendue  
Je vis sa couleur empirer  
Mot ne dit, ne que beste mue  
Tres-fort se print a soupirer  
Oncques rien ne vult deviser  
Mais tantost se tira arriere  
Nous tous sçeusmes bien adviser  
Que dolent fut a sa maniere.

Rien ny valut nostre priere  
Tousjours nostre chemin allasmes  
De nous tous se tiroit arriere  
Ce jour a luy plus ne parlasmes  
Bien tard estoit quant nous logeasmes  
Soupper nous convint et loger  
Et puis après nous nous couchasmes  
Pour brief ce compte abreger.

Son soupper si fut bien legier  
Car il ne faisoit que penser  
Toute nuyt ne fit que songer  
Et soy tourner et soy lancer  
Il navoit garde de dancier  
Ne de chanter nen doublez point  
Homme ne leust peu avancer  
A plain chant ne a contrepont.

Le matin vestit son pourpoint  
Au point du jour quant il seveille  
Dieu sçet sil estoit en beau point  
Quant nuyt et jour ainsi travaille  
Car il ne dort ne ne sommeille  
Si convint que nous le vissions  
Dequoy nous donnions grans merveilles  
Et que nous nous en allissions.

Autrement bien fait nous eussions  
Se leussions voulu contredire  
Mais jamais ne le voulussions  
Veu son courroux et son martire  
Tant estoit plain de dueil et dire  
En luy-mesme se lamentoit  
De son fait ne sçavions que dire  
Tant de douleur au cuer avoit.

Je pensoye bien que cestoit  
Mais nul semblant je nen faisoye  
Voyant quil se desconfortoit  
En mon cuer dolent en estoye  
Ne parler a luy je nosoye  
Toutesfois je pris hardement  
Quen chevauchant demanderoye  
Quil avoit ne quoy ne comment.

Si me tiray tout coyement  
Près de luy par bonne maniere  
Et puis tant que peuz doucement  
Envers luy je feis ma priere

Que il me dist damour entiere  
Son cas et quil avoit a faire  
Se la chose nestoit trop fiere  
Jestoye prest de la parfaire.

Et luy ditz cest pour vous deffaie  
De tenir vostre cueur couvert  
Quant il vous vient aucun affaire  
A vostre amy doit estre ouvert  
Soit mol, soit dur, soit meur ou vert  
Quelque chose quil vous adviengne  
A vostre amy soit decouvert  
Et de cecy si vous souviengne.

Ne faictes pas tant quil conviengne  
Que vostre courroux vous deface  
Se longuement fault quil vous tiengne  
Vous en perdrez et corps et face  
Pour quelque chose quon vous face  
Monstrez-vous patient et sage  
Si fort que vostre cueur reface  
Le corps si ny aurez dommage.

Declairez-moy vostre courage  
Et ce dont la douleur vous vient  
Se lon vous a fait point doultrage  
Remedier il y convient  
Se tousjours il vous en souvient  
Vous en aurez douleur villaine  
Dites-moy le mal qui vous tient  
A lamender je mettray peine.

LE RESPONDANT RESPOND CY APRÈS PAR  
LAIZ.

Jay grant courroux qui me pourméne  
En son domaine

Homme plus grant ne peult avoir  
A racompter chose incertaine  
Nul ne se peine  
Raison fera sçavoir le voir  
Helas doy-je mal recevoir  
Grant gré sçavoir  
Ne doy-je qui tel mal menvoye  
Jay fait en tous lieux mon devoir  
Et mon pouvoir  
Rien ny vault Jesus me pourvoye.

A racompter je ne pourroye  
Ne noseroye  
Declairer le mal que je sens  
Je pers mon bien, je pers ma joye  
Ou que je soye  
Ma memoire et tout mon sens  
Dès maintenant je me consens  
Que je suis sans  
Avoir joye ne reconfort  
Homme ny a dicy a Sens  
Jusque a cinq cens  
Mené a plus grant desconfort.

Je pers le donion et le fort  
Dont tenu fort  
Me suis tout le temps de ma vie  
Je pers le chemin et le port  
Par faulx rapport  
De male bouche et denvie  
Qui me cuident oster ma vie  
Par flaterie  
Sans cause me font grant rudesse  
De tous deux convient que je dye  
Dieu les mauldie  
De sospirer mon cueur nen cesse.

Helas jay usé ma jeunesse  
En grant lyesse  
En douceur et en toute joye

Et il convient que en ma vieillesse  
En grant tristesse  
Vive quelque part que je soye  
Par envie qui me guerroye  
Et desvoye  
Tant que ne sçay que devenir  
En ce point vivre ne pourroye  
Ne ne sçauroye  
Bien voy quil me convient finir.

## LACTEUR.

Si luy dis pour le retenir  
Quant je le vis ainsi troubler  
Pour rien qui vous puisse advenir  
Le fol ne vous fault ressembler  
Male bouche vous fait trembler  
Se ses faiz vous sont dommageux  
Les vertus nous fault assembler  
Pour vous deffendre de ses jeux.

Lhomme doit estre courageux  
Pour bien deffendre son bon droit  
Voire qui plus est oultrageux  
Autrement rendre le fauldroit  
Deffendez-vous et parlez droit  
En verité na point de honte  
Deshonneur vous en adviendroit  
De faulx rappors ne tenez compte.

Et quant il eut ouy mon compte  
Ainsi comme je lui sçeuz dire  
Si parle a moy et me racompte  
Comment il souffre grief martire  
Puis après me print a redire  
Je congnois bien que vous maymez

Mon cuer se plainct et souspire  
De ce que dit icy mavez.

Mais toutesfois grant tort avez  
Car bien sçavez  
La fortune qui mest venue  
Tout au long veue vous lavez  
Se vous navez  
Trop fort troublée vostre veue  
Veoir povez que jay perdue  
Mou attendue  
Dont je suis plain de dueil et dire  
Plus dolent na dessoubz la nue  
En une mue  
Me fault bouter sans plus rien dire.

## LAY.

Mon cuer si souffre martire  
Qui fort me tire  
A douleur, car le fait me touche  
Je sens bien le cuer qui empire  
Et si souspire  
Aussi sarte comme une souche  
Tout ce me vient par male bouche  
Qui me accrouche  
De sa volenté tant perverse  
Et sans cause elle mapprouche  
De faulx reprouche  
Pour moy bailler une traverse.

## LACTEUR.

Se male bouche la diverse  
Vous veult sans cause assaillir

Gardez quelle ne vous renverse  
A laudevant vous saillir  
Tout hardiment sans tressaillir  
Preudhomme si se peult bouter  
Tout par tout il ne peult faillir  
A respondre ne doit doubter.

## LE RESPONDANT. LAY.

Or vous plaise moy esconter  
Et bien noter  
Mon cas ainsi que le diray  
Tant de mal si me fault porter  
Et supporter  
Que je ne sçay que je feray  
Na qui je me conforteray  
Na qui diray  
Le mal que jay et la souffrance  
Pas longuement je ne vivray  
La mort auray  
Bien brief par grande desplaisance.

## LAY.

Jay servy depuis mon enfance  
Sans offence  
Ung prince doulx et gracieux  
Sage excellent en puissance  
Sans doubtaunce  
De prince ou ne peult dire mieulx  
Or est ainsi que envieux  
Mes envieux  
Luy ont donné faulx a entendre  
Dont je suis melencolieux  
Le roy des cieulx  
Me doint grace de moy deffendre.



## LAY.

Que jeusse osé entreprendre  
De mesprendre  
Envers celluy quay tant servy  
On me devoit tuer ou pendre  
Sans attendre  
Helas pas ne lay desservy  
Oncques tel chose je ne vy  
Car asservy  
Me suis du mien en son service  
En desplaisance suis ravy  
Quant a la my  
On joue de moy par malice.

## LACTEUR.

Si luy respons vous estes nice  
Davoir telle melencolie  
Vous me semblez une nourrice  
Qui se courrouce a sa boulye  
Il convient que tout si soublye  
Ne vous souviengne plus de rien  
Car ce nest que toute folye  
Vostre desplaisir est le mien.

Trestout vostre fait je sçay bien  
Et dequoy la douleur vous vient  
Je tiens que ce nest que tout bien  
Qui par ce moyen vous advient  
Des gens bien souvent me souvient  
Sinon quant on les voit venir  
Veu en vous se le cas advient  
Grant bien vous en peult advenir.

De parler cuidez vous tenir  
Male bouche avec envie  
Point ne les sçauroient retenir  
Vous ne tous ceulx qui sont en vie  
Pource que en mainte partie  
Et en plusieurs lieux soubz la nue  
Leur grant puissance est departie  
Nul temps elles ne sont en mue.

En leur fait na point de tenue  
Homme ny doit avoir fiance  
Leur vouloir souvent se remue  
Elles nont point de conscience  
Selle peult avoir lialiance  
De fortune pour le deffaire  
Par nostre dame de lience  
Lhomme si aura bien affaire.

Fortune a deux arcs pour traire  
Qui ne sont pas bien accordans  
Lung tire droit, lautre a contraire  
Lung par dehors, lautre dedans  
Lung est sainture sans mordant  
Car il est doulx et debonnaire  
Lautre fait pis que arracher dens  
A personne ne veult bien faire.

Mais je vous diray pour refaire  
Lhomme tandis quil me souvient  
Vers une grant dame retraire  
Incontinent il le convient  
Et se de son party se tient  
Male bouche ne se guisarme  
Ne envie qui la soustient  
Si noseroient crier alarme.

Qui est garde de celle dame  
Que je nay pas encor nommée  
Elle garde le corps et lame  
Elle a nom bonne renommée.

Qui de tous les bons est aymée  
Chascun en bien la peult avoir  
Car elle est tres-bien reclamée  
Mais que lon face son devoir.

Elle est preste de recevoir  
Roys, duez, comtes, seigneurs et dames  
Sans en prendre argent ne avoir  
Et tous hommes et toutes femmes  
Mais que ilz soient sans diffames  
Et sans autre villain reprouche  
Elle les servira sans armes  
Contre envie et male bouche.

Entendez cý le fait vous touche  
Ce que je dy bien retenez  
Se envye si vous approuche  
Bonne renommée tenez  
Avecques vous la maintenez  
Tousjours par grant discretion  
De mal faire vous abstenez  
Et si fuyez sedition.

#### LE RESPONDANT. LAY.

Je n'eüz oncques intention  
N'affection  
Eu ma vie d'autrement faire  
Je ne quiers point discention  
Delection  
Je demande pour mon affaire  
Se envye me veult deffaire  
Sans point meffaire  
Ce mest grant admiration  
Raison requiers pour moy refaire  
Et bien parfaire  
Pour trouver ma sálvation.

## LACTEUR.

Or faisons declaration  
De vostre fait se vous voulez  
Par ma determination  
Advis mest de peu vous doulez  
De courroux vous vous affoulez  
Et vous mettez en grant martire  
Se vous avez aesles vollez  
Ny pensez plus il nous fault rire.

Or sus encor vous veuil je dire  
Deux vers que fit ung apostolle  
Pour vous oster de dueil et dire  
Vous les tiendrez de mon escolle  
Or escoutez ceste parolle  
Le latin est bien compassé  
La doctrine si nest pas folle  
Je lay appris au temps passé.

Audi vade vide tace  
Entendez se sçavez lusage  
Si tu vis vivre pace  
Qui ainsi fait cest fait de sage  
Et lon dit en nostre langage  
Trop parler nuit, trop grater cuyt  
Ce nest pas ung patois sauvage  
Tant grate chiere que mal gist.

Celluy qui ce langage mist  
Et en françois et en latin  
De grant prudence sentremist  
Le proverbe si est certain  
Je lay appris ung bien matin  
Après que fusmes resveillez  
En lhostel dung duc palatin  
A le sçavoir vous travaillez.

Et plus si ne vous merveillez  
De ce qu'on dit et fait a court  
Ne dictes mot, dormez, veillez  
Se vous parlez faictes le court  
Faictes laveugle et le sourt  
Et ayez tousjours grans oreilles  
Se bien sçavez faire le lourt  
A la court vous verrez merveilles.

Soit de jour ou de nuyt aux veilles  
Gouvernez-vous y sagement  
Honneurs verrez plus que de pailles  
Il en y a tres-largement  
Se rien voulez premierement  
A nul ne dictes vostre fait  
Se ne sçavez certainement  
Qu'il soit bien vostre amy parfait.

Car bien souvent on est deffait  
Par trop declairer son affaire  
Or sus venons a vostre fait  
Sur ce qu'on vous a voulu faire  
Navez-vous pas bien peu affaire  
Dy penser, esbahy suis comme  
Ainsi vous en povez deffaire  
Car tout si ne vault une pomme.

#### LE RESPONDANT. LAY.

Hanibal vault conquerer Romme  
Mais tout en somme  
Faillit par ung bon champion  
Plus hardy neut dicy en somme  
Le vaillant homme  
Et avoit a nom Scipion  
Il eut a sa promotion  
Commission  
De conquerer ceulx de Cartage

Et vint en son intention  
Sans fiction  
Aux Romains leur fit faire hommage.

## LAY.

Chando anglois fut homme sage  
De hault courage  
Et fut vaillant homme de guerre  
Il fit en France maint dommage  
Par son oultrage  
Et y conquesta mainte terre  
Mais quant plus neurent que conquerre  
Ne rien acquerre  
En leur pays seu retournerent  
Se de ce voulez plus enquerre  
Allez le querre  
Les croniques le rapporterent.

## LAY.

Ainsi ces deux se transporterent  
Et emporterent  
En leur pays tout leur bagage  
Mais si tres-tost quilz y entrerent  
Ilz rencontrerent  
Envye et tout son lignage  
Et fortune la tres-sauvage  
Par leur langage  
Les firent du pays absens  
Nonobstant leur vasselage  
Vent au visage  
Leur fut mis comme hors du sens.

Depuis lan mil six quatre cens  
Gens tres-puissans  
Qui estoient parmy la France  
Si ont esté fais non puissans  
Non congnoissans  
Le cas dont ilz avoient souffrance  
Par envye sans congnoissance  
Jay souvenance  
Que qui voit la maison ardoir  
De son voisin je croy et pense  
Que grant doubtaunce  
De la sienne bien doit avoir.

## LAY.

Puisque je puis appercevoir  
Et concevoir  
Quenoye me veult assaillir  
Ne dois-je faire mon devoir  
Cest assavoir  
A laudevant me fault saillir  
Sans avoir paour ne tressaillir  
Dois-je faillir  
A male bouche et a envye  
Sans cause me veullent tollir  
Sans deffaillir  
Mon bien mon estat et ma vie.

## LACTEUR.

Je croy trop bien une partle  
Des exemples que vous baillez  
Mais vostre fait tel si nest mye  
Pource pour neant vous merveillez  
Robe de plusieurs draps taillez

De couleur vert, rouge et perse  
Pour folle vous travaillez  
Qui bien se soustient point ne verse.

Bien sçay quenvye la perverse  
Fait bien souvent l'homme verser  
Quant fortune la tres-diverse  
Veult avecques elle converser  
Mais quant l'homme sçet traverser  
Leurs faitz en les bien renversant  
Il se garde bien de verser  
Par trop passer en traversant.

Vous avez ung maistre puissant  
Qui maintient si noble maison  
Prudent est et bien congnoissant  
Et de bon conseil a foison  
Avecques ceulx de la toison  
Qui honneur ont si bien gardée  
Par grant justice et raison  
Ont acquis bonne renommée.

Se envye prent sa fumée  
A vous donner aucune charge  
Venir povez sans main armée  
Et sans porter escu ne targe  
Pour bien monstrer vostre descharge  
A ce doubter ne devez rien  
Puisque le prince ne vous charge  
Ne vous chaille vous estes bien.

Quant il a ung serviteur sien  
Ne doubtez quil sçet bien congnoistre  
Se il fait mal ou sil fait bien  
En telz choses sçet bien son estre  
Selon que le servant peult estre  
Du bien luy fait nen doubtez point  
Il monstre bien quil est bon maistre  
A son bon servant ne fault point.



Or me dictes avez-vous point  
Veu serviteur en son service  
Ou lon ait trouvé tour ne point  
Pour loster hors de son office  
Sinon quil ait fait aucun vice  
Et se le prince peult entendre  
Que son serviteur si soit nice  
Selon le cas le fait deffendre.

Se cecy sçavez bien entendre  
Ne chargez point vostre vouloir  
A mieulx servir vous devez tendre  
Sans vous plaindre ne vous douloir  
Denvyne ne luy doit chaloir  
De chose que puisse mesdire  
Car son parler peult peu valoir  
Sus elle a assez a redire.

Vostre maistre vous a fait dire  
Quil vouloit bien que vous sçussiez  
Que pour rien quon sçeut contredire  
Contre vous que vous ne creussiez  
Que en sa grace ne fussiez  
Car il vous tient son bon servant  
Et veult que tousjours vous faciez  
Ainsi que avez fait par avant.

Se lon parle de vous souvent  
Par envye ne vous en chaille  
Laissez aller ce nest que vent  
Mais que le maistre ne vous faille  
Prenez le grain laissez la paille  
De vous tousjours soit bien aymée  
La dame qui les biens vous baille  
Que jay devant icy nommée.

Se en vous est bien enfermée  
Sans departir vous navez garde  
Denvyne ne de son armée  
Car se sera vostre avantgarde

Et si fera l'arrièregarde  
 Qui sera vostre sauvement  
 Car cest celle qui tousjours garde  
 Ceulx qui la servent loyaument.

Prenez en vous esbatement  
 Joye soulas avec liesse  
 Et vous ostez de pensement  
 Laissez soucy avec tristesse  
 Car cest ce qui le cueur vous blesse  
 Et boutez hors melencolie  
 Qui vous tient en si grant destresse  
 Ou vous ferez tres-grant folle.

#### LE RESPONDANT. LAY.

Mon bon maistre je vous mercie  
 La courtoisie  
 De laquelle me confortez  
 En dangier estoye de ma vie  
 Par grant envie  
 De quoy vous me reconfortez  
 Moy qui estoye desconfortez  
 Me supportez  
 Par vostre grant misericorde  
 Mon mal en bien vous transportez  
 Et rapportez  
 Mon fait en amour et concorde.

Envye mon cueur si concorde  
 En une corde  
 Dont ne le povoye descorder  
 Mais quant de voz ditz me recorde  
 Je me accorde  
 A vostre vouloir accorder  
 Et trestons vos ditz concorder  
 Sans discorder  
 Jamais ne les discorderay

En mon cueur les vueil encorder  
Sans descorder  
Car tous voz ditz jaccorderay.

## LACTEUR.

Or escoutez je vous diray  
Ne soyez melencolieux  
En ce faisant vous aymeray  
Et nen pourrez valoir que mieulx  
Ne parlons plus des envieux  
De joye parler nous convient  
Et parlons de ces plaisans lieux  
Desquelz la compaignie vient.

A vous veu se il vous en souvient  
Esditz lieux mainte creature  
Ou Dieu du ciel qui tout soustient  
Se bien ouvré si a nature  
Et en allant a l'adventure  
Ainsi qu'on va de rue en rue  
On ny voit belle fourriture  
Plus belle ne peult estre veue.

A galans qui ont bonne veue  
Qui bien si sçavent contenir  
Il me semble que soubz la nue  
Na meilleur lieu pour eulx tenir  
Mais quilz se sachent maintenir  
Par raison qui sur tous domine  
Car bien souvent le contenir  
Art le corps et la bource mine.

## LE RESPONDANT. LAY.

Se ce neust esté mimequine  
Nostre meschine  
Qui se tenoit en la cussine

Et Calquin fille de l'hotesse  
Et la fille nostre voisine  
    Qui se endoctrine  
Destre doulce, plaisant et fine  
Et en doulx regars si adresse  
Et puis la belle brodaresse  
    Jamais lyesse  
Je neusse eu fors que tristesse  
Mais je y passoye mes douleurs  
Et drogue la bonne maistresse  
    Qui point ne cesse  
De monstrier aux amans ladresse  
En son hostel au puis damours  
Ung bien peu au dessus de lours.

## LACTEUR.

Se dicy aviez pris le cours  
Au braire ou est le souldam  
Nè verrez-vous plus bel acours  
En ville des filles Adam  
Fustes-vous vers le flamidam  
Et la ou fut l'hostel du pas  
On y arrache mainte den  
A telz qui ne sen vantent pas.

## LE RESPONDANT. LAY.

Par mon serment je ne croy pas  
    Que oncques trespas  
Plus gracieux on sçeust passer  
Car bien on y prent son repas  
    Par bon compas  
Qui bien si le sçet compasser  
Je ne me sçauroye passer  
    Dy repasser  
Tant y a gracieux passaige

Homme ny sçauroit trespasser  
Mais amasser  
Fault argent ou non est pas saige.

## LACTEUR.

Aucuns y vivent davantaige  
Et les autres baillent argent  
Quant argent fault, fault bailler gaige  
Ou on a tantost le sergent  
Et bien souvent ny a si gent  
Qui ne muse et qui ne pense  
Et qui ne soit bien diligent  
A la fois pour faire finance.

Ainsi nous tous par grant plaisance  
Nostre chemin nous en allasmes  
A nostre amy sa desplaisance  
Par ce moyen nous luy ostames  
Dillec en avant chevauchasmes  
Joyeusement pour nous desduire  
Des bourdes a plain bras comptasmes  
Trop je mectroye a les redire.

## LE RESPONDANT.

Mon nepveu point ne vous fault dire  
Ou sen va nostre compaignie  
Nous ne sommes faiz que pour rire  
Bien vous congnoissiez nostre vie  
Les regretz de la departie  
Estoient faiz par grande maniere  
Reconfortez nostre partie  
Vous la congnoissez pas nest fiere.

A noz bons amys par priere  
Pourrez monstrier ceste matiere  
Tres-humblement les en prirez

Et se rien y a qui naffiere  
Lisez devant et puis derriere  
Incontinent le trouverez  
Par eulx quant leur demanderez  
Ostez tout ce que vous pourrez  
Trouver qui a nul pulst desplaire  
Puis après vous leur monstrez  
Honnestement le garderez  
Tousjours a chascun on doit plaire.

A tous autres par exemplaire  
Direz qua eulx me recommande  
Se rien je puis pour leur complaire  
Je vous supply quon le me mande  
Et je vueil payer grosse amende  
Sans en ravoir amendement  
Se aucun deulx rien si me mande  
Se je faulx a leur mandement.

A dieu dy generalement  
A la court et a son domaine  
A dieu or a Dieu vous comment  
Dieu vous doint joye souveraine  
Fin du compte fais a grant peine  
Lan quarante neuf quatre cens  
A Chasteau Regnault en Ardaïne  
Deux moys devant les Innocens.

#### LE COMPLAINANT.

Ce compte fait par gens passans  
Je le feis porter a la court  
A seigneurs tres-bien congnoissans  
Tout mon fait pour le faire court  
Quant leurent veu le bruyt en court  
Tellement que la congnoissance  
Vint au prince qui tout secourt  
Dont après il eut souvenance.

Les aucuns avoient desplaissance  
De mon courroux quant le veoient  
Et les autres prenoient plaissance  
En le lisant ilz sen ryoient  
Les autres au prince disoient  
De moy du bien plus qui n'avoit  
Den trop dire temps ilz perdoient  
Le prince assez en sçavoit.

**BALADE QUE LEDIT PRISONNIER FIST EN LAN  
MIL CCCC XXXIX, A LA REQUESTE DE LA ROY-  
NE DE FRANCE DERNIERE TRESPASSÉE, DE  
MADAME LA DAULPHINE ET DE MADAME DE  
CALABRE ET DE PLUSIEURS AUTRES, LES-  
QUELLES DAMES ESTOIENT A CHALONS.**

Qui est celluy qui se sçauroit tenir  
Destre joyeux et de soy abstenir  
Destre amoureux sans joye et sans lyesse  
Voyant roynes hault estat soustenir  
La daulphine plaisamment maintenir  
De Bourgongne la tres-puissant duchesse  
De Calabre la tres-belle princesse  
Avecques elles mainte chevaleresse  
De damoiselles chascune bien garnie  
Entre telz gens nauroit jamais tristesse  
Car de douleur, de beaulté, de jeunesse  
Onques ne vy plus plaisant compaignie.

Qui a Chalons si eust voulu venir  
Toutes ces choses en eust veu advenir  
De chevaliers, descuyers grant noblesse  
Qui tous tendoient a honneur parvenir  
Les grans destriers bien faisoient soustenir  
A la jousté pour monstrier leur proesse  
Chascun tendoit pour sa dame et maistresse

A rompre boys, lances par grant rudesse  
 A fort joster chascun prenoit envye  
 Dont les aucuns cheoient a la renverse  
 Quant ilz cheent tantost on les redresse  
 Oncques ne vy plus plaisant compaignie.

Quant de ces belles je ay le souvenir  
 Le cueur, le corps me font rejouvenir  
 Sans soucy suis rien ne sens qui me blesse  
 Et leur servant leur plaist moy retenir  
 Jamais autre je ne vueil devenir  
 Car nuyt et jour de penser je ny cesse  
 Je leur fais veu et si leur fais promesse  
 Maulgré dangier vueille ou non vieillesse  
 A les servir tout le temps de ma vie  
 Amours le veulent et mon cueur si mempresse  
 Puis quilz le veulent fait sera sans paresse  
 Oncques ne vy plus plaisant compaignie.

Prince le dieu damours ne la deesse  
 Si nont rien fait de plus grande haultesse  
 Nassemblée qui soit mieulx accomplie  
 De tout honneur et de toute richesse  
 Heraulx crioient a haulte voix largesse  
 Oncques ne vy plus plaisant compaignie.

AUTRE BALADE QUE LEDIT PRISONNIER FIT  
 EN LA VILLE DE REIMS EN LAN DEVANT  
 DIT A LA REQUESTE DE MA DAME  
 DE BOURGONGNE ET DE TOUTES  
 SES DAMES ET DAMOI-  
 SELLES.

Je vis lautrier sur ung rivage  
 Entre trois femmes grant devise ,



Qui lavoyent linge de parage  
Lœuvre devoient a leur guise .  
— La plus jeune une chemise  
Mectoit seicher dessus des rains  
Et dist aux autres sans faintise  
Quil nest ouvrage que de reins.

Vous blasmez lœuvre et louvrage  
De Damas, de Troyes, de Venise  
Et de Paris la bien assise  
Vous ont ce appris voz parrains ?  
La jeune dist;rien ne les prise  
Quil nest ouvrage que de reins.

La tierce qui fut caulte et sage  
Luy va disant, ores Denise  
Je nentens point vostre langage  
Reims est cité tres-bien comprise  
Mais aussi bien que bien ladvice  
Partie du corps sont les reins  
Declaration par vous soit mise  
Quil nest ouvrage que de reins.

Dames ouye avez lemprise  
Jugez qui mieulx a dit ou moins  
La jeune se tient a sa prise  
Quil nest ouvrage que de reins.

BALADE QUE MONSEIGNEUR DE NEVERS EN-  
VOYA AUDIT JEHAN REGNIER BAILLY  
DAUCERRE FAICTE AU CHASTEAU DE  
MONTENOISON EN LAN MIL  
CCCC. LXIII.

Entre nous povres hermites  
Sommes a Montenoison

Venus pour faire raison  
A dieu de touz noz debites.

Nous en serons du tout quittes  
Ains que vuydons la maison  
Entre nous povres, etc.

Quant messe et heures sont dictes  
Nous beuvons vin de saison  
Et mangeons bien dung oison  
Et de bonnes tripes frites.  
Entre nous povres, etc.

Tout autour de nostre maison  
Avons boys assez et foison  
Hayes et buysson fort despine.

Dont au pied de nostre hermitage  
Si a mainte beste sauvage  
Et grant plante de sauvagine.

De chevreaux, lievres et levreaux  
De sangliers, connins, lapereaux  
Le plus du temps prenons saisine.

Bonnes perdris et gras chapons  
Faisans, poules, paonnes et paons  
Font souvent fumer la cuisine.

Par fois sont oyseaulx de riviere  
Gectez hors de la gibeciere  
Pour estre mis a la dodine.

Chevreaux, cochons, beuf et mouton  
Nous font tant crosler le menton  
Quenflée en devient la bodine.

Dune andouille entre deux jambons  
Faisons services beaulx et bons  
Avecques ce beau plat deschine.

Grosses carpes, barbues et tenches  
Grans luz, carreaulx et parches blanches  
Sont mangées a la galentine.

Bon pain avons feves et pois  
Bon vin, bon lart avec des pois  
Point ne serons prins par famine.

Poires cuites, fromage gras  
Pouldre de duc et ypocras  
Prenons par fois par medecine.

Quant nous voulons aller esbattre  
Pour bestes et oyseaulx combattre  
Nous noublions pas la bodine.

Nous vous demandons tous ensemble  
De nostre fait que vous en semble  
Menons-nous point vie devine.

Si prions Dieu que face a face  
Le puissions veoir par sa grace  
En sa gloire que point ne fine.

**LA RESPONCE QUE LE DESSUS DIT JEHAN  
REGNIER FIT A MONSEIGNEUR DE NEVERS**

Aux pelerins du grant pardon  
Lesquelz nont pas fait par chemin  
Mais par bulles en parchemin  
Du pape lont acquis par don.

Maulmigny Lestal et Lourdon  
Ordonnoit sans parler romain  
Aux pelerins, etc.

Saupiquet et tire lardon  
Et Marchegay et soir et matin  
A l'appareil mettoient la main  
Ilz y ont taillé maint lardon  
Aux pelerins, etc.

En plus fort chastel que Lordon  
On a donné pardon dium  
Aux pelerins, etc.

Mangé nont rousse ne gardon  
Mais grans poissons sans alevin  
Sauvaginez chairs et bon vin  
Meilleur que vin de galardon  
Aux pelerins etc.

Forclos leur fut par ung brandon  
Dnser du fruit de chaulconnin  
Aux pelerins, etc.

Tous autres fruitz ont abandon  
Capendu, Roneau, Jolemain,  
Quierville, Manifroy et Parmain  
Dieu si en rendra grant guerdon.  
Aux pelerins du grant pardon.

Aux pelerins et aux hermites  
Acquerans le pardon de Romme  
Pour estre de leurs pechez quictes  
Comme doit estre tout preudhomme  
A tous vous fais sçavoir en somme  
Après recommandation  
Que pardon ne vault une pomme  
Qui ne fait satisfaction.

Satisfaction si fault faire  
Tantost après contriction  
A plusieurs elle est forte a faire  
Du cueur sans contradiction

Mais qui la fait sans fiction  
Dieu par ce point est contenté  
En la faisant d'affection  
Car il sçet bien la voulenté.

La voulenté voire sans faincte  
Si est reputée pour le fait  
Selle est necte comme jacinte  
Le pardon si est tout parfait  
Selle est autre on na rien fait  
Perdu on a temps et voyage  
Et le pelerin tout deffait  
Sil na nectoyé son courage.

Courage nect et gracieux  
Piteux, courtois et veritable  
Si fait monter lame es cieulx  
Car elle est v Dieu delectable  
Et non pas viande de table  
Sangliers ne serfz, chevreaux ne dains  
Ne coursiers qui sont en lestable  
Ne tous autres plaisirs mondains.

Plaisirs mondains souvent si font  
Plaisir au corps dommage a lame  
Car il les met si tres-parfond  
En lieu plain de feu et de flamme  
Qui le corps et lame enflamme  
Compter fault après la despence  
Car gesir fault dessoubz la lame  
Il est sage qui bien y pense.

Qui bien y pense et souvent,  
Advis mest que cest grant prudence  
Car ce monde cy nest que vent  
Se des biens y a habondance  
Si fault-il aller a la dance  
De macabré la tres-diverse.

Il convient que chascun y dance ,  
Tres-bien dance qui point ne verse.

Qui point ne verse a la renverse  
Si fault-il gesir dos envers  
Il ny a destour ne traverse  
Car tous seront mangez de vers  
Pelerins estans a Nevers  
Pensez au temps qui après vient  
Et vueillez bien noter ces vers  
Car une fois mourir convient.

Mourir convient et nen souvient  
Je ne sçay pas que ce peult estre  
Et si ne sçet-on quon devient  
Ne ou lon va ne en quel estre  
Il nen est point de si grant maistre  
Quil ne faille passer le pas  
Ou a dextre ou a senestre  
Bon y fait passer par compas.

Par compas bon y fait passer  
Affin que lame soit ravie  
Pour la doubte du trespasser  
Quant lheure sera assouvie  
Combien que mener bonne vie  
Boire, manger en temps et lieu  
Sans penser mal ne villenye  
Cecy ne desplaist point a Dieu.

A dieu dy generalement  
Aux pelerins dune aliance  
Eu priant Dieu tres-humblement  
Auquel on doit avoir fiance  
Que tous soyez de conscience  
Purs et nectz du cuer cler et fin  
Et au surplus par sa puissance  
Vous doint paradis a la fin.

Escript a Aucerre sans jour  
En decembre le dernier jour.

CY APRÈS SENSUYT UNE LETTRE QUE LE-  
DIT JEHAN REGNIER ENVOYA A  
MONBLERU.

Mon nepveu le plus que je puis  
Mon fait vous rescriptz brief et court  
Le procès sçavez ou je suis  
Contre monseigneur de Gaucourt  
En parlement a la grant court  
Sommes renvoyez des requestes  
Se le prince ne nous secourt  
Estre voudrions la ou vous estes.

Esté y avons douze testes  
Pour ung cas lyez dung lien  
Bien rabrouez et fussions bestes  
Nous ne sçavions nostre maintien  
Certes Jehan de saint Julien  
Ne le portoit paciemment  
Ne nes ung de nous aussi bien  
Car mal navons fait sciemment.

A peine de bannissement  
Et de perdre le corps et biens  
Adjournez fusmes vistement  
Chascun si fit pleiger les siens  
Quant a moy je pleige les miens  
Des dommages avons assez  
On fera tant que naurons riens  
Nous nous en fussions bien passez.

Peu de biens avions amassez  
Et pour neant les fault despendre  
De telz procès sommes lassez  
Il sembloit quon nous voulüst pendre

Nous avons bon loysir d'apprendre  
En escoutant en parlement  
On y oyt qui le sçet entendre  
Bien souvent tel qui parle ment.

Journée avons par contrement  
Pour retourner a laudience  
A la Saint-Martin proprement  
Prendre nous fault en patience  
Nous tous disons dune aliance  
Et si voulons bien quon nous oye  
Que au bon duc avons fiance  
Pour nous delivrer a grant joye.

Quant du mestier estre souloye  
Duquel laprentif si est maistre  
A Paris volentiers alloye  
Trop bien je y sçavoye mon estre  
Fust a dextre ou a senestre  
Bien queroye mes apatis  
Par tous les lieux ou povoye estre  
Maintenant plus nen suis hastis.

Javoye un martel tant fetis  
Qui de foul si avoit le manche  
Et mes boutons beaulx et gentilz  
Je ferroye trop bien sans planche  
Fust jour ouvrier ou fust dimenche  
Trestous les jours de la sepmaine  
Boutant la beste de la hanche  
Je ny avoye pas grant peine.

Bien sçavoye serrer la veine  
Car javoye bonne lancette  
Asserée et bien certaine  
Et si avoys bonne cornette  
Se la beste estoit du corps necte  
Il ny failloit travail ne brayes  
Mais quen disant une sornette  
Je tentoyes en toutes playes.



En villes, en boys et en hayes  
Tout par tout ou je me trouvoye  
Toutes ces choses cy sont vrayes  
Je ne tenoye chemin ne voye  
Hardement et puissance avoye  
Si tendoyes a conquerir  
Nul autre vouloir je navoye  
Pour honneur tousjours acquerir.

Honte navoye de requerir  
Tout prest si estoit mon harnois  
Je ne cessoye de querir  
Le combattre mestoient nois  
Mais a present bien je congnois  
Que plus ne seray consentant  
Du mestier je le descongois  
Desormais il mest trop grevant.

A lheure que lhomme sentend  
Cest a lheure quil est incluz  
Et pource me tiendray a tant  
Du mestier seray recluz  
Mon temps est passé et excluz  
Mes outilz sont trop refoulez  
Jamais je ne seray conclus  
Car mes membres sont affoulez.

Entendez bien se vous voulez  
Que plus ne quiers avoir confort  
Mieux me vallent les pois coulez  
Luser de lautre mest trop fort  
Se jen use je me fais tort  
Car après men plaingz et souspire  
Le cueur souvent si est daccord  
De ce dont le cueur si empire.

Au bon marquis du saint empire  
Et au prince de Charrolois  
Trestout mon fait leur pourrez dire  
Et a tous ses gentilz galois

Yasus du bon sang de Valois  
Comme mon bou maistre Destampes  
Beaujou, loufe ont leurs loix  
Bien pevent frapper en ses estampes.

Ces gros symiers ces belles hampes  
A dix dois ilz pevent trop bien prendre  
Pource quilz ont plaines leurs lampes  
Du saing damours pour bien comprendre  
Le faict ilz ne sçauroient mesprendre  
Pour escrire ont bonne plume  
Qui nest refoulée ne tendre  
Il ne leur fault que beau volume

Aux princes selon la coustume  
Faictes recommandation  
Au bon Croy et a Anthume  
Point ny faictes dilation  
Tous et toutes sans fiction  
Dictes leur bien, leur sçaurez dire  
Que Dieu leur doint perfection  
De tout ce que leur cueur desire.

Escript a Aucerre sans sejour  
Doctobre le seiziesme jour  
Totus vester avunculus  
Satis grossus non parvulus.

BALADE QUE LE DESSUS NOMMÉ FIT A LA  
REQUESTE DE DAMOISELLE YSABEAU CHRES-  
TIENNE SA FEMME EN LAN MIL. CCCC. LX  
ET LEN REQUIST LA DICTE DAMOISELLE  
COMME EN LUY DISANT : MON AMY NOUS  
AVONS ESTÉ LONGUEMENT ENSEMBLE ET  
TOUSJOURS VESCU JOYEUSEMENT ET POUR  
LAMOUR DE MOY AVEZ FAICTES CHANSONS  
ET AUTRES JOYEUSETEZ; MAIS POURCE QUE  
SOMMES MAINTENANT EN NOSTRE ANCIEN  
AAGE VOUS NE FAICTES PLUS RIEN ; AU  
MOINS JE VOUS PRIE QUE EN FACIEZ  
UNE POUR LAMOUR DE MOY, LEQUEL DES-  
SUS NOMMÉ LUY REPONDIT QUE IL ES-  
TOIT CONTANT ET QUELLE SEROIT SELON  
LE TEMPS OU ILZ ESTOIENT ET QUELLE  
SE TENSIST CONTENTE. LAQUELLE DAMOI-  
SELLE LUY DIST QUE QUELQUE CHOSE  
QUIL FIST IL NE LUY EN DESPLAIROIT EN  
RIEN. SI LUY FIT LA DICTE BALADE QUI  
SENSUYT.

Puis que je sens que vieillesse a moy vient  
Et jeunesse me laisse et si moublie  
Prendre congé des armes me convient  
Car ma puissance si mest du tout faillie  
Mon fait ne vault desormais une oublie  
Tel desjeuner ne qniet que le polet  
Mieux me vauldroit manger un euf molet

Pour soustenir mon corps en bon propos  
Je suis maistre jestoye meilleur varlet  
Je ne quiers plus que laise et le repos.

Quant du bon temps passé il me souvient  
Que nous allions chasser a lacropie  
Et au printemps que chascun en aviens  
Que nous allions querans les nidz de pie  
Et maintenant jay au nez la roupie  
Nulles dens nay, je mangeue soupes en laict  
Fourré je suis et si ay mantelet  
Emprès le feu vin et eaue en deux potz  
Les mains me tremblent, et bois au gobelet  
Je ne quiers plus que laise et le repos.

Ha mamye ce temps la plus ne revient  
Se lattendons cest a nous grant folye  
Aller sen fault sans sçavoir quon devient  
Crier nous fault oublie, oublie, oublie  
Mon desjeuner si sera de boulye  
Des jeux saint mort jay prins le chapelet  
Je sçay trop bien que ce jeu vous est lait  
A dieu amours et a tous les suppos  
Ne mamenez Margot ne Ysabelet  
Je ne quiers plus que laise et le repos.

Prince laage en ce point si me mect  
Je estudie kalendriers et compost  
Medecine de mon fait sentremet  
Je ne quiers plus que laise et le repos.

---

ET QUANT LADITE DAMOISELLE YSABEAU  
CHRESTIENNE EUT OUYE LADICTE BA-  
LADR ELLE DIST QUELLE NESTOIT  
PAS TROP BELLE ET QUIL EUST  
MIEULX FAIT SE IL EUST  
VOULU.

Je suis celluy qui porte la bourcette  
De fin drap dor bien brodée et faicte  
Et de boutons de perles bien garnie  
Donnée me fut en faisant chiere lye  
Dieu gard de mal qui la donnée et faicte.

Ce me desplaist se la couple est deffaicte  
Quant est a moy lamour nest point faillie  
Je suis celluy qui porte la bourcette.

A fleur plaisant, vert, blanche, merveillette  
Qui au printemps venez dessus lherbette  
Souviengne vous de nostre departie  
Ja nest besoing que plus je vous en dye  
Souviengne vous de vostre ceinturette  
Je suis celluy qui porte la bourcette.

---



**Cy finissent les Fortunes et adversités de  
feu noble homme Jehan Regnier en son vi-  
vant, esleu Dauxerre, lequel a esté achevé  
nouvellement dimprimer le vingt-cinquesme  
jour de juing lan mil cinq cens xxvi. Et est  
permis a Jehan de La Garde libraire le ex-  
poser en vente, et sont faictes deffences a  
tous marchans et imprimeurs de imprimer  
ledit livre jusques a troys ans sur peine de  
confiscation et damende arbitraire a compter  
du jour quil a esté achevé dimprimer.**

**Cum privilegio.**



















